

明

書

一
二







書

明

(二十)

纂 麟 維 傳

明書卷六十二

志八

學校志

史官論曰。昊天生民。若有恆性。以有彝倫。而人道昉焉。然人生而蒙。蒙之爲言昧也。於天性。人道夢夢焉。爾也。於是乎作之師。以爽厥德。書曰。天降下民。作之君。作之師。惟曰。其助上帝。則知師也者。助天明民。覺之降衷。恆性而定之命也。斯其重於大君乎等矣。故君子欲化民成俗。必始於學。上不興禮。下不說學。欲以致治者末也。上古聖人以躬率。無學名。自虞咨夔契。開五倫四德之原。周迪賢能。示道德行義之典。文敷立命。辭出爲經。非天下之至聖。孰與能此。明太祖初定天下。當淫詞濁亂之餘。汲汲焉是圖。崇先師。列維範。登耆授俊。廣藉庀夔。詳定學規。至三至四。儆勵教學之法。森然燦然。所以勤教作人者。不遺餘力。而又爲之臨軒清問。咨重臣。簡端碩。親灑訓敕。俾爲之師。蓋以其官則師。其政則教。官師政教。義有並隆。而教固政之本也。凡可以爲士導天機。省習懈。章條戒。有發蒙包蒙之吉。鼓篋夏楚之宜。所以津楫一時。堂塗來禩。是以教化行而歸其有極也。後世雖多振舉之用。代爲諄切。乃陶範弗端。由之良模漸替。譽髦之地。化爲訟庭。械櫜之區。夷爲市肆。雖殿邦楨國。多吉蔚興。而難進歧途。譬宗非蠱比矣。以視初年建學成

賢之意。不啻霄壤。嗚呼。遂使激而爲言者。謂害天下之心者。莫甚於學宮。壞天下之士習者。莫甚於科舉。率天下爲惡無紀極者。莫甚於學官。噫。豈先王立教不善耶。抑司教者不獲其人。雖欲化民成俗。詎可得乎。詩云。民之秉彝。好是懿德。助天明民。在躬率者加之意而已。作學校志。

明太祖初定鼎金陵。卽如江淮府謁孔子廟。尋自將取婺。遂設儒學。以葉儀、宋濂、吳沈爲之師。徵劉基入爲儒學提舉。授世子經、乙巳。以集慶路故學改國子學。設博士、助教、學正、學錄、典樂、典書、典膳。諸官董其事。卽帝位之年二月。以太牢祀孔子於國學。仍遣官詣曲阜祭。諭之曰。仲尼之道。廣大悠久。與天地相並。故帝王莫不致敬盡禮。朕今爲天下主。期教化以行。先聖之道。朕旣躬爲釋奠。仍遣修祀事於闕里。其敬之。二年。詔天下府州縣皆立學。曰。古昔帝王育人材。正風俗。莫先於學校。至元其弊極矣。先王衣冠禮義之教。腥穢百年。人紀夷蕩。兵變以來。人習戰鬥。惟事干戈。弗講俎豆。欲興化何由。今朕統一天下。復中國帝王之舊。內設國子監。念不足盡延天下之俊。其令郡縣並建學校。以作士。師生月廩食。有司供之。學官月給俸。講聖道。使日漸化於先王之舊。八年春。詔諭都御史曰。惟致治在善俗。善俗視教化。教化行。使閭閻可化爲君子。教化廢。中材不免於小人。近北方喪亂。人鮮務學。其選太學諸生。中年長學優者。往各郡分教。使人務學而興材。於是以林伯雲等三百六十人續食遣。而時用翰林修撰檢討爲郡學官。已復令按察司精考儒學官不稱者。送部別調。蓋重郡縣學如此。更令郡縣閭里皆啓塾立師。守令程課。於是天下窮鄉僻壤。咸有學有社。學嚮方矣。初選補生員。則京府六十。府四十。州三十。縣二十。軍衛則附有司提

調遴考。免其家差徭二丁。土官如衛取例。久之令增廣生員。不拘額數。尋以國學地隘。不稱。登鷄鳴山。見其下地平敞。去市朝益遠。可營學。使士得一耳目。專於學。莞然喜曰。此天所藏。以遺朕興一代之學也。令工部集百工。構造而建孔子廟於學東。制甚壯。上數臨親視。爲位置規畫。明年成。上親詣祭孔子。服皮弁。執圭。再拜獻爵。復再拜乃退。御彝倫堂。諭祭酒。顯曰。天下言道之中正者。莫儒若。往古聖哲。不儒名而德行實儒。孔子生周末。身儒道。行儒行。立儒教。率天下於中正。故爲萬世師。卿等位師表。當以孔子之道爲教。弼天下於道。復取尙書大禹謨。親反覆開諭。賜侍臣宴。竟日而罷。已命國子生月賜糧給其家。嗣後生徒益廣。齋舍不能容。上謂中書省臣曰。太學育賢之地。古聖王。建國君民。莫此爲重。朕承困弊之餘。建大學。招來師儒。今學者衆。而地狹。莫以容。其令有司增益之。俾其講習有所。游息有地。庶達材成德者。有可望焉。其時外夷如高麗琉球。皆請遣子弟入太學。而高麗金璫。竟登進士。厥後屢貢入國學。上皆命官專教之。成材而歸。時有至六七十人者。至穆宗時。猶然。先是上諭博士俶言爾等宜一以孔子所定經書。誨諸生。毋以儀秦縱橫壞其心術。尋命參讀劉向說苑及律令。乃敕禮部頒定學校規條。復手敕國子諸生。言爾太學生務謙柔恭謹。毋縱血氣。人我之驟。固守仲尼所謂四非之目。積日經旬。踰歲月不變。則賢人矣。朕已敕禮部條陳警戒。其勉循毋忽。其欽定學規。嚴師弟子臨屬之禮。務於整齊嚴肅。以禮義相先。學主理性明倫。期於適用。諸所爲防非訖欲之道。甚備。而天下府州縣學。亦具科條禁令。立臥碑令遵守焉。初禮部奏增國子生。上曰。揚雄言。務學不如務求師。師得其人。則成材。不得其人。廣生徒何益。今民間俊

秀可充選者甚衆。而祭酒乏人。卿等其爲朕詢采天下通今博古才德兼備足爲人師者。以名聞。於是起致仕尙書侍郎及四輔官。驛召至。皆手敕署祭酒司業官。十四年。以文淵閣學士宋訥爲祭酒。敕諭之曰。太學天下賢士所關。禮義之所自出也。自建學來。歷選師儒以居。迄今未臻其效。豈士習之難變歟。抑師道之不立莫爲變歟。此朕所夙夜究心者也。卿宿學者德。茲特命爲祭酒。尙體朕志。使諸生有成。士習丕變。庶國家有賴焉。時初設學。學徒衆。師生相訐。教化不行。上令曹公文忠以勳臣親重領監事。助繩糾。訥性嚴重。不妄言笑。以矩矱自檢。撫士恩義並至。恆寢食堂廂。不休沐私第。諄切訓誨。不遺餘力。上時時召與問對。亦時時至太學臨觀。居久之。學錄金文徵患訥嚴。謀於吏尙書余懌。以訥年且老。移文令致仕。訥陛辭。上驚問故。召二人面質。時上方嚴賊吏之罰。文徵誣訥受公侯餽爲賊。上怒曰。禮師父兄盛節。儒者之榮也。何謂賊。文徵又謂訥餓死有病。生上曰。祭酒本提大綱。此自親教者不省錄之過。訥何罪。乃誅文徵及懌。而敕祭酒言君子之道猶嘉穀。小人之道猶稂莠。二者並存。世所不免。然天相德人。猶扶植嘉穀。故道堅而不磨。彼小人之所爲。自漸滅盡矣。卿勿以是而替威儀。竭心力如故。訥再稽首謝。後訥病。上遣中使臨諭。言卿稟天地之性。發仲尼之誠。施幽德以修道。教人將病不藥而速瘥也。召其子望江簿麟令侍養。二十三年卒於官。上爲文遣奠。給喪葬費。嘗圖其形像。比三十年。上御門召國子生臨諭。猶追思訥作人之效。爲諄復不置云。當是時。上時召儒臣便殿坐。廣咨詢。國學官李思迪。馬懿。緘不言。上斥去。因敕國學師生言賢者所爲。務學者欲推行之。有裨於國家。懷詐自私。上無助於君。下無補於世。學曷故焉。如

思迪、懿、朕以其學官召同游。期在嘉言善行。啓輔朕不逮。乃終日緘默。朕有問。卽他人辭說。遷就之以對。未嘗獨創言。豈朕昏昧不足與言耶。何訪以道而不相告也。及遣侍東宮。亦若此。斯懷詐甚矣。昔孔孟抱聖賢之道。恨不得用世拯生民。故歷聘不休。今思迪、懿發身草野。一旦與人君共游殿廷之上。君就問而暗。學孔孟者。顧若是乎。事朕且然。其肯盡心諸生哉。今自師弟子。一以孔孟爲法。副朕責望意。諸御太學。恩意隆洽。嘗詔大臣曰。朕甚欲尊顯諸生。慮未悉吾意。諸生入學之日久。其令歸省。賜二親帛各四端。有妻孥者。攜以來。月與粟錢。務得其歡心。勿惜有司費。他諸保息有堂。調視有醫。賜予有特恩。而卹喪有著令。諸愛養至矣。當修洪武日歷時。遊弟子員俊秀有文者。考義例繕書。得義烏黃昶。引見西苑。賜慰良久。問及昶曰。爾何人之裔。對曰。黃文獻潛。臣從曾祖也。上悅。出尙方綺裘革履以賜。會上召誠意伯某。學士濂。承旨同。燕乾清之便閣。同被酒還。愛昶賦一詩贈之。字大如罽。少選。上復召赴右順門。目同曰。卿醉未醒耶。同對曰。臣雖醉。猶能賦詩贈黃秀才。上喜。急命取詩於史館。讀已笑謂濂曰。朕卽和同章。賜昶。卿當爲朕書。蓋菁莪樂育之心。至於是。往往命祭酒司業言。太學國家育材之地。不專務記誦博洽。在檢身飭行。恪遵古聖賢之道。上恆患國家文學之士不如古。命擇弟子員質美能文者。得三十五人。命學士濂教之。日程業課功。嘗召國子生前問之曰。爾等讀書暇。壹嘗習射矣乎。對曰。習之。曰。孰未。對曰。未也。上曰。古之學者。文足以經治。武足以戡亂。故能兼任將相而社稷奠安。今天下粗平。爾等當務學。然武豈可忘哉。詩云。文武吉甫。萬邦爲憲。文武並用。古之道也。吏部掌奏下第舉人授教官。上諭之曰。教學之方。非求速

化。譬爲層臺。必基於畚土。行千里。必始於跬步。但當勉循漸進。若急遽苟且。未得此而志彼。非徒學者無益。爾亦徒勞矣。爾等盛年。雖職教。宜勉修。勿自滿。常見己不若人。則所習益高。常見人不若己。則業漸於下。卽百工盡然。況於學乎。時於諸生中。選才學聰俊者。益其餼。命之博極羣書。講明道德。以期大用。積曰老秀才。恩遇特隆焉。會禮部言。天下學官。多以賢良等科。辟至京。而居者每爲上司委設。以致師範缺。而生徒業廢。上怒曰。學校人材所出。朕方以未得明師爲憂。而今若此。甚非崇重儒教之意。其禁之。命選武臣子弟。各入學讀書。諭之曰。武臣從朕定天下。以功錄其子弟。長於富貴。又父兄早歿。鮮知學問。令讀書明義理。有成而授官。庶獲實用。昔霍光功非不高。身死未久。而子孫肆志誅夷。以不學故。唐郭子儀功蓋天下。位極人臣。而卒保令名。蓋以謙抑識道理也。在都入國學。四方入郡縣學。先是自宋來。春秋不肄於學宮。上慨然曰。孔子作春秋。明三綱。敍九法。爲百王軌範。未有舍是而能處大事。決大疑者。自今諸生宜習讀。以求聖人大經大法。他日爲政臨民。庶乎有本。當時有教官給由至京者。上必召問民間疾苦。稼穡艱難。一日有對者曰。臣以教爲職。嘗在學。於民事無所知。上怒叱之曰。詐儒。豈有久居鄉里。不與人交接。卽不出。每朔望休假。節序朋友往來。於民情世務。豈不談及。且儒者所學。皆聖賢之道。昔伊尹耕莘。嘗以致君澤民爲念。漢賈誼。董仲舒輩。皆起田里。上書陳政務。馬周不得親見。唐太宗而托乎武臣。宋儒李沆爲宰相。佐真宗。日陳四方災異。范仲淹自做秀才。便以天下爲己任。汝等得集朝堂。朕親詢問。尙曰不知。而曰教職事居學不出。若宋儒胡瑗爲蘇湖授教。其教諸生。皆兼時務。治兵治民。水利算數諸事。當時得

人皆由其教授有法。今汝所教何事。民情世務皆茫然。雖有賢才。亦爲爾等所壞。乃願謂刑部臣曰。竄之。因榜諭天下。使爲戒。當是時。上方創制天下。而育材造士。顧勤備如此。初制郡州縣里。推年高行誼者爲老人。凡民間有爭。悉事付平決。又命里各製木鐸一里。選耆老振行之。徇道路以警衆。曰。孝順父母。尊敬長上。和睦鄉里。教訓子孫。各安生理。毋作非爲。在都邑則京尹率里老至御前宣諭。稍久乃傳旨。視古益慎重親比。而御製大誥三編。教民榜文於五常之訓。養親祀先。教子睦族。勤生業。厚閭里。善善惡惡之事。言之不一而足。於是令諸色人盡讀大誥爲觀戒。其麗於罪。有誥能復習者。聽減等。無者加一等。蓋誘誨之至諄。詔中書定鄉飲酒儀。習禮讀律誥。尊高年。敦長幼之節。定官民服舍。於貴賤爲差。諸境內有孝子順孫及節義志行卓異者。里老以實白有司。有司上監察御史。覈實開奏。表門閭如制。復詔定民間冠婚喪祭儀。民百戶爲里。里有長歲時飲社如制。人戶見丁著業。里老督併趨作業。令勿惰。里中諸婚喪富助財。貧助力。春秋耕耨力不及。百家公助之。其子弟不率五常作非者。里老若年壯豪傑會集訓戒之。則禮所稱屬民讀法如族師。索鬼神祭祀如黨正。辨施舍行秩。敍如閭胥里宰。勸農圃任耕耨樹藝而稽其女紅。如閭師鄰長。使民相受相糾如鄰長。畢做其意行爲著令則固天下之大教也。國初以春秋上丁祭先師孔子於國學。命學士承旨同侍講鳳韶撰釋奠樂章舞六佾。命禮尙書諒定禮儀。尋詔司府州縣衛學通祀孔子。頒釋奠儀。已又頒大成樂器於天下學。從請式焉。後宋濂爲國子司業。上孔子廟堂議曰。世之言禮咸取法於孔子。不以古之禮祀孔子。褻祀也。褻祀不敬。不敬則無福。古主人西面。几筵在西。漢章帝

幸魯祠孔子。帝西面再拜。開元禮先聖東向。先師南向。三獻官西向。猶古意。今襲後制。遷神南面。非神道尚古之義。古木主棲神。天子諸侯皆有主。大夫束帛。士結茅爲菹。無像設之事。開元禮設先聖神於堂上。兩楹間。先聖東北。皆席莞。尚掃地而祭。今因後制。搏土而肖像焉。失神而明之之意矣。古灌鬯求神於陰。燔蕭求之陽也。今用薰蕪代。古朝覲會同郊廟祭享。皆設庭燎。司烜共之。火師監之。示嚴敬也。今以秉炬。古之有道有德者使教焉。死則以爲樂祖。祭於瞽宗。爲之先師。若漢禮有高堂生。樂有制氏。詩有毛公。書有伏生也。當是時。學者各祭其先師。非其師弗學。非其學弗祭。學校旣廢。天下莫知所師。孔子集羣聖之大成。顏曾思孟實傳其道。尊之以爲先聖先師。而通祀於天下。固當。其七十二子宜止於國學設之。餘各祀其鄉。庶幾弗悖禮意。開元禮國學祀先師孔子。以顏子等七十二賢配。諸州惟配以顏子。關重慎也。今以荀況之言性惡。揚雄之事王莽。王弼之宗莊老。賈逵之忽細行。杜預之建短長。馬融之黨附勢家。亦濫廁其中。古者立學。專以明倫。子雖齊聖。不先父食久矣。故禹不先鯀。湯不先契。文王不先不窋。宋祖帝乙。鄭祖厲王。猶尚祖也。今回參伋坐饗堂上。而其父列食於廡間。顛倒彝倫。莫此爲甚。古士見師以菜爲贄。故始入學者必釋菜。以禮其先師。其學官時祭皆釋奠。今專用春秋。非矣。釋奠有樂無尸。釋菜無樂。是二釋之重輕。以樂之有無爲分也。今襲用魏漢津所製大晟樂。所謂亂世之音也。可乎哉。他如廟制之非宜。冕服之無章。器用雜乎雅俗。升降昧乎左右。此類甚多。難可更僕。若乃建安熊氏欲以伏羲爲道統之宗。神農黃帝堯舜禹湯文武而次列焉。皋陶伊尹太公周公暨稷契夷益傳說箕子。皆天子公卿之師式。宣

秩祀於天子之學。若孔子實兼祖述憲章之任。其爲通祀。則自天子下達。如是則道統益尊。三皇不汨於醫師。太公不辱於武弁矣。昔周立四代之學。學有先聖。虞庠以舜。夏學以禹。殷學以湯。東膠以文王。復各取當時左右四聖。成其德業者爲之先師以配。固天子立學之法也。忤上意謫官。而世宗卒如其言。五年。罷孟子配享。踰年而復。當上釐正嶽鎮海瀆城隍及古忠臣烈士封號。惟大成至聖文宣王及配饗從祀諸賢儒。封爵如故。尋從行人楊砥議。罷揚雄從祀。進祀董仲舒。先是天下喪亂。經籍散亡。上遣官四方購書。頒學校。諭禮官曰。農夫舍耒耜無以爲耕。匠氏舍斧斤無以爲業。士子舍經籍無以爲學。朕念天下丁喪亂久。士子欲殫心誦習無由也。其於國子鑄印頒之。建文卽位。祀先師於太學。監獻拜跪禮如廟社。詔天下凡下僚胥靡及伍戌。皆舉通經者實學校。或師或弟子。各遴擇精審。而汲汲於崇儒重道者。傳聞有殊典。然故牒皆削不存。永樂初。諭禮部言。太祖高皇帝內設國子監。外設府州縣衛學。選師儒教育俊秀。豐廩餼蠲繇。所期待甚重。比乃漸弛。其申飭之。祭酒儼具洪武中所定學規以上。上覽之曰。此學子科條抑法耳。爲師範者當正己爲諸生先。講學漸磨以養心淑身。又患天下士所爲學言。人人殊。俗異政無統也。諭學士廣侍講榮幼孜曰。五經四書皆聖賢精義妙道。傳註外。諸儒議論有發明者。卿等其悉采增附。其下。宋周程張朱大儒所著書。可羽翼六經者。亦類聚成編。務備務精。於是擇朝臣及郡縣學官有文學者。開局東華門。纂修光祿給饌。廣等總其事。書成。賜名五經四書大全。性理大全。親製序申聖王道治天下之意。頒其書於天下。學及諸衙門。敕蓋心講究。毋虛文。於是進宋儒胡安國蔡沈真德秀從祀。禁祀孔。

子於釋老宮。會鄱陽人朱季友詣闕獻所著書。毀宋儒以自是。上覽之怒曰。此儒之賊也。遣行人押赴饒州。會諸地方官聲杖之。焚所著書。其彰示好惡端士習如此。仁宗卽位。謂吏部臣言。比國子生務實學者少。固志趣卑下。亦由師範失職。而然。今引選國子監官。率循資陞授。不聞舉有道德老成之士。謂大學何自今其慎選以充。時上青宮舊學。咸列翰林。備密勿顧問。於是祭酒儼考三歲階勳。上親製誥詞命之。略言儼發身經術。游歷外職。先皇帝擢之。論思密勿之地。又簡諭朕德於春宮。旣掌成均。仍參經席。其議論有本末。治官有勞績。光詔先皇帝之德於無斁。爾實有之。今特進勳階。嗚呼。朕方勵志興學。以成俊造。庶幾教化復先王之舊。欽哉。予惟圖任舊人。汝其益殫厥心。用光予命。而宣宗御製儒學箴曰。君國子民。教之育之。有育無教。或淪於夷。置吏俾育。建學俾教。爲教之方。本乎師道。清修實踐。正學博聞。成己成物。師道用尊。爲學之方。體仁由義。誦法周孔。亦致文藝。化民成俗。以善其鄉。成材達德。以資於邦。本末循循。用臻實效。勗爾師生。毋忝學校。其興學篇一原本於君上之躬行。於德意益深篤矣。嘗語禮尙書義等曰。國家建學育才。以資任用。祖宗以來。得人爲多。比者各處考黜生員。例應充吏。多乞再試。彼旣恥於罷黜。必能悔過自新。宜從其請。然須令翰林院嚴試之。庶人知所警。向學有成。天下歲貢京考。多不中。禮部請罰。其提調及教官。上曰。是也。若提調勤於督察。教官勤於訓誨。未必至此。泰山之溜。可以達石。何況於人。今上下偷惰。虛度日月。故臨文不知所措。宜責罰薄示儆耳。敕風憲官程課嚴督之。每每咨學校典故及人材。消長於文華殿。恆喟然曰。比生徒荒怠。徒記陳言爲出身資。及授以職。訖無實用。是師範匪其人也。古

人謂師嚴而道尊。道尊而官正。其飭之。是時擢儒士盧中爲太平訓導。吏部驗以軍籍。宗人無補伍者。請斥之。以聞。上曰。其才學果佳。與其戎伍得一人。何如學校得一師。所成者多。其悉心作人如此。先是定都北京。國子監仍順天府學之舊。百制未備。教戒居養之道闕然。士雜居營巷。正統中。大學士李賢請修建。而廟學秩如。時兩都祭酒皆得人。北李時勉。南陳敬宗。於時有南陳北李之稱。時勉崇廉恥。抑奔競。別賢否。爲勸懲。士習丕變。士共頌爲天地之量。父母之心。太師英公輔。偕侯伯二十餘人。至請告詣國子聽講。惟英公與抗禮。餘列坐。時勉勗以古道。令諸生講經書成事不怠。蓋其風也。敬宗力師道。自任嚴教條。革舊習。勵諸生於進學。成德。睿宗之政。肅於朝廷。一時稱極盛。其後天下學生徒頗漫漶不檢。提調官不能制。乃遴置兩直隸。敕御史十三省按察司。敕添設副使。或僉事。提督學校。倣國子監科條。畫所爲。申督者。而遣大學士。士奇復條議上。凡所爲教導防窒及祛弊作興之法。甚具。成化中。敕提學各分督所屬官簿錄。諸儒生德業爲三等。德行優。文學贍。治事長者爲上等。有德行而經義治事稍劣者次之。卽經義優。治事長。而德行玷缺者。列下等。歲課月考。非上等毋得應貢舉。欲務士於本實。而例廩生考黜者。俱追廩爲民。父兄咸憚懼。不務子弟於學。提學御史閻禹錫請停追廩法。學稍興。當是時。御史陳選督南畿學。言稱古昔。動必禮則。先頒四禮。若射儀於學宮。令歲時肄訓生徒。主於躬行。以變革浮習。所巡行不居公府。居宿學宮。每締視周旋翼翼也。入夜齋館。吾伊鏗鏘。選坐夜深。勸省之。羣士競奮。翕然信如神明。旣去。思之如親。及督河南廣東一如之。始太宗時。天下新脫鋒鏑。俗尙簡質。天子又表章濂洛關閩諸儒。先風勸之。

於學言學者有所統。進士陳紀等予告歸。陛辭上拳拳以古人務學不厭。當益勉進。修爲訓。已復申諭曰。鄉里父兄所在。爾輩不可以一第故。輒生驕慢。驕慢凶德。不可長也。孔子於鄉黨。恂恂似不能言。其時官峻法守。謹繩墨。人尙禮教。施於洪熙宣德天順之間。家喻戶曉。博士弟子語。獨視其粗。合經義傳旨者錄。稍戾選者汰。其爲辭浮質。尙欲工而不能。時之賢者。各往往明經以窮理。居敬以反身。二者並修。務惇於本實。雖中庸之流。亦奉訓承式。不敢悖。蓋士有三年不課舉子文。而日專經學。研義理不廢也。卽閭巷父兄長老。亦各往往誦習小學性理通鑑諸書。及御製大誥榜文。故風習最淳異。時大學士薛瑄處士胡居仁之倫。言純師行純法。爲明儒冠。嗚呼盛哉。弘治初。監規積弛。詔起侍講謝鐸爲北祭酒。僉事章懋爲南祭酒。皆夙儒。懋以父喪力辭。特旨爲增置司業一人。署監事以待。以編修羅欽順爲之。聽懋終制。日赴官。時士多放逸。有差撥爭先者。欽順以爲放心宜收。非嚴不可。爭風宜息。非精稽考。公子奪鎮之不能。持太力而謗作。稍久乃帖。及懋至。與謹矩度。尙德化。勵廉恥。明道術。著功令。祁寒暑雨。具冠冕危坐。終日以聽事。諸生日執經質疑問業。人人自以爲得師也。鐸先後祭酒兩雍。律已率人。皆嚴立規約。監故有羨金爲祭酒費。鐸盡籍於官。均贍僚屬。構東西樓。刻經史列其上。廟街湫隘。益市地闢。其斜側又市廬舍三十餘區。居諸學官。諸生貧者給贍。死者賻。不自私。請進宋儒楊時從祀。斥元吳澄。具奏言。國家聚英材教育之備。任使卽選諸科貢。尤恐未精。况邇年來開納粟納馬之令。利未什一。害已千百。彝倫之堂。爲錢奴交易之地。乞禁止以清源。具條教人斂財之法。以上而懋欽順亦疏言。臣聞官不必備。惟其人。今在監諸生。

不過七八百人。而博士助教正錄等官。乃至三十餘人。皆糜餼廩爲國耗。況各官爲諸生表模。風憲有缺。例於中選授。則又風憲之儲也。乞敕部參酌裁減。遇員缺行。令撫按提學官推選學官。中學行超卓訓誨。有方者奏補。毋苟爲備員。洪武永樂中。生徒動以千計。類多俊少。而教養之法。至爲周詳。以通經積分而出序。故其時布列庶位。類多得人。今歲貢非無可學之資。而衰遲不振。十常八九。舉人下第。當入監者。宜及時作養。顧往往竟自回籍。虛糜歲月。故差撥不敷。教養難效。本末悉病。臣愚欲行選貢之法。不分廩增附生。令提學精加考選。務行著鄉閭。學通經術。年富力強者。以充通計。天下約取五七百人。分送兩雍。下第舉人。寬其遠限之科。而要以坐堂之實。實坐堂一年之上。方準會試。庶生徒充備而材有所儲。上善其言。先是時禮部言。學校端本澄源之地。孟子切切於義利之辯。誠恐學者利蠹其心也。近年學校生員。聽令納馬納牛納草納米入監。殊非教養本意。且前代雖有入粟補官之法。而不用以補士子。爲士子者。知財利之可以進身。則無所往而不謀利。或賈或舉放。或取之官府。或取之鄉里。視經書如土苴。而苞苴是求。棄仁義如敝屣。而貨財豐殖。士心一蠹。則士氣士節由此而喪。他日致用。何望其有補國家哉。自今伊始。雖有邊事緊急艱難之處。亦不許以此項出身。若再開端。言官糾正之。用以端士心而美風化。非小補也。制曰可。然是時科舉所取士。專一經。輒白首。餘經史付度外。而學專而識益陋。而郡縣學列官闕冗未論。卽勤恪其職者。亦獨嚴其爲課試。蕪爛不經之文。蓋程朱沒自是。且數百年矣。諸濂洛之微言大義。既絕。佔俾循習者。非心到自得。徒空言。乃言理爛然。卽童子諳之。又俗日漸於文。而異時所崇尚性理。或問

諸書習久而厭。頗以爲樸學弗好也。於是諸高明雋異之士。顧多誦習先秦兩漢之書。爲文章嫺美。士爭歸往。而學士王鏊議以爲宜別立一科。必兼通諸經博洽子史詞賦者。倣古制科之選。冀以收非常之士。其反本近實者。爲窮究物理之學。顧蠶絲牛毛。禁詰汎遠。而卒無從入也。乃時陳獻章以自然爲宗。以忘已爲大。以無欲爲至。至以勿忘勿助之間爲訣要。而王守仁爲良知之說。與大學古本誠意特傳之旨。廣爲敷說。士多翕然。受學至數千百人。而論者皆訾之。尋呂柟爲祭酒。條監規疏言。歲貢入監。卽古鄉舉里選。六德六行六藝之士。故禮稱四十強仕。道明而德立。近年歲貢中有二十上下者。其德行焉考。甚且禮讓未閑。遇事興爭。各提學官惟取詞章。不顧行檢。遂使質樸淪墜。乞敕提學官當歲貢期。於食廩年深二三名。遵照祖宗臥碑。參取德行。必註其平日某德某行。縱無完人。庶幾近實。所校文惟取其不悖經傳。理明詞達而止。不專於富麗。有奇怪難讀者。俱從黜落。遐荒鄙邑。亦取士以充用。昭聖明一視無外之意。又舉人入監。本以觀光皇極。薰陶德性。今稽在監實數。以天下之廣。僅止二三十人。蓋自會試之後。支稱他故。奔還原籍。有志者固不廢學。餘多交際郡邑。開治產業。侵陵鄉曲。比及試期。方攢監簿。計水程。用規撥歷。未仕若此。居官可知。乞敕禮部。移文行取。嚴違限作曠。計月加曠。若不許會試之條。庶士類知儆。衆向於學矣。納銀例貢。近奉欽依。聽其依親原籍與考科舉。此以待志士可矣。其無志者。一旦還里。抗揖守令。兼服商賈。肆行鄉閭。他日入官。殃民非淺。乞敕禮部。將依親者各行提學官考行業類報。其逃監及患病給假三月之外。許臣查治。重則奏報。削其名籍。夫士必知古。斯可通今。儀禮一書。乃成周致太平之具。世

行高堂隆所傳十七篇。宋儒楊復爲之圖解。皆可習行。近臣等選諸士按圖學步。自冠射鄉燕。至士相見。諸儀使士子閒於周旋進退之節。養其中正和平之氣。而此書稀少。靡所正據。禮樂諸器。舊多未完。乞敕該部重刊。并造禮樂諸器。以便諸生游業。準古大雅鼓鐘周禮樂語之義。上善其言。世宗初載。垂意於興學明禮之務。製敬一箴。註宋儒程子四箴。范浚心箴。頒天下儒學。風士於正道。其敬一箴曰。人有此心。萬理咸具。體而行之。惟德是據。敬焉一焉。所當先務。匪一弗純。匪敬弗聚。元后奉天。長此萬夫。發政施仁。期保鴻圖。敬怠純駁。應驗頓殊。徵諸天人。如鼓答桴。朕荷天眷。爲民之主。德或不類。以爲大懼。惟敬惟一。執之甚固。畏天勤民。不遑寧處。曰敬惟何。怠荒必除。郊則恭誠。廟嚴孝趨。肅於明庭。慎於閒居。省躬察咎。儆戒無虞。曰一惟何。純乎天理。弗參以三。弗貳以二。行顧其言。終如其始。靜虛無倚。日新不已。聖賢法言。備見諸經。我其究之。擇善必精。左右輔弼。貴於忠貞。我其任之。鑒別必明。斯之謂一。斯之謂敬。君德旣修。萬邦則正。天親民懷。永言厥慶。光前垂後。緜衍蕃盛。咨爾諸侯。卿與大夫。以至士庶。一遵斯謨。主敬協一。罔敢或踰。以保祿位。以完其軀。古有盤銘。目接心警。湯敬日躋。一德受命。朕爲斯箴。拳拳希聖。庶幾湯孫。底於嘉靖。蓋先天下以聖學如此。於是大學士璉疏科目之弊三事。一正文體。復平實爾雅。二明實錄。錄必生儒。試文毋有司潤色。三慎考官。各省鄉試命翰林科部有學行官主考。京官分考。勿苟用教職卑闕。使權歸外籛。而大學士尊疏。修明學政。請敕學校官敦本抑末。進農民之秀。重居鄉之行。及習古禮樂節。以端養正之本。辭多迂難行。上用璉議。詔吏部考察天下提學憲臣不勝任者。改調罷斥。蓋勵有存者。尋詔

禮部沙汰天下生員。不許附生過廩膳增廣之數。而視聽一新。人多駭譁。是時世勳多驕肆。禮部上議言。而公侯伯各爵。先年各依父祖。或翊運靖難之元勳。或椒房戚畹之族屬。朝廷推恩。許令世襲。有賢能者。又獲世官。崇報之典。極爲優渥。但人生資稟既殊。好尚不一。況此等子孫。多失豫教。成立之後。鮮克繼承。雖有祖宗訓誥。武臣之舊章。累朝教育嗣後之良法。皆廢閣不行。難臻實效。合以名爵未三十者。送國子監習讀小學四書。武經七書。御製武臣大誥。及臣鑒五倫諸書。涵濡其德性。每十日則赴團營習射藝弓馬。果有成效。然後推用。儻有因循怠惰。及荒淫邪佞者。與處則罪罰之。制曰可。詔正祀典。尊孔子曰至聖先師。孔子四配。曰復聖顏子。宗聖曾子。述聖子思子。亞聖孟子。殿東西十哲。兩廡從祀諸弟子。曰先賢某子。左丘明以下。曰先儒某子。建啓聖祠。祀聖父叔梁紇。曰啓聖公。而以顏無繇。曾點。孔鯉。孟孫氏。配兩廡。黜申黨。公伯寮。顏何。荀況。戴聖。劉向。賈逵。馬融。何休。王肅。王弼。杜預。吳澄。十四人。增祀后蒼。王通。歐陽修。胡瑗。陸九淵。五人。而林放。蘧瑗。鄭衆。盧植。鄭玄。服虔。范寧。七人。各祀於其鄉。歷代所追崇先聖先賢儒公侯伯之封爵並革。先是國初祭酒吳沈上孔子封王辨。言褒之以王之貴。曷若事之以師之尊。而宏治中少詹事程敏政會上章。以爲荀況言性惡大悖。洪武中從祀黜雄。況雄實相伯仲。言者欲並黜。況宜也。申根申黨本一人。止宜存根。家語弟子不及公伯寮。秦冉。顏何。蘧瑗。林放。宜祀瑗於衛。祀放於魯。寮及冉何宜並罷。禮記傳於后蒼。與王通。胡瑗。皆宜從祀。顏淵子思配廟殿。而父坐庭廡。非禮。宜別祀啓聖祠。下禮官議不可。而祭酒謝鐸抑又言。宋儒楊時。息邪放淫。承孟氏之傳。衍晦翁之派。雖晚年一出。不克盡行其

志而力闢新經。足衛吾道。若吳澄生長於淳祐。貢舉於咸淳。受宋之恩。已如此其久。爲國子司業。爲翰林學士。歷元之官。乃如彼其恩。跡其所爲。曾不及洛邑之頑民。何敢望首陽之高士。況二人皆太學之師。乞升時附宋諸賢。斥澄下從莽大夫之列。乃追封時將樂伯。從祀。而澄祀如故。夫澄之祀於永樂八年。從士奇言。追封爲臨川郡公入廡。蓋以文其從燕之非也。至是乃盡如數人言。嘉靖九年。從大學士璉議。撤諸塑像。易木主。改大成殿曰先師廟。大成門曰廟門。東西十哲。則閔損。冉耕。冉雍。宰予。端木賜。冉求。仲由。言偃。卜商。顓孫師。東廡則澹臺滅明。原憲。南宮适。商瞿。漆雕開。司馬耕。有若。巫馬施。顏辛。曹卹。公孫龍。秦商。顏高。壤駟赤。石作蜀。公夏首。后處。奚容蒧。顏祖。句井疆。秦祖。公祖句茲。縣成。燕伋。顏之僕。樂欬。狄黑。孔忠。公西蒧。施之常。秦非。申根。顏噲。穀梁赤。高堂生。毛萇。后蒼。杜子春。韓愈。邵雍。程顥。司馬光。胡安國。張栻。楊時。陸九淵。許衡。西廡則宓不齊。公冶長。公皙哀。高柴。樊須。公西赤。梁鱣。冉孺。伯虔。冉季。漆雕哆。漆雕徒父。商澤。任不齊。公良孺。公肩定。鄒阜。罕父黑。榮旂。左人郢。鄭國。原亢。廉潔。叔仲會。邾巽。公西輿。如。陳亢。琴張。步叔乘。左丘明。公羊高。伏勝。孔安國。董仲舒。王通。周敦頤。歐陽修。張載。程頤。胡瑗。朱熹。呂祖謙。蔡沈。真德秀。而上親著論言。朕惟孔子之道。王者之道。其德王者之德。功王者之功。事王者之事也。乃位則非王者之位焉。孔子沒。唐元宗薦諡曰文宣。加以王號。至元又增諡爲大成。夫孔子於其時諸侯之僭王者。作春秋筆削而心誅之。今不體其心而漫加其號。名雖尊崇。實目之爲亂賊之徒也。近禮官議增樂舞八佾。籩豆十有二。上擬於事天。孔子如在其肯享之乎。孔子曰。名不正則言不順。言不順則事不成。而禮樂不興。

夫既以王道之名。橫加於孔子。故使顏回曾參孔伋以子而配食於堂。顏路曾皙孔鯉以父而從祀於廡。綱領紊而百目因之。豈不信哉。今不正滋來世之非道。苟謂朕以位而凌先師。非知朕心者也。於是上謁廟。服皮弁服。用特釋奠帛。迎送神。各再拜。定樂爲三奏。舞六佾。已給事中張九功。楊廉解。一貫。御史楊瞻。樊得仁。及都御史姚鏐。參政許讚。前後建議。請以本朝故禮部左侍郎薛瑄從祀。下百官議。禮部尙書嵩。極稱其所著書。格言要論。體認密切。踐履真實。立朝行己。風概卓絕。有功名教。可謂豪傑之崛起。聖門之宗裔矣。而春坊唐順之上議。言瑄之宜祀者三。又言。或又以爲宋儒之賢。若尹焞。羅從彥。李侗。黃幹。皆不得與祀。今瑄所得。未知與四子孰賢。宜不得而獨進。臣則謂自濂洛倡道之後。羣儒連茹而出。耳目薰染。故興起爲易。瑄崛起絕學之後。其樹立爲難。侃侃數百千言。詔需後。自永樂尊顯宋學。天下士守朱晦翁所注經。如金科玉條。不敢少抵忤。而王守仁者。立言時與朱異。而諍論始興。又聰明卓越。不拘故局。方往往爲有方士所深疑。又號召同學幾千百。和任人嫻訾之。尋功高羽衆。而謗議大興。嘉靖初。南宮發策。斥爲僞學。欲焚書申禁。及起平思田道卒。吏尙書尊疏奪贈廕卹典。下詔禁其學。亦有言其學不詭於聖人者。皆不報。隆慶初。大學士階當國。詔用言官請下建議。進侍郎瑄。及新建伯守仁。從祀孔廟。而先後言官論互異。獨進瑄。瑄無訾者。萬歷中。御史詹事講理前議。請進陳獻章。又守仁下廷議者。復互異。上曰。守仁議論。大約與宋儒互發。何當因彼廢此。卽集議歸一。上毋紛紛奏。部覆議。獨請祀布衣胡居仁。於是輔臣上言。守仁言多致本大學。言良知本孟子。獻章言主靜。本宋儒周程。宜祀。而守仁則純心篤行。輿論久歸。

宜併祀。上曰：祀之。二十六年，國子學錄張養蒙奏言：孟子之父不得概曰孟孫氏，蓋訛傳。懿子何忌，非軻父也。宜改書先賢孟激公，而懿子賢應從祀廟廡。諸如林放、蘧瑗、蔡元定、周輔成、張載之父，皆有宜祀之議。上是言。言卒不行。始明初及盛時，重國子儒宗之選，祭酒司業必簡翰林夙學有碩望者以充。諸體嗜遷秩與他司絕等。卽博士學正錄學博行修者，亦往往補館職。列坊局已乃置內臺。當是時，國學生非強學登科，非積分至十餘載，升上館。乃後使歷事敍選而任官。其後進士科目益重，舉人下第者冀後舉，引他故自便，不以時入監。通歲至監者曾不能數十人。歲貢生類衰頓，願就教爲祿仕計。通天下郡縣學歲貢入監者，視異時十不能三四。其後納粟納馬入監之例啓，而國學愈湮。初例開時，猶提學官試文理通而後聽。後彌弊濫，郡縣學停降增附若斥退者，及民間白丁子稱俊秀，得納銀齒於學。於是商賈之子，牛角之童，以及遊蕩愚不肖之輩，或混迹其中。士恥與爲伍，而虎鬪重地，曾不若郡庠。邑序爲猶稍有推擇也。又法齒學者無斥退，於是淫朋僻友，特蓄聚自恣，蔑繩法不守。卽有教無所施，雖司成隆重，不異疇昔。而養望需陟，頗不屑督迪。南北監諸教官，顧獨類剩員，資敍漸下遷，多寬縱取妄說。而太學特爲出身之塗矣。舉人官生入監，僅六月以上，歲貢生僅八月以上，援例者亦不過終歲卽序撥。而司教者雖欲遲之歲月，冀復游於學，不能也。而國家大壞，方明初特重督學使者之選，兩畿用御史，省用按察。類皆採名流，國盛時未論。卽正德末，御史蕭鳴鳳懲惡嚴，雖才不貸，副使魏校敦行急，受欺不悔。至如李夢陽之伸士節，振萎習，士誦義不休。而李化龍、李堯民、左光斗之扶善類，懲兇頑，藻鑑澄序，不爽分寸。蓋其尤也。其後

督學稍稱輕。柄其任者非必有卓行實學。厭士心如異時。高者虛談沽譽。劣者安祿養交。下者至開侍門。聽托不忌。又巡歷或三四歲。乃一至。至不過浹旬月。獨品所爲校試。一日文而止。不復關行能。考察他道。藝卽甄考德行。亦按下所申報。多勢豪富厚及好交結官長者。乃獎賞之。不復有案質。甚乃憚巡行勞苦。獨高坐引日月。至大比。乃委府州縣彙考而合試之。故士習剗而人驚於奔趨。始重學官之選。往往取者。儒夙學以充。後科目法行。取舉人登副者。選授。凡國家推選坊局。纂修典籍。會試校文。必與焉。其經保薦。及九載處優考者。類得晉翰林科道部曹官。於陟陞無等。故廷臣薦士。以起家學官爲美談。後久剗弊。師儒之職益輕。副榜舉人不屑就。而歲貢生年稍邁。若貧困甚者。乃甘心焉。因取充位。精力倦於鼓舞。而學術紕繆。無能爲諸生先。於是奔走有司。結富豪以苟得。而於月考課及上下三等。簿率以貲。不復問行能。蓋穴蠹甚矣。弟子員各以其意散處書院。若寺觀相師友。獨月朔望一詣學。後竟不至。而講課寂然無聞。當明祖宗多勵精功名。赫然以經術作人。令研磨義理以檢身心。文主典質。諸剽老莊釋稗浮華言。若獵奇鬪異者。不錄。後文治漸開。自弘治迄嘉靖初。最盛程式文。及名家作者。類精義雅辭。有爛其文。後學校所取士。遺棄典實。獨取輕俊。卽戾經畔義者得錄。又學無師法。經有成說。講貫相通。卽稗子能之。業之者以爲取足行文而止。於微義奧辭。固無俟深解爲也。於是窮年畢力。獨取進士科高等課試之文讀之。他經史未諭。卽異時所業專經。亦簡棄不讀。祇翦截科場中可爲試目者。爲擬題構文。已然者輒效。輾轉摹擬。習益靡濫。又後天下言文者。宗史漢。言學者涉莊列。佞佛。而經生亦競掇勦諸唾餘。以投之。豈必心解。

特弔詭倖徐而考之中無深解而季年復汎濫於諸子諸子不已乃鑿空割裂謬爲不可解之語轉相騰寫自亦不能道其意一掩題目終篇不省所道何語禮官所謂青天白日之下爲魍魎魘魅之談也又少俊多得雋用倡狂自恣輕忽長者傲慢同列甚乃淫營酣歌伍俳優不恥而視曲謹老成者爲腐而嫻之不復憚名義遵檢押如異時彼以國家設科取士直爲利祿資一旦效高第取右職試官異時業棄如弁髦卽夙昔受學師升沈稍異忽若途人長躁進之心傷揖遜之美而風俗大潰當是時天下學士講學者亦不復知古六籍四教遜志游心成德達材之盛取近儒一二激世之論如所謂六經糟粕須焚書一遭之語爲至言倡天下於師心自用而名世高虛之士至圓靈自詡蔑棄修學混楊墨老釋於一途揚波助瀾仕競苟得居營口實而復呼朋引類聚於一隅談刺朝政納賄賂名雖持公議而獨懷私以自雄卒與國運終嘻黨人因一二成節烈名者遂謬附之而儒風大壞方萬歷初輔臣白降詔申飭改故所給提學官敕以經術造士爲實學禁剏書院標門戶聚黨爲空談重國子監及畿省提學使者之選諄復遣然不能有救也明初兩雍貢舉諸生特盛貴游子弟不得輒錄宣德後頗有陳乞聽上裁可仍令勉學從科舉出身成化初始詔大臣子弟入監及後益滋雜凡死王事及經筵儲邸講導之臣皆敝廕而邊境漸多事假功廕皆曰恩生於是執袴弁胤及鬪擊咸齒於學而國學益禁濁矣天啓中宦官肆惡急邊功殿工用匱乏搜括閭左無遺策而給事中解學夔希旨奏革諸師生廩餼及優免丁糧徵解充餉料諸生多不能存無資身術遂去就戎馬嗣後助邊者游泮曰遼生助工者曰例生皆井市無賴混庠序而督學使者

復多匪人。蠅羶鼠汁。貪汙不可名狀。卽厮隸下賤。予數十金。輒青子衿矣。而學校之崩頹。與國運俱。嗚呼。惜哉。孔子曰。其或繼周者。雖百世可知也。不能不致歎於斯云。

明書卷六十二

志九

選舉志一

史官論曰。自鶴書眇降。蓬桑棲冥。猿嘯空聞。荔服不蒸。賓興弗駕乎三物。而深山徒抱乎四術。漸至人智。狡捷。聘乖名實。多端而進。紱綬滋淆。勢不得不出於科目。歷代選舉。雖間出異途。時獲名彥。而後終不越此。明之初。翹車賁帛。執德旁招。上懸藻冰之鏡。下蘊撞鐘之鳴。連茹以升。遂成郅治。漸陵替莫。究詰也。遂終其世。重進士科。名碩輩出。建伐銘彝。三百年不變。然而邱園駒逸。時下千旌。術藝殊流。或糜榮祿。行多弗效。窮則思歸。而入官之途。雖云有歲貢。恩選。官廕。援例。雜流。胥吏之岐。則得賢之盛。亦終不越此。至於量材之授。黜陟之嚴。則至明而犛然大備矣。若夫偃仰堯曦。矢歌商頌。又非所論於英乂登庸之會也。是篇略載累朝求賢人。飭官方遺意。而詳資格銓選考課之制於終篇。

明太祖初興。求賢惟急。下金陵。卽令有司舉賢才。武略之士。得賢者賞。濫舉及蔽賢者罰。尋令有司曰。上世帝王。創業用武。以安天下。守成講武。以威天下。而經綸撫治之寄。則屬之文臣哉。茲設文武二科。以廣求天下之賢。應文學者。察言行觀德。考經術觀業。試書算觀能。策經史時務觀政。應武舉者。先試韜略。次

騎射俱求實效毋虛文。有司其中勸秀民及智勇之士。豫及時勉學以俟舉焉。洪武元年。下詔曰。向干戈擾攘。疆宇未一。養民致賢之道未講也。獨賴一時輔佐之功。匡大業於底定。山林巖穴。念豈無懷才抱德之賢。何隱而不列也。豈朕政令靡常。國無法守歟。抑刑辟煩重。人懷其居歟。抑朕寡昧。事不師古而致然歟。不然。賢士大夫幼學壯行。欲堯舜君民。豈固甘汨沒而已哉。今天下頗定。方將興諸儒講明治道。以沃朕心。巖穴之士。能以賢輔朕。以德濟民者。尚不吾棄。三年。詔曰。朕特設科舉。起天下抱才懷德之士。務在經明行修。博古通今。文質相副。其中選者。朕將親策於廷。品學識命官焉。超衆者顯擢。使中外文臣。一皆由科舉而進。非科舉者不與。六年。詔科舉取士。終浮文。罷不設。令有司察賢才。先德行。次文藝。舉用。又諭吏部曰。古之帝王。若商高宗。若周文王。皆皇皇於版築鼓刀之賢。豈其智不足哉。以賢才不備。不足以爲治也。鴻鵠之遠舉。以六翮。蛟龍之騰躍。以鱗鬣。人君之能致治。以賢才爲之輔。今山林之士。念豈無德行道藝之賢。其令有司採舉禮遣。赴京師。朕將任用焉。十三年。吏部奏天下郡縣舉聰明正直孝悌力田賢良方正文學材幹之士。至者八百六十餘人。十五年。至者三千七百餘人。而復敕天下來朝官各舉茂材一人。尋以汎濫。復行科舉法。命禮部頒科舉新式行焉。是年。詔天下方面有司舉秀人才。必會同境內耆宿長者。訪求德行道藝著聞州里之人。以充從鄰里保結。命有司驗實。蓋科薦並行也。十九年。詔郡國舉經明行修之士。諭禮部曰。比有司舉士。置耆年宿德不問。而拔少俊。覲後恩大諄也。昔周文用呂尙而興秦穆。遠蹇叔而敗伏生。旣老白首傳經。豈可概以髦老而棄哉。今郡國所舉士。年六十以上者。置翰林備

顧問六十以下者。於六部及外方面用之。因語吏尙書曰。吏部名鑒衡之司。言鑒明衡平。卽物之妍媸。輕重無遁也。政事失得在庶官。庶官賢否由吏部。吏部得人則政理民安。非人則瘵官曠職。爾等居持衡秉鑒之任。務平明甄辨。毋苟充□。當是時。天子寤寐英俊。以闢治統。輪旌束帛。交馳乎四方。先是初定金陵。辟儒士范祖幹葉儀。旣至。訪道祖幹。手大□以進。曰。具不出此。克婺州。置行中書省。召儒士許元胡翰等。日會食其中。輪二人講經史治道。克處州。以書幣徵宿儒宋濂。劉基。章溢。葉琛。以來。至入見。上喜甚。曰。我爲天下屈四先生。命有司創禮賢館處焉。晚徵耆儒鮑恂。全思誠。余銓。張長年。入見。年皆七十餘。上悅。命坐。顧問者良久。並命爲文華殿大學士。恂等固辭。上曰。卿等年固高。朕不欲煩以政。故授今官。以輔導太子。免蚤朝。日晏乃後入。不久且從。卿志庶無負。卿生平爲鄉里光重。其勿辭。恂等求歸益堅。乃賜敕禮遣之。時孝廉人材及郡縣學所貢士。若富戶耆民。皆得見。見稱旨。卽擢不次。而國子生奉命巡列郡。廉官方吏治。問民所疾苦。還稱旨。卽擢用爲行省參政僉事。知府等官。至有擢僉都御史者。上嘗幸後苑。見巢鵲翼子。喟然歎曰。誰無母子。羣臣親老者。聽予告歸養。當是時。優百官俸。賜百官田租及衣帶鞍馬。復其家。給丁憂官祿。尤重省府州縣親民官之選。每之任。召見賜綺帛路費而遣。已患雜流用爲民患也。命國子擇諸生通經術者千人。送部銓選州縣官。賜遺有加。乃作到任須知。俾除授者。就銓部領憑訖。關須知讀。旣至官。畫事遵守。毋具文。上若曰。咨爾志人未官。厥有受任。應付之事。厥知者鮮哉。誠緣是綱。領熟復以思。卽諸事立辦。脫厭怠弗省觀。卽聰明過人。於績用罔成。夫經書備修身爲治之道。爾志士業且講習。

之矣。況此書近易易知。而爲官要幾具在。尙切磋究之。勿忽其條目。首祀神。次恤孤。次獄囚。次田土。次制書。次吏典。次倉庫。次會計。次公廨。而諸如建學舉士。興廉讓。厚風俗。旌孝節。尊高年。諸興利祛弊。列爲三十一條。至官十日中午。報須知如式。其不依式爲繁文。并遷延不報者。以違制論。尋下恤民救及頒諸司職掌於有司。三歲入覲。諸司府州縣官。照須知款式造文冊。并所守地圖。若原領敕諭職掌上之部。應廢置。部奏黜其不職者。而定留用官爲三等。其廉能愷悌。治行卓異者爲上等。召見獎勵。賜坐宴。其稱職無過爲中考。宴不坐。有過不稱職爲下考。不與宴。屏立已於事而退。蓋甄別如此。洪武中。制敕布政司理所屬府州縣官。察勤惰。辨廉汙。綱舉須知內事目中飭行。其頑慢不法。貪汙玷忍者。迹實奏上。按察司理布政司府州縣屬。務振風紀。汰宿弊。綱舉須知內事目。察督之。以肅清一方。儻耳目有所不及。精神有所不至。遺貪官。汚吏。暴民。仍縱者。巡按御史究治。而府臨州。州臨縣。縣臨里甲。務綱舉如章。尋諭廷臣言。古爲四民。四民中惟士爲最貴。而農爲最勞。士讀書明道理。出爲君用。享天祿。故貴。農鷄鳴而起。春耒耨而耕。耕而種。種已而耘。夏冒赤日。悴形神於芟耨。比秋成。輸官於所餘無幾矣。遇水旱荒札。故舉家受饑寒。士入官享祿。委民艱於莫聞。又重侵漁之。亦獨何心。於是命戶部以米計文職官品歲俸給之數。又計田畝歲出穀之數。與農用力多寡之數。爲之書。命之曰醒食簡要錄。頒中外。俾食祿者知所以恤民。已上謂吏部言。朝廷懸爵祿待天下之士。惟賢是用。何可以資格限也。資格者。獨以爲常流設耳。自今庶官有才能居下位者。不次用。於是召萊州知府修尙書兵部。明州知府文昇尙書工部。是時宜興主簿王復春守公不

奉上。上聞。遣官齋手敕往勞慰。卽擢爲同知。新化丞周丹蒞官。有治行。考最。擢考功郎。新化民詣闕願復留。詔復任。禮部宴賞之。而遣。其時馭下用重典。有贓罪。懷印綬未煖。輒被逮去。非謫戍卽誅戮。羅天下之制甚周。而不爲君用之法。亦特峻以深。弛張閤闢。以鼓鑄天下人才。不循法。故居職惴惴。恆恐不能奉法恤民。以稱塞上意。百職釐舉。亦頗工文移。苟幸塞責。其不願爲材者。至陽瘡爲癩。借名他屍。以違難。而猶不免也。蓋一主於用人。諸所定貢舉銓選考課之法。頗參前代之制。而詳擇其中。然不專倚也。制科舉諸明經宏詞等科。並革存進士一科。與薦舉歲貢爲三途。以並用。三年大比。而賓興之。其經書各有主說。三場備理道時務之言。蓋欲酌文質之中。而用焉。其會試。士天子御正朝策策焉。又明日上具皮弁服。御正朝。集羣臣。臚鳴訖。羣臣前拜賀。卽六卿宣制。無是也。故進士科特重。其會試不中式者。送國子肄業。俟又舉。屢舉不第。以舉人資格入官。府州縣歲各貢其廩生。赴禮部試。試中補國子生。亦有願就教職者。旣入官。銓選考課一歸之吏曹。銓選屬文選。考課屬考功。諸選人進士舉人歲貢外。有官生。功生。流資外。有吏員承差知印書算篆書譯字諸雜。各釐其品。而銓。凡選歲。引選六。類選亦六。遠方選二。朝覲之歲。揀選一。選之日。試策論判。若文移。引見日。考觀其身言。其歲貢選教職。無常期。殿試後。進士觀各衙門。政。命選庶吉士。會翰林禮部。選御史。則會都察院。而內外官任職三年。則給由。曰初考。六年再考。九年通考。部奏請綜其稱職者。平常不稱職而黜陟之。陟無過二等。諸京官五歲。五品而下。考察其不職者。爲民間住致仕有差。四品上。自陳聽去留。外官以入覲之歲。吏部會都察院考察其不職者。亦如之。內外有勳

章考功品其良不肖。贊尙書定去留覆上。大臣自陳。下亦如之。而六科都察院糾官邪吏弊無時。建文卽位。詔舉優通文學之士。定銓選法。通類覆奏附選。其制精詳。其文無傳焉。太宗入爲皇帝。申敕百官。於吏部尤諄重。略言朕以眇躬。纘承大統。圖惟求賢。以資治理。宵旰遑遑。急於饑渴。其令內外諸司。於羣臣百姓中。堪重任而沈滯下僚。堪繁劇而優游散地。抱道懷才而隱田野者。各舉所知以名聞。毋媚嫉。毋蔽賢。毋徇私濫舉。又諭吏尙書曰。銓選當各隨所長。才優者治事。德厚者牧民。各有稱也。有才者不必皆君子。有德者必不同小人。爾必戒之。已又言。吏部選授守令。出一時銓注。豈必盡才。必精考察。然後其賢否可知也。其令巡按監察御史及按察司精考郡縣吏。自蒞官半歲以上。各貪廉能否之實。以聞。時御史出按者。至郡邑坐行臺。輒召郡邑諸生及在官人役立詢之。具報上。上嘗謂尙書義曰。往命御史考察外官。欲任賢退不肖。庶幾民受其惠也。今御史不周諷。惟卽在官數人之言定賢否。論何由公。吏固有勤職業。必刑罰。爲小人所忌畏者矣。亦有貪贓賄。低首下氣。依阿澆忍。爲小人所安利者矣。如其詆誣而罷退之。以其保留而進用之。黜陟詎有當乎。宜嚴戒飭務盡公。毋枉毋縱。已用尙書義言。在京文職七品以上及近侍官。外任五品以上及縣正官。舉所知五品以下官。及軍民有賢良廉幹堪牧民居風憲者。各一人以聞。部驗實。以舉者多少爲差次擢用。其保舉非才。授職後闕茸貪婪者。舉主連坐。上嘗御武英殿與侍臣言。人君進退不可苟。必須服衆心。若進一人而天下皆知其善。則孰不爲善。退惡亦然。若私愛而進。私惡而退。將何以服天下。迨仁宗卽位。首申重舉官之令。謂廷臣曰。君以求賢爲務。臣以薦賢爲忠。人才大小

皆有所用。天下之廣，豈無皋夔顏曾之徒，誠得一人，可勝千百。宜悉心訪之，又敕在京七品在外五品以上官，及知縣舉賢才未仕者，淹下僚，德性醇篤，行止端方，材能文學出衆者，覈實薦舉聽擢用。濫舉若蔽賢者，罰當時既多舉者，用不效，復敕朝廷數下詔求賢，而奉行者徇私，或以賄賂，或以親故，得實材無幾，政將何由理。民何由安。其自今嚴舉主連坐之法。諭尙書義曰：天下治亂繫庶官。唐太宗書刺史名於屏風，朝夕省覽，有善政疏其下，故庶官效力，致斗米三錢，外戶不閉，甚盛。皇考亦嘗書中外官姓名於武英殿南廊，至慎重也。今府部官，朕朝夕繼見，得詢察其賢否。若各省都布按三司官，乃旬宣大臣，隆重矣。而朕多未親識其人，又不悉其姓名，卽聞其賢否，邪正久不能省憶。臣工善不善而上忘之，於勸戒何有。吏兵二部，其具各官姓名履歷，揭西序。朕得親品隲焉。尋又諭曰：御史朝廷耳目，非老成識治體者不任。新進小生，遽授斯職，未達於治，而操得爲之權，遇事風生，以喜怒爲威福，以好惡爲是非，甚者貪穢狼籍，賢人君子正直不阿者，往往被其陵挫。小人阿順從諛，則興爲膠漆，於政事得失，軍民利病，略不省識，亦烏在其爲耳目也。爾吏部自今慎遴擢，以清風紀。是時武臣專邊閫多恣，而事易墮，上慨然以爲武臣疏於事理而專軍，非法也。命選任方面官於各邊參贊軍務，治章奏，督糧儲，文臣協贊提督自此始。尋擇御史銜命行天下，察吏治，上臨軒口敕之，以爲國以民爲本，比牧守多貪忍爲尅害，民不聊生，故遣爾等分道考察。然人才器不同，有專爲脂韋諂媚而失政殃民者矣，有沈靜篤實，不善逢迎而簡易得民者矣，有虛刑巧取索而能集事者矣，有廉潔自守而政務不舉者矣，必究實，毋惑流言，毋屈勢要，毋私親故，具聞糾

舉賜鈔而遣。又命擇國子生有學行者十六人。俾翰林嚴試。拔其尤。試六科。尋擢爲給事中。敕文武官有
率差在途。及在任物故者。所在棺殮津送之。還鄉。毋令失所。有父母年七十而上。無他兄弟侍養。若任遠
不能就養者。聽歸養。侍親終日。起復任。其不得離職。願移祿於原籍奉養者。聽職。官年七十而上。膂力愆
不勝任者。聽致仕。有司月給米二石。終其身。文武官非其人。許被害者。赴上。司陳告。若詣闕訴。諸司不得
擅縛辱。如異時違者罪。而朝臣歸展省者。宜給鈔爲道里祠祭賓客費。蓋恩厚如此。而審理俞建輔上言。
爲進賢之路。莫重於科舉。邇賓興率馳騫於空文。真才鮮少。有年未弱冠。卽登第入官。雖甚才敏。然於修
己治人之道。未始辨知也。遽使之從政。必有率意任情。而民受其弊者。請令有司先審訪。博古通今。行止
端重。年二十五而上。方許入試。比試則務選其文辭典雅。議論切實者進之。會試加重慎。庶士務實學。而
國家得仁賢之用。上曰善。已與輔臣論科舉之弊也。大學士士奇言。自古國家兼用南北士。長才大器。多
出於北方。乃南士往往材而浮。上曰然。爲將柰何。對曰。試卷例彌封姓名。請自今外書南北二字。以百計。
南取六。北取四。則南北士皆登用矣。上善之。議且定。而上賓天。宣德以乃奏行著令。宣宗明聖。以長年嗣
位。閱天下治亂之故甚熟。旣踐祚。下求賢詔。出御製猗蘭操。招隱詩。賜大臣以風。而文武重臣咸驩然於
君臣同遊之盛。敕吏部言。朕負荷洪業。思得賢材以圖治理。寢食弗忘。間者敕朝廷三品以上各薦所知。
示以猗蘭招隱之作。庶幾在廷喻於朕志。乃曠日積月。所舉未聞。豈盡無遺賢之可舉歟。何怠忽不稱也。
孔子曰。十室之邑。必有忠信。況天下之廣。民生之衆乎。吏部申諭三品以上。衆推有才行文學者。畢以聞。

又詔曰。君國之道。保民爲先。當春時和。萬物萌生。而吾軍民。曾未盡得所。念何以答天與祖宗基命之意乎。夫布按官及郡縣長。得人則政理民安。非人則害被烝庶。而循資陞授。將賢不肖混淆。吏部移三品以上官。保舉必得廉公端厚。識治體。能爲國爲民者。以充其各處有文學才行出衆之士。地方官具以聞。後有賊私罪。坐舉者無何。大臣奏蘇州等九大郡號繁劇難治。擢郎中況鐘。莫愚。御史何文淵。員外陸本深等。知蘇常溫吉安諸府。上召見。宴勞。賜璽書曰。朕孜孜夙夜。保民圖治。而田里之民。鮮安其生。則守令匪人。恣肆貪刻。或闖茸庸懦。坐視民患。爲蒙蔽也。將下情何自上通。上澤何由而下施乎。今特簡爾等付之列郡。夫方千里之民。皆爾繫命。宜體朕心。以保愛爲務。察其休戚。均其徭役。興利除害。同其好惡。使衣食有資。禮義有教。莫毋玩毋愒。毋事苟簡。毋爲權勢所脅。毋爲姦吏所欺。凡公差官員有違法害民者。聽具實奏聞。所屬僚吏。有作姦犯科者。聽自提問。爾等宜奉職循理。終始不違。以無負朕委任之意。命乘傳行。益嚴吏治。敕部謂天下有司。有能清正忠君愛民。政治卓異者。具奏其貪酷壞法爲民怨苦者。逮赴京罪之。而上時諭吏尙書郭籛曰。朕以用人之柄付卿。卿當爲朕擇才。昨郡守缺。使廷臣共舉。古之人當斯任者。必勤於訪問。有得則錄。故官不乏才。呂蒙正之夾袋。虞允文之材館錄。是矣。自今留意焉。復言。自仁宗以前犯罪者。已屢經赦宥。其子弟果有才行文學者。聽保舉選用。已而有舉軍餘者。吏部言舊無舉用武人例。上曰。古人出貧賤中。任大事成大功者。多有之。安知什伍中無材能。其召用之。上每念京師乃本原地。澄清所先。而放濁宜飭治也。問閣大學士士奇。對曰。貪風自永樂季年來有之。今爲甚。上問何也。對曰。

永樂中太宗以多疾不視朝。故從官放濫無忌。願先皇帝知之。每欲澄清。上問是時貪孰甚。大學士榮對曰。方賓問今日貪孰甚。曰。莫甚劉觀。士奇曰。風憲所以警肅百僚。憲長貪則不肖御史效之。御史貪則不肖有司皆效之。此放濁所始也。上拊髀歎息曰。嗚呼。除惡務本。問廷臣中今誰可使長憲事者。士奇對曰。通政使顧佐嚴公有威其人也。嘗任按察使及御史有風采。榮曰。是爲京尹能令令必行。上太息曰。願佐乃能如是。居數日出觀巡閱河道。又數日擢佐掌院事。下敕曰。都察院爲朝廷耳目。國家綱紀得人則庶政清平。羣僚警肅。否則百職怠弛。小人橫恣。近年諸司姦弊百出。風憲者不糾。願與合同。卽國經何賴焉。爾剛直廉正。簡在朕心。其竭誠盡力。毋憚夙夜。毋避權要。毋枉善良而縱姦宄。其御史中有廉勤公正。老成醇厚者。留意不達政體。貪淫無恥。若犯賊罪者。送吏部降黜。公差給假丁憂者一體行。如御史缺。行吏部慎選以充。欽哉。於是考察御史不職者二十餘人。削籍。貪汙不法者謫遼左。諸衛充吏不諳憲體者左遷。老疾免。未幾觀官亦罷。已上御左順門。謂侍臣曰。郡守縣令。國家所寄以安民者也。賢不肖混淆。則中材之士無激勸而忘反。吏部職進退百官。乃未聞甄別何也。於是命推部侍郎出巡撫四方。廉吏治。而于謙以御史擢巡山西河南。周忱以長史擢巡南直隸。各地專設巡撫自此始。時上重舉官。大臣奏舉賢能官者。上爲降辭色慰藉。廷臣巽懦無舉薦。降敕責。而司府州縣官亦各得舉賢良方正一人。上之部。後有賊罪連坐。已合臨御來三科進士親試文華殿。拔其尤。授修撰編修檢討等官。進學文淵閣優待之。命內閣考在外庶官有文學者六十人。拔其良七人。歷事六科。而天下郡縣生員年四十五以上者。考選送國

子監令及時進用。其官有贓罪，卽復職嘗所得誥敕，畢追奪。諸鼓舞人材之意溢然。上嘗與侍臣論前代官制，慨然感唐虞稽古建官，惟百夏商官倍之盛也。輔臣以時勢不同對。上曰：唐虞三代事簡民淳，卽不可上擬。至如唐宗定中外官七百三十，去古未遠，亦足以爲法矣。蓋垂意於省官。輔臣曰：官省則民安甚善。然必由君上心清省事而得之。心清則省事，省事而後官可省也。上曰：善。正統初，議者言府州縣官專保舉，則恩出於下，宜循洪武永樂初制，令吏部選除。開學士士奇言：往藩憲二司及府州縣官不得人，爲百姓患苦。以吏部權衡獨擅，聞見不廣，未盡得人。而然宣宗皇帝敕大臣保舉，比多得人。間有一二非才，自緣舉主審覈不精，亦容徇私而所司不行糾舉故也。況所舉官皆吏部審擇具奏，得俞旨乃授，非上尤不得授。恩固上出也。昔唐太宗力行仁義，命在京三品以上官舉郡守縣令，而天下昇平。此其明效。宣廟體祖宗之心行仁政，以用賢爲首務。邇有京朝官闕，茸無藉人，無爲保舉者，遂營爲飛言，欲墮良法。惟陛下幸察。於是詔保舉如故，而嚴舉官連坐之令。尋又下敕言：天下方面官從吏部都察院考察，其屬從巡按及按察司考察。御史有贓濫從都御史各道御史糾察。按察司官贓濫從本司及僚官互察。而吏部初任注選不得除監察御史。京三品以上各舉一人，聽吏部精體訪奏授。蓋特重風憲如此。尋又敕牧民官縣令最親，必得人而後民乃安。近方面郡守由保舉，率得人潔己奉公。而知縣缺員未舉，豈果難其人耶。抑爲例拘不舉耶。進士監生皆國家作養成才待用者，何曾是不省也。自今進士觀政一年，監生坐監三年以上，有學識者由吏員入官歷兩考，廉慎忠厚愛民者科道官各保舉聞，送吏部銓用。又命

在京四品及國子監翰林院並得舉。蓋其重守令也。上每慮各官所薦多浮躁之人。夤緣假託而進。令吏部廉覆。而尚書郭璉因條列言有不合輿論者數人。上曰。舉當者擢用。不當者罰其舉主。遂諭之曰。人臣以薦言爲忠。今有推延不薦及濫薦者。卽以聞。不可有所觀望而遷就。以孤朕求賢圖治之意。已下詔責文武官非舊制濫設。在任官罷軟無能。若老疾不堪使任。及行止不端者。畢汰省。毋糜費廩祿。又復申古三載考績之法。以九年爲滿。中善政著聞者。仍舊任。而增其祿秩。乃用給事中鮑輝言。諸來朝官當如祖宗朝例。有廉能愷悌治行超異者。禮部引奏。賜獎勸。賜衣鈔宴於禮部。吏部錄功狀。俟考滿顯陞。高者至九卿。當是時。薦敷公諸諸司。選慎專之天曹。故其時海內清謐。頗稱得人。及張太后崩。諸大臣有擔當者相繼去國。而王振用。名曰保舉。而進退人材之權。悉移於中官。雖令吏部銓。能自持乎。議者不察。翕翕訛訛。以□舉爲病。何言之過也。景泰初。大臣保舉者多私所親。故爲養交。甚且受賄囑而不得薦者。缺望爲流言。銓部大臣亦頗以銓選權不盡在己也。籍籍誹保舉。於是御史張子初練綱等言。御史從大臣保舉而任。則大臣有過。必鉗口卷舌。而不敢言。其有請囑。必俯首帖耳。而不敢異。願停之以清弊源。下禮部議。部是御史言。歸部銓。尋綱復言。吏部選授私外。請復保舉。大臣以其議偏反。無足賴也。覆上。下制曰。朕期方面郡守得人。共安養天民。令大臣保舉。吏部推選。乃彼此相蒙。官不得人。民其柰何。今後惟布政使按察使缺。令三品以上官會舉。餘吏部訪求。著爲令。英宗復辟。益明習於政治。命吏部擇內外臣僚爲郡守。陞辭日。召詣文華殿親諭訓勞。給鈔爲道里費。而遣。詔處士中有學貫天人。才堪經濟。隱居尙志。不求

聞達者。具以聞。而應詔者有臨川吳興弼。是時上留意於三事。大臣六部尙書若都御史缺。召輔臣密勿簡任。先是正統初。副都御史吳訥言。洪武間京官俸全支。後因營造減折爲著令。祿以寢薄。邇小官不自給。前廣西道御史劉準由進士授官。俸月支僅米石五斗。不能養母妻女。貸同官俸至三十餘石。終死不能償。乞下廷議增京官俸。而國初皂隸供役。後以俸薄放寧家。月徵銀一兩名柴薪錢。宣德中部御史顧佐持憲嚴。以柴薪事被訐。上持章召閣學士士奇謂之曰。爾不舉顧佐廉乎。今其事有無。士奇對曰。有之。今朝臣月給俸實支一石。薪炭馬芻咸資於皂。勢不得不遣半以歸。皂亦樂輸鈔歸耕於官皂均便。京師大小臣工皆然。卽臣亦然。又自永樂來而然。仁宗皇帝所爲議增朝俸也。上太息曰。朝臣之難如此。因怒訴者曰。朝廷用一好官。輒爲小人所排擠如此。召佐以吏所誹狀授之曰。放皂歸耕。使給薪芻。聞京官皆然。不足過。小人誣卿自治之。已復有重囚教囚誣告佐枉重辟不聽理者。會鞠情得上震怒。命磔囚西市。而柴薪皂隸爲著令。太祖制日御晚朝。廷臣門奏事甚悉。輔臣密勿於用人尤謹。每吏部具缺上。或簡除。或保薦。皆公朝傳旨行。永樂中傳旨方賓兵部尙書卽日到任。此簡除也。宣德正統間用輔臣言重保舉之法。景泰初命吏部專行。成化中選授私舛。頌請復保舉。於是命京堂四品以上官具缺上。朕親簡除。而權密下移。廷臣大患之。於是給事中沈瑤等言。兩京四品以上官。陛下親簡用之矣。外方面官。廷臣又保舉。則吏部所司者何事。宜令吏部遇京堂缺。會內閣推。方面官缺。會同三品以上保舉。防專聽之漸便。上命查祖宗時例。得簡除事。大怒曰。此祖宗時舊規。御史給事中顧不欲朕行。豈薄朕耶。是時太監張敏。敏

兒子苗以承差得太常丞。乃傾敏資爲獻。乞侍郎不允。得南通政。而白丁錢奴商販技藝。若豪宦子弟。夤緣內侍進珍玩。輒得官。大者至太常卿通政。不復關吏部。謂之傳奉官。弘治初。以災異汰革。自永樂來。設巡撫官。多用侍郎通政卿丞無常員。景泰中。以風憲官得糾劾庶官。於體統便。畢改都御史。卽尙書侍郎。出督軍贊軍務總邊。必兼都御史銜。名可遣。後官以因事添設而益增。部至兩尙書。而侍郎多不可紀。在後增撫民管屯諸官。而冗滋甚。議者請參酌裁省。詔需後。而吏部尙書王恕上言。考課之法。所以覈官守。彰黜陟。以嚴吏治者也。今被災所在。考滿官。令納米備賑。免赴京復任。造須知功績類繳。臣惟各官廩祿有限。而雜職之祿尤微。苟非取於公。必至剝於下。是使考課法格不行。而貪惰之風日滋也。請自今考滿者。俱給由赴部聽質。尋又言。永樂正統間。天下有災傷。各邊亦有戎馬時。未聞納糧草納銀納粟爲監生。吏員而用足也。乃邇年來。奏開諸例。而諸邊腹裏。遇災旱。輒效尤爲長策。故例進日廣。而正途因壅不行。多者至十五六年不得選。年邁力衰。誰復爲盡心職業。不營歸計。終爲國牧民任事者。又此等今既以財進身。後豈能以廉律己。欲不貪財害民。天下治安。何可得也。臣於元年具奏題止。而部院又題覆請行。是使後雜進人益多。而選法益壅。弊將安極也。旨報可。其後上益精明。習嫻政務。坐煖閣。召吏尙書文升入。面諭以明春當三歲觀察百官。卿用心體訪。明黜陟。以肅官紀。時文升老。上虞其曠也。復諭曰。卿聞未。頓首曰。聞之。聖心留意庶官。爲天下蒼生。此宗社之福。敢不盡心上喜。命中官掖下階。又召尙書大夏都御史。珊至幄中。言卿等與各科道官。諸所陳政務業行矣。然使天下親民官非其人。卽政何自行。民何由被

澤諸陳行文具無益。獨卿等其悉心體訪諸巡撫三司。必慎揀得人。爾珊更慎擇巡按御史。巡方岳黜陟。庶有司得人而民可受福也。大夏珊瑚頓首受命。明年考察竣。加文升少師。召大夏珊瑚入。賜元寶各一錠。謂之曰。日朝覲諸司文官皆閉門示無私通。令如卿二人。卽門洞開。孰從以賂通者。又曰。勿朝謝。令公卿知內愧也。六年。考察竟。宜罷斥者幾二千人。上惻然曰。人才難得。事貴得實。人貴改過。祖宗朝愛惜人才。凡百官考滿平常者。俱令復職。必待九年而後降黜。今或因一人無根之言。而遂革其積勤所得之官。使之泯然不敢伸理。豈治世所宜有哉。令考察官未及三載被黜者聽復任。先是吏部考頗以多黜爲公。方面而下有微瑕輒斥。大學士濬言。唐虞三載考績。三考黜陟。今居官未半歲而黜。又所黜徒風聞不皆實。非祖宗法不便。故有是命。一時見枉者皆喜得直。乃後選者愈壅。而貪殘吏無警。亦益以恣。正德卽位。有以知府獻諛而薦尙書。御史進諂而保太監。其尤甚者。都御史柳應辰爲太監劉瑯保留。江西參政王綸爲太監旌舉。士習大壞。正統來傳奉官旣多。弘治未盡革汰。而時有授予。吏尙書文升言。京官額一千二百餘人。傳奉官乃至八百餘人。請罷黜而終不行。至正德。如傳陞文華殿中書等官張駿等。大者如由光祿卿陞禮部尙書之周惠疇。若光祿卿楊立。太僕卿高岱。全泰少卿而下。不啻數十人。至裝潢匠亦陞文思院副使。而銓法亦大壞。時內監劉瑾竊柄。詔吏部不時考察南京官及在外方面官。有不依附者輒斥去。於是皆通賂瑾門。望塵伏拜矣。世宗入繼。敕自首。力爲釐正。一時多黜去。而朝班爲之一清。初南郊詔下。言祖宗朝雖定科舉歲貢之法。而薦舉尤重。以並列於三途。自科舉法行。進士偏重。而歲貢之法輕。乃薦

舉遂廢盡矣。夫三途並用。則懷才抱德之士。得顯於世。不專於文辭。今舉人無九卿之望。歲貢限方面之陞。田野絕保舉之路。以致人尚浮辭。不修實行。宜真才之不可見也。吏禮二部按故典開奏。務復科舉歲貢辟薦之舊。有真才實德。不次擢。庶幾吏士向風改行。內外得人。爲惠民致治之本。尋又詔撫按官巡行郡縣。考守令政務。有無修舉。其有循良清白著迹者。不拘進士舉人。歲貢吏員。量年資會舉。降敕獎勵。或增秩賜金。復不次擢。其貪酷罷軟。依律例問擬。至相見須體貌。毋得薄資格。輕用非禮。陵虐五年。御史朱豹言。近來各處知府官多肆貪殘。誠心愛民者少。請令兩京四品以上官及翰林官。各舉所知。下吏部編紀成籍。詢訪相符。遇缺陞補。審其果賢。不妨久任。超擢。或薦不得其人。則連坐舉主。仍請上籍名禁中。視其賢者。親擢以鼓舞之。上善其言。已詔命兩京大臣詹翰科道及巡撫。各詢訪才行老成。繫時望者。從公舉所知。毋避嫌推謝。毋徇情冒濫。後吏部言。往歲奉有詔。令羣臣各舉所知。有懷才抱異伏在巖穴者。從公薦揚。而年餘杳然。無一人至者。請嚴限促之。報曰。可。而禮部尚書席書奏薦楊一清。王守仁。堪任。將相。且云。今諸大臣多中材。無足與計天下事者。上不許。曰。近者邊防多故。已令廷臣集議矣。乃席書身爲大臣。果有謨略。宜卽悉心敷奏。共濟時艱。何必自諉中材。有負委任。當是時。上明威自柄。內閣元輔部院大臣。擢用不以次。有不稱者。亦往往被重譴。嘗諭輔臣言。六部官要重。天下事皆所經綜。宜精擇。擇人授職。古制也。祖宗朝亦有改任者。其議上。時議改刑尚書。時中於都察院。南兵尚書。世寧於刑部。大學士一清。鑾因對言。世寧有風采。令長院固當。時中仍舊刑部。宜別舉堪任者。從之。久之。兵部以虜警請增遣大

臣經略上曰。天下官有定員。員有定職。惟未得人舉職。故有事輒擬。深官今邊務責巡撫。芻責所司令盡心經理可矣。遣經略庸滋擾。何爲。且虜騎出沒無時。士須休養待敵。其勿遣。恆手敕吏尙書。鉉言。吏部謂之天官者。以百凡奉天銓量。品隲賢不肖。進退廢置。必當外不避怨。內不避親。而云也。誠如是。君有得人之喜。民受福而庶績凝。居是位者亦永有不朽之譽。卿寧不思朕以此地特重。不授他人。而簡任卿。卿宜有以報朕。昨疏云。大禮之人。非大過不敢言。此何以稱焉。來歲爲考察期。宜勉持風裁。務使功不掩罪。私不害公。官知警而民有賴。夾持朕於不逮。其自勵必毋以私勝公。蓋重慎如此。而是時用輔臣言。出翰林爲外官。親民練政事。有勞績。復擢入待以殊遇。而諸府州縣官。簡入翰林爲侍從官。時時顧問民艱。是以上周知天下之故。先是正德中。附權倖。傳陞得文階者。查革始盡。又裁諸冗官。至二千餘員。罷武官。耗食者三千有百十人。進士科文體。敕毋浮冗。必古雅精確。鄉試畢。試錄進呈。往往鉤摘其命題與文。有不當上意。輒杖斥不少容。臨軒制策。皆出上所親製。其始之勵精於用人也如此。其後土木禱祠之事。作而國費不給。戶工部增納銀事。例鬻官買爵。幾同賈術。大臣婪恣。美遷除。往往以私賄得通。如營宮殿。匠作徐杲。郭文英。供焚修。方士邵元節。陶仲文。至工書禮書。廕子予勳爵。而內官俞泰等。弟姪義男爲錦衣者。不可數數。諸富人貴游子。姦胥大猾。往往竄名營繕籍中。得官無慮數千人。而方士爲太常通政。工匠爲太僕諸卿。及參議郎。中諸官者七八人。鴻臚光祿者累累矣。穆宗卽位。並革之。遂取籍按名。凡嘉靖中以忠諫屏廢。死者錄廕。存者召用。一時稱極盛。已詔令舉人中有孝友睦嫻名實相孚者。不分已未坐監。及

山林隱逸之士。許撫按官會薦。而御史周禧上言。論才者先人品。而後事功。取才者捐細瑕。而觀大致。故漢高舍匿金之過。資其奇謀。文帝赦魏尙守雲中。匈奴不敢南向。何者。細瑕在所略也。鷹揚鼎足之業。蓄於渭水隆中。而殺妻食子者。功可嘉。而心不可惻。何者。人品在當辨也。汲黯在朝。淮南寢謀。中國相司馬。遼人相戒。何者。其骨鯁忠義之氣。足以陰折姦萌。而耆舊老成之望。可以風動四海。今直隸之士。犯顏批鱗。委頓草芥。耆碩之臣。非有大故。亦漸相繼報罷。有識者寧不寒心。既舉已試之材。棄如振落。乃汲汲然旁搜遠採。未見其可也。上是其言。時大學士陳以勤條請。令撫按官精覈在外官。嚴禁貪墨。上覽之曰。貪墨故宜懲。而從中脅私報怨者。往往藉此快意。於是下詔曰。若中外各官。果有姦貪橫肆者。覈有實跡。不論官職崇卑。一體逮問。虧枉者。亦許從實辯雪。但有容姦撓法。言官指實參論之。而貪墨爲之稍清。萬歷初。制朝覲考察汰黜官。以吏部都察院科道會同公黜陟。故屏棄不齒。其歲時以言官論糺者。言事得罪者。撫按官得保舉起用。名曰地方人材。後以濫列及旁途借題欲官者。多資緣賄屬。銓推遂不甚以爲準信。而敕申言各撫按官。訪舉地方人材。果素無顯過。才力堪用者。聽舉用。若經內外考察。及奉特旨汰黜。及年力衰不堪世用者。俱不許濫舉市恩。已諭吏部言。朕奉天子民。注存邦本。思欲固圉育民。必得良有司。加意牧養。遇考察期。爾部其悉心體訪。各官賢否。惟以牧愛宜民者爲最。其有弄虛文。事超謁。剝下奉上。以邀浮譽者。考雖優。必眞下等。并撫按官一體罪之。厥後天下承平久。百官媮惰。而上春秋益高。厭萬幾。日深宮靜攝。不視朝。不見羣臣者。幾二十年。諸考選陞授銓。上恆閣三四年不下。待命京師。至於貧餓。

有棄之而歸者矣。貪頑者被論劾。視事殃民如故。及章下而虐民已數年。待新任官又數年。邊腹困弊。積弛不振。而兵革因之。然而朝臣無事。公署案牘寥寥。日事遊燕。有羣聚黨結。名爲講學。而橫議是非。訛翕遽起。因以擠排傾陷。不知天下事爲何如。後至蠹壞而不可收拾者。神宗末年實釀之也。光宗在東宮。日長熟觀天下之變。及卽位。起廢疏滯。纍若充庭。人滿位署。天下皆拭目鴻漸之陸而未幾崩。天啓中。權璫魏忠賢竊柄。稍觸忌諱。多所駢戮。而汗蠖矯誣。朝班幾空。試錄題文。亦兼頌美。及懷宗卽位。毅然掃除。登進幽廢。而正直多伸。其借名竄入。真有以貪汙不法黜者。亦指爲逆璫摧害。於是仕途大雜。上是時益肆力致治。每大臣員缺。廷臣臚其可用。上親召對稱旨。卽宣口敕授任。已患翰林爲儲公輔。恐未盡諳民事。歲甲戌。取天下推知循卓者試之。俾爲編修檢討官。進學翰林院。於新中進士中躬選擇年貌親制策問。授翰林科道部屬官。慮不盡才。每歲貢廷試畢。拔其尤者予州縣正官。賜敕勸諭。已復詔下在京七品以上官各舉所知一人。四品以上舉者爲知府。其下爲州縣官。諸臣不能仰體上意。多營私以賂進。或易所親而舉之。其時黨結恣橫。先是李三才號召講學。建東林書院。後遂有東林黨之名。至是凡三變。初亦重行誼。研道理。而欲假道學名者。往往溷其間。徒旣繁。因把持朝政。肆言白黑。尋勢成。然猶尙氣節。事標榜。剛愎自是。無敢撓其鋒。而公正者於中猶有數人焉。繼而門戶牢不可破。妄施毒札。共擠其異己者。異於東林者。名曰攻東林黨。亦伺其隙論劾之。久益水火。而中正孤立者。人目爲迂。不能至高位。卽至亦危殆。不能久。黨人日以戈矛爲事。借勢以快其私憤。貪婪驕亢。銓部不能持公道。用人之柄。一歸東林。而國運

以終黨亦散。

明書卷六十四

志九

選舉志二

貢舉

歲貢。○國初有保舉之令。凡保舉孝廉人材及山林隱逸。禮部行其地方官。察果名實相副者。上之禮部。轉咨吏部用。其後皆吏部行而禮部掌歲貢焉。國初貢不一。正統間始有定例。其增貢或以疏通。或以恩詔。不時行。凡歲貢額數。京學二年貢三人。府學一年貢一人。州學三年貢二人。縣學二年貢一人。軍民指揮使司學視府學。三氏學及都司土官學視州學。衛學視縣學。嘉靖中。定承天府學視京學。凡起貢。各處提調官查其食廩年深曾經科舉者起送。一正一陪。其丁憂日月准作實數。各提學官嚴加考試。擇其尤者送部。若正貢不堪罷黜。以次者考充之。凡恩貢。或遇大吉慶厚恩。或以銓選乏人。特旨准貢。行各學不拘食廩淺深。通赴提學考試。務取文行兼優者。京學四人。府學三人。州學二人。縣衛學一人。以充起送禮部。送翰林院嚴加考試。分別職銜咨吏部用。凡補貢。遇正貢事故未經到部。在一年之內。將原批朱卷追繳。提學官取年力精壯文學優長者一人補之。儻有以遠年貢缺濫補市恩者罪之。凡考試

恩歲貢不中者。發回學肄業。一省多至三人者。罪提舉官。凡就教於歲貢廷試之後。驗精力未衰者。送監讀書。餘願就教者。送吏部以次銓授。恩貢悉送兩監。不許就教。其年老不願授職者。給與七品散官。凡已廷試病故者。咨行兵部起關應付還鄉。

科舉○明初倣古賓興之制。定以子午卯酉年秋八月。各省直試士於鄉。中式者貢於禮部。明年春。禮部奏請會試天下貢士。取中式者引奏陛見。上親策試之。欽定甲第。賜進士及第出身。有差。初鄉試各以地方人才多寡爲額。多者不過四十人。會試臨期奏請。取中式者亦不過百人。別以人才薦舉他途進者。往往至大官。其後海內學者日衆。貢額漸增。士就試禮部者至四五千。所舉視初年率增數倍。天下英儁之士。非此不得進用。而科條禁令日以益繁苛矣。凡鄉試於八月初九日試初場。十五而三場畢。士各專一經。皆兼大學中庸論語孟子以爲業。四書義主朱子章句集註。易主程朱傳義。書主古註疏及蔡氏傳。詩主朱傳。春秋主三傳及胡安國張洽。後專主胡傳。皆兼古註疏。禮記宗陳澔註。初場試四書義三道。經義四道。令深於義禮之文。次場試論一道。觀博約之致。詔誥表内科一道。判五條。鞫王體國法。末場時務策五道。觀經世之略。蓋欲酌文質之中而用之也。制文格宜典雅純正。不許爲駕虛翼。僞鉤棘。軋苗之文。及引用釋老莊列背道不經之言。或引用謬誤雜書。放榜後。考試官取其文稍爲潤色。具錄三場程式。文上之。而禮部摘察其紕繆者。降罰黜落之。會試則以鄉試之次年二月初九十二十五爲三場焉。凡禁例。其文字制避御名。廟諱。親王名諱。然依古二名不偏諱。遠則黜落。而入場時則有搜檢。入舍後則有

防守軍丁。若懷挾及託人夾帶入場埋藏抄謄。越舍換寫。而巡防官丁故縱者。皆有罪罰。若放榜後。有作歌謠謗毀主司以逞私忿。投匿名文書中傷者。訪的罪之。至於謄錄遺落。對讀不清者。俱治以罪。凡鄉試解額。國初數甚狹。後漸增。至崇禎時。北直隸順天南直隸應天各一百五名。兩監各四十餘名。順天增遼東五名。宣大五名。浙江福建湖廣江西各百名。內外山東山西河南陝西各七八十名。四川雲南廣東各六七十名。廣西五十名。貴州三十五名。而遇覃恩。每增額十餘名。凡四五二三名不等。其大較然也。凡考試官。遇鄉試年。巡按御史奏請。禮部議覆。國初止用教官。及訪求明經公正儒官。儒士中選用。後聘文望重者。致政及閒散官。後定兩京闈。以翰林院官。浙江江西福建湖廣一翰林。一給事中。其餘省以給事各部屬及中書行人。會同吏部咨各衙門開送。仍酌量道里遠近。先期奏差。而同考試官。北京闈以中書舍人評事博及各部觀政進士。南京闈及各省。則聽巡按御史取聘推官知縣及文學教官以充。本省乏人。則聘別省推官教官以充。而知縣則不出本省也。凡入場官員。有提調官。在內則府尹。而外則布政司官。有監試官。在內則監察御史。在外則按察司官。而各省則以巡按御史爲監臨官。專主外籛事。復有收掌試卷印卷官。受卷官。彌封官。謄錄官。對讀官。皆以推知及兩司道領充之。有巡綽官。搜檢官。以衛所武職充之。有供給官。則以散官下僚充之。各有迴避覺察諸禁例。凡應試。除兩雍監生教官各學生員外。國初許高麗琉球占城安南隨便入試。而雜流僧道吏胥天文生醫士官生軍舍。俱許各該管官保勸應試。惟罷閒官吏娼優隸卒之徒。與冒籍匿喪者。俱不許。違者皆罪之。

會試。○會試禁例與鄉試同。凡額數無定數。皆臨期請旨。明初不過百名。後以三百爲率。多不過四五十名。遇覃恩有加至四百名者。惟永樂三年多至四百七十二名。以百卷爲率。南卷取十之六。北卷取十之四。南北各退五卷爲中卷。北卷則北直隸各府。山東。山西。河南。陝西。延慶。保安二州。遼東。大寧。萬全三都司。南卷則南直隸。除中卷。府州及浙江。江西。福建。湖廣。廣東。中卷則四川。廣西。雲南。貴州。南直隸。廬州。鳳陽。安慶三府。徐。滁。和三州。凡考試官。國初不拘官職。尋定以翰林院官。臨期請用。後以殿閣大學士充之。其同考試官。初用教官。後以翰林官居十之六。科二部二。臨期取用。皆宴於禮部。乃入簾。凡外簾官。皆以京官七品爲之。或參用行取推知。凡內外簾入場官。有宗族子弟及翁壻入試者。皆應迴避。惟禮尙書止於進題不迴避。凡應試鄉試新中式舉人。及下第坐監舉人。署教舉人。皆准會試。若署教舉人。雖經兩科六年考滿。遇試期將近。仍准會試。凡下第舉人。國初願回讀書。俟後舉者聽。其後盡數分送兩監肄業。尋願坐監撥選者入監。不願入監而俟後舉者聽。

殿試。○前期禮部奏請讀卷及執事官。其讀卷以內閣九正卿。正卿缺。用侍郎。詹事。翰林堂上官。提調。以禮部尙書侍郎。監試以御史。受卷彌封。掌卷以翰林院。春坊。司經局。光祿。鴻臚寺。尙寶司。六科及制敕房。官。巡綽以錦衣等衛官。印卷以禮部儀制司官。供給以光祿寺禮部精膳司官。於三月十六日上御皇極殿。親賜策問。諸舉人對策畢。受卷官送彌封官。彌封訖。送掌卷官。轉送內閣讀卷官處。詳定高下。明日。讀卷官詣文華殿讀卷。御筆親定三名。賜讀卷官宴及鈔。退於東閣拆第二甲三甲。以次填寫黃榜。又明日。

讀卷官於中極殿上前拆一甲三名填榜上御皇極殿傳制第一甲第一名從六品第二第三名正七品賜進士及第第二甲正七品賜進士出身第三甲正八品賜同進士出身張榜畢順天府官以儀從送狀元歸第明日宴於禮部又明日賜狀元冠服進士寶鈔後三日上表謝恩明日謁至聖於國子監行釋褐禮禮部奏請命工部勒石題名

銓法

選官○明初設賢良方正聰明正直孝弟力田通經孝廉諸科或從耆民及稅戶人材與科貢之士並用多出親擢其後始定銓選之法每歲有大選有急選有遠方選有歲貢就教選間有揀選有舉人乞恩選其授官則有署職有試職實授有截替改降併省有徵召考選舉起有帶俸添註遙授而銓選之法略具於此矣凡官員作缺若官員考滿侍親致仕丁憂殘疾刑辟考功稽勳案呈作缺類赴內府銓注或本科遷調改降及爲事提問者立案作缺送文選移稽勳開附轉續貼黃考功附行止而事故不明難以作缺者俟本科照勘回報內則各衙門逐日申報季冬冊送外則所司報撫按兩月一奏以憑銓補凡數選若考滿起復及降用裁減截替別用爲事釋放罷閒起取稽勳考功紀錄通問明白照例選用而隱匿過名及贓私等項者罪之其應選者除僧道陰陽醫士除原籍餘名避貫而教官雜職第避本府凡京官試職實授在京初入仕者試職遇有陞除及比前任品級降等者外官經薦舉才德除在京者如因朝覲給由到部遇缺對品降除者皆實授後惟監察御史中書舍人有試職餘則否凡舉人出身卽殿試

初賜甲第。凡進士選除第一甲一名除翰林院修撰。第二第三除編修。二甲除南京戶禮兵刑工主事。三甲每選頭除中書行人評事博士官。餘以次除推官知縣。凡庶吉士考選入明。或一科一選。或連科皆選。或數科不選。或三科同選。令內閣會同吏禮二部於文華殿門外賜題考試。糊名送內閣取選。奏准送翰林院。命學士等官教習。學業成者除翰林官。餘散除科道部屬等官。遇選合二三甲通試。凡考選科道。初用進士舉人教官。或人材特用。後定以行人博士評事進士中書。及行取進士舉人。推官知縣俸。及四年以上者。吏部會同都察院考選。先試職。陞除實授。或以主事改選。而員外郎或許或不許。無定例。尋國子監助教等官。由進士舉人者。亦一體考選。大約以四分爲率。進士三分。舉貢一分。凡戶部官禁用浙江江西蘇松人。凡中書舍人進士初選。或舉監生考選。而大臣子孫廕授及習字出身者。不在此例也。凡制敕誥敕兩房中書官。舊以舉人監生儒士兼用。尋於主事評事改授。仍以原職委辦事。後於告選舉人內考選授試職。許會試一次。凡各殿書辦官。以善書監生儒士選補。三年給冠帶。六年監生授中書白衣授序班。永不外陞。凡行人止用進士除授。凡太常寺官。以樂舞生以次選補。如協律郎。司樂。祀丞。提點。知觀。皆以次陞補。凡欽天監官。皆於本監以次陞補。若保章正以下缺。於天文生內選補。凡太醫院視欽天監。於醫士內考補。各王府良醫官亦然。凡禮部鑄印局儒士。三年滿日。除授本局副使。無缺。除各府檢校等官。凡鴻臚寺官。由加納。若通事則考授。三年給冠帶。六年授序班。不外轉。凡四夷館譯字生。視鴻臚通事。凡五城兵馬司官。兵馬指揮。以正途知縣及司府首領官陞授。遷轉。

視京縣副指揮吏目以府衛首領官及州縣佐貳陞補或以貢例監生考除。凡親王講讀書於進士內選用加翰林院檢討銜不實授其待詔待書於舉人監生內選用勞久於原職加陞。凡王府官長史以科目紀善審理等官以監生而工正以下則於吏員選除其季年以王府官不開缺陞除者爲處分矣。凡親王妃父無官授兵馬指揮郡王妃父授副指揮銜不任事。凡文職本身并族屬有爲王妃者不許陞除京職後功服外不禁故者一體陞授。凡教習駙馬官以國子助教等官及附近教職內推選爲伴讀書錄而以禮部儀制司主事教習或在部帶管或特爲陞除。凡教習勳臣子弟公侯伯家各置教書儒士一人三年考中者授職銜。凡教職有進士願改教者有進士舉人推知降者有下第舉人願就者而歲貢除送監外皆選訓導進士爲教授下第舉人爲署職餘以次陞除。凡監生入選分正行雜行每兩月一次考試選用以十分爲率舉貢官生六分援例四分吏部會翰林院考擬職銜。凡揀選每於朝覲後府佐州縣正官缺將科貢監生挨次未及者揀選文學可觀年力精壯者選補尋以每年二八月行之後援例監生亦於大察後揀選府州縣佐貳司府首領官不中者不許再揀。凡選除邊遠地方例以雲貴廣西三省及廣東雷廉高瓊四府四川馬湖府爲遠陝山西行都司各所轄寧夏岷州爲邊缺官將在部聽選挨次未到願就者考選除補舉人不除府同知歲貢不得除知州推官通判每春季行一次後停止。凡選除本地方如學官雜職得選本省隔府地方。凡官員丁憂起復若丁憂之事隸於稽勳而起復則於文選除京官不考外官皆考過復除明初令百官聞喪不待報卽去官後京官有勘合外官及

歷事監生及吏典人等皆有引起復有程限。奪喪短喪匿喪有禁。除祖父母父母承重丁憂外。期年以下。不許守制。皆遺文原籍勘明。如有詐冒者治以重罪。以聞喪日爲始。不計閏。二十七月服闋起復。百官皆守制。惟欽天監官計奔喪三月不守制。若官員守制在家。除公罪不坐。如犯賊及干係錢糧皆旬間。亦有奪情起用者非禮也。故詳書之焉。

史官曰。三年通喪。惟兵革無避。自漢文以日易月。而臣下亦因之。如鼂錯父死旬日。而尚以御史大夫調兵食。翟方進母死三十六日。而復起治丞相事。唐之右僕射房元齡。中書侍郎蘇□。張九齡。宋之參知政事寇準。此外亦不多見。明太祖極重此制。以劉基宋濂章溢當帷幄方面之重。於天造草昧之時。而聽其終喪。了不之強。太宗急於事寄。中外臣僚。始有奪情不丁憂者。或有於制中起用者。漸以奪情爲能。而不奪情爲不稱。成化中。羅倫有扶植綱常一疏。極爲痛切。於是奪情之風稍息。雖不盡然。而覲顏者寡矣。今特以綱常倫理之重。附志其人於此。又不第國家一銓法也。其內閣則有楊榮。金幼孜。張英。江淵。王文。李賢。劉羽。張居正。楊嗣昌。尙書則有吏部蹇義。戶部夏原吉。年富。兵部趙玗。白圭。馬文升。翁萬選。楊博。崔呈秀。工部吳中。左都御史則有蕭維楨。右都御史則有毛伯溫。侍郎則戶部張睿。薛遠。禮部諸懋。薩琦。萬祺。萬翼。兵部于謙。程信。杜甯。俞綱。原傑。李震。工部甄庸。沈義。制敕房帶銜侍郎則談相。王槐。右僉都御史則韓雍。詹事則陳文。王英。學士則倪謙。大理卿則陳勉。太常卿則趙玉芝。陳教。光祿少卿則高寅。左通政則王復。府尹則王福。李敏。修撰則劉吉。編修則劉健。檢討則邢讓。張順。給事中則胡濙。御史則黃宗載。魏源。

羅亨信。孔文英。何琛。各部屬則吏部鄭誠。戶部陳翼。兵部原傑。柴車。向寶。督撫鎮守則交趾尙書黃福。巡撫南直侍郎周忱。巡撫河南山東少卿于謙。鎮守浙江侍郎孫原貞。參贊延綏少卿曹連。巡撫都御史則平涼羅亨信。居庸蕭啓。大同年富。王宇。王越。遼東王勳。寇深。滕昭。宣府葉盛。鄭甯。陳廉。延綏徐瑄。甘肅芮釗。南直劉孜。陝西王概。馬文升。廣西吳禎。河間張祚。荆襄于恕。四川張瓚。福建譚綸。布政則雲南陳文。廣西孫曰良。陝西郭堅。廣東戴弁。按察使則陝西王文。參政則福建顏澤。江西郝珩。譚綸。雲南張鉞。山東洪豫。偏石葉盛。蘇松任環。副使則山東王憲。王充。貴州李睿。僉事則山西何自學。貴州屈伸。運使則兩淮耿九疇。知府則蘇州况鍾。鳳翔韓福。扈暹。荊州劉永。杭州陳復。漳州甘瑛。徽州孫遇。臨安徐文振。處州石瑄。西安郭晟。葛文名。慶遠周一清。同知則保定錢甯。荊州陳禧。通判則潯州龐本厚。推官則開封李鉉。知州則蒲州張廉。茂州陳敏。定州王約。知縣則盱眙方素易。邵陽孫浩。醴泉胡連。清苑屈義。嘉定辰昭。宛平馬俊。咸陽王瑾。上元姜德政。平山張瑾。經歷則石阡楊彬。吏目則貴州張順。內年富。馬文升。萬祺。原傑。黃福。周忱。葉盛。譚綸。皆兩奪不終父母之喪。尤其澌滅可誅者矣。凡丁憂起復有程限。違一年之上者。不准復除。仍行查。凡告遙授。如應選舉人監生等不願出仕者。照本職遙授。惟進士吏典不許。凡告願降選。監生吏員選未及者。願降選聽。凡知印。五府六部都察院知印缺。於識字人材內選用。三年滿日考中。各以所辦事衙門選授。從八品以下官。凡入選禁例。若文職官吏監生等有曾經考察論劾罷黜。及爲事革。年老事故考退者。例不入選。朦朧作弊入選者罪之。凡引選。俟常期畢。吏尙書請旨選官畢。印

綬監出職銜印子用各姓名上司禮監持入御覽過就闕左選完送吏科收貯凡官員赴任皆有憑限除領敕人員及京職外吏科畫限日天下皆有定期違至一月以上者遞罰一年以上者革職

推陞○舊制陞必考滿若員缺當補不待考滿者曰推陞類推上一人單推上二人三品以上九卿及僉都祭酒廷推上二人閣臣吏兵二部尙書會大九卿五品以上官及科道廷推上二人或再上三四人皆請自上裁惟詹事府翰林院官從內閣推補

保舉○保舉之令歷朝各異已見前篇後惟撫按行部及部臣出差者始得舉其所屬而雜舉之例特詔乃行

改調○凡父兄有任京堂三品以上者其弟姪子男改調凡內外管屬衙門係父子兄弟叔姪者以官

職論從卑迴避改調凡京官與王府結親者向外改調凡特薦才能堪任彼事者改調凡御史不

堪實授者改調凡外官以繁簡互調凡內外官以不及浮躁因事者降調凡裁革員缺者改調

開設裁併○遇此等事例合卽於相應員缺除授

還職○凡內外官員有戴罪有間斷有違限提問或遇恩赦或查審無干俱得還職或報缺差誤重選檢

舉改正者新官起送改選

侍親○凡官員親年至七十之上無別子者許終養有兄弟而篤疾者及母老雖有同父異母兄弟者亦

許終養

□□復姓○除京堂官奏復本姓免勘餘勘明方准若自幼過房與人而養者係軍匠竈戶本姓爲民者不許明初人名禁天國君臣神聖及古帝王聖賢名國號皆更之。一人易兩三名者有禁。給假○凡官吏有老親在任送親及十年省祭六年省親遷葬治本生父母喪妻故送幼子還鄉舉孀及聽選守候日久選期尙遠者俱准給假各有程限惟治喪假二年餘不過五月遠限有罰。養病○凡文武官患病在三月之上俸住支五十五歲以上願休致者聽皆驗實始放還調理外官則不許有許者出於特恩若告病限滿在途或在家尙未痊者勘實再准三假則削職果材品超卓撫按從公薦舉起用若在差御史患病撫按官代奏准回籍調理若係推避就令致仕其養病三年以上者革職冠帶閒住。

封廕

功臣封爵○詳年表始封既歿者加贈承襲者非有軍功生死第以本爵。

功臣推封○功臣皆得推封三代而移封本生亦然若承襲後必積有年勞者方准如加師保止授本身不得推贈皇親封爵如之。

功臣襲封○公侯伯及衍聖公襲封皆覈其宗圖辨嫡庶明倫序以杜爭端無嫡方准庶支承襲已故者既葬乃襲惟衍聖公守制宗支圖每五年一造三冊一存部一存科一存府。

土官承襲○凡土官承襲地方官體勘明白別無爭襲之人具宗圖申奏承襲除雜職及婦女外餘皆赴

京承襲弘治間曾有納粟納銀免入京之例後革如已故者過十年則不准襲矣若土官犯惡逆被戮擇其倫序相應爲夷衆所服者授以職或如故或降襲

文武官封贈○凡文武官歿後准加贈未到任者否 凡推封一品三代二三品二代四品以下止父母妻室 凡封散官照見職而父母見任則不封願棄職就封者聽 凡嫡母在不封生母生母故則贈生母未封則妻不封兩子當封從其高者夫與子有兩官亦然 凡祖父職高於子者進一階 凡三母三妻不並封嫡母從父官生母得封從子官 凡婦人一品二品夫人三品淑人四品恭人五品宜人六品安人七品孺人 凡祖父有爲事不得封者願以己與妻封典移者聽奏復官職亦然若犯賊罪者否 凡養子願移封本生祖父母者奏從之

廕敘○明初因前代任子之制文官一品至七品皆得廕一子以世其祿後乃漸爲限制在京三品以上滿考著績方得請廕謂之官生而雜流則不准廕出自特恩者不限官品謂之恩生或卽與職事或送監讀書有定級大率廕者相隔五級若大臣有勳勞者經考而故者奉使外國而死者東宮侍從講讀及三年者死於忠諫者公主子孫有志向學者皆得廕凡廕以嫡至庶及子孫以下皆降敘而已廕者得他官或故得補廕焉

誥敕○凡文武一品至五品皆授以誥命六品至九品皆授以敕命誥用制誥之寶敕用敕命之寶而各有文簿藏之內府制一品玉軸二品犀軸三品四品抹金軸五品以下角軸凡京官實授三年考滿外官

考滿而有薦以最聞者。王府官未至國則視京官之國視外官。或死忠諫已經追贈廕敍者。或陣亡死節者。皆給誥敕封贈。翰林院撰文。中書科書寫。尙寶司用寶。京官御前頒給。外官或給來京人役。或發布政司分給。凡補給。若各官因事降調。非犯貪酷者。或給由到部。遇陞別官者。或京官出差。給由到部。陞外官者。已考滿。尋准致仕者。丁憂養病。給假。遇覃恩。復除者。皆補給。凡改給。先任外官。陞京官品同者。先任二品。尋加從一者。先任方面。已給而陞京堂品同者。先任方面二品。而後歷京官三品者。皆給以新銜誥命。凡官員應封贈者。有過名。及妻係再醮。倡優婢妾。及本身受賊。與考察降調者。皆停給。凡封贈後犯賊惡。及婦人不遵守再嫁者。皆追奪。祖父自有官者。及非犯賊罪者。皆免追奪。凡王府將軍郡主儀賓等。及新選駙馬。番僧。宮內命婦。誥命。禮部關咨給授。

勳階散官。○詳職官志。

考課

明興立考課之法最詳密。內外官滿三年爲一考。六年再者。九年通考黜陟。卽古三載考績三考黜陟幽明之意。京官故皆試職一年。考覈實授。一考對品調用。外官給由到京。遇缺借除京職。後多不行。惟御史及中書舍人有試職。而餘無一年考覈之例。季年科條嚴切。以事去國者多。或未滿而陞。未聞有九年考滿之事矣。凡京官考滿俱不停俸。四品以上官黜陟。取自上裁。大臣考滿引奏。餘數引若一品二品考滿。賜予尙書都御史。六年考滿。加宮保。內閣考滿。或賜宴及獎敕。誥廕。皆擬奏。出自特恩。若督撫考滿。查

地方寧否。或曾失事而罪不掩功者。皆奏請加級封廕。若左右春坊。司經局翰林官。皆從本衙門考。東宮官皆取自上裁。若在京各衙門所屬。俱印官考覈。吏部覈考。至尙寶司中書科考滿。緣係近侍官員。取自上裁。若欽天監。太醫院。鴻臚寺。聽禮部考覈。吏部覈考。行人司印官屬禮部。順天應天府佐領屬巡撫。兵馬司屬兵部。京衛首領屬五府。工匠出身屬工部。神樂觀及僧道官屬禮部。各考覈。吏部覈考。南京如之。凡京官降調者。另歷給由。不通理。若自行陳請改調者。通理。帶俸官考滿。則陞補之。惟工部官不陞。若改調而俸給相同者。通理。陞亦然。若致仕閒住爲民。後起用者。亦通理。

凡外官考滿。布政按察司印官從撫按。屬官從印官。邊方兵備從兵部。屯田水利督糧從戶部。行太僕寺苑馬寺從都察院。鹽運司從本處按察司。其屬從印官。府州縣從本處上司及撫按。直隸有司從巡按御史。各考覈。送吏部覆考。外官陞外官。對品通理。陞京官不通理。惟王府官從長史奏。俱令復職。不考覈。教官則從提學官第考其文學及地方中式多寡爲殿最。若雜職則各以其職掌考覈之。

京官考察。○明初無定期。或十年或五年。後定以己亥年考察。四品以上京堂自陳不職。聽上去留。五品以下。合見任公差住俸。丁憂養病侍親。給假陞任處分。凡六年內未經考察者。皆造冊送吏部。會官一體考察。惟詹事。春坊。翰林官。并內閣中書。書辦。譯字。各帶俸官。聽內閣會翰林學士及掌印官考察。而三殿中書匠作官。欽天監官。皆免考。餘俱吏部會都察院考察。兩京府縣從京官。其處分等第。則年老有疾者。致仕。貪酷者爲民。不謹者冠帶閒住。浮躁淺露才力不及者。降調外任。凡王府官聽撫按復命。造冊送部。

以爲存留不在察列。

外官考察○定以辰戌丑未年爲朝覲之期。諸司府州縣官皆入覲。撫按若監司具三歲中賢否考語上吏部。會都察院於正月初二日起過堂考察。奏上旨下貪酷者爲民不謹及罷軟無爲者冠帶閒住。老疾有疾者致仕。浮躁才力不及者降調。有差而留用者部尙書引至御前。刑部及科道官各露章彈劾。責以怠職不稱之罪。來朝官皆免冠待候。上命宥還任。各賜敕一道以申戒飭。若廉能卓異貪酷異常者。則又有旌別之典以示勸懲。廉能者另引奏。賜宴衣帶鈔錠。貪酷者卽逮問。凡內外考察畢。南北科道官拾遺。先是冊未至吏部。發訪京堂科道官開具不稱官事蹟備考。凡考察官員若被黜有不服。撫拾妄奏者罪之。有預先央求勢要囑託者。一併黜罰。或有眞實誣枉者。許大臣言官卽時論辯。吏部查訪奏奪舉劾。○凡在外官員有旌異保留糾劾之例。撫按官皆得行之。所至地方。又有不時論劾。復命舉劾。義例爲甚嚴云。敕天下諸司府州縣官及教官政蹟才行廉能公正者。並許撫按奏舉。初歷俸二年之上方舉。後一年亦得列薦。儻有徇濫不公。科臣參奏。或所舉之人。或以貪酷等項革問。將舉奏者連坐。或舉薦獎勵過官員冊報到部。而後來考語一人自相牴牾。彼此薦劾不同。勘實罪其誣者。每於朝覲考察竣事。追所舉者四人革職或閒住。二人以上降調。一人則罰俸。有舉無劾者查處。若撫按官不及半年而被論。丁憂罷降聽勘。皆不准舉劾。凡論劾之官。部卽與覆處分。若當提問者先革職。俟得旨後擬議奏聞。不許先擬爲民而後方提問。中差御史則止許舉劾本差內專屬官員。不得旁及。吏部卽與題覆。巡視五城則

舉劾兵馬。至劾治奸貪。必從公問擬。虧枉者。卽行昭雪。不得偏執成說。違者科道參劾。

保留。○凡有司官政績顯著。能得民心者。考滿去後。許所部人民赴上司保留。上司覆勘奏聞。或旌異。或陞職留任。惟上命。

致仕。○凡內外官員。見任願致仕者。聽其考察。被劾聽調。官願以原職致仕者。聽王府官無故願致仕者。加本府相應官員職銜。行令致仕。其大小官員陞遷未到任者。准以原職致仕。其九年考滿。年力衰邁。願致仕者。給與散官致仕。而軍旅邊方及繁難地方。規避者。則不准。堅請者。冠帶閒住。惟欽天監官不許致仕。而大臣乞休。則自上裁與否。及歸。有行人護送病痊起用之典。

事故。○官員事故。有極刑老疾紀錄。行止之條。老疾者。散見於養病致仕。若極刑官家屬。除總麻疏遠異姓親戚外。其小功以上親例。合迴避。取宗支圖本保結明白。奏准去官離職。後准於邊遠敍用。若經赦宥。家屬子孫。果有才行文學。一體選用。紀錄則凡係問刑衙門。於內外見任官員。因事提問。問過應有的。決公私過名。開咨吏部。紀錄文冊內附寫。候九年通考。以憑黜陟。若有司三年考滿。給由到部冊內隱匿不報者。送問。後給由者。除免照例陞用。而各衙門年終。以所屬官吏公私過名及罰俸等項。造冊送吏部。以憑稽考。行止則凡內外官員。除授之時。投報供狀。當卽於冊內備載。歷任始末緣由。或任內調除。如有所事故。開附行止。以憑稽考。

訪舉。○歷朝訪舉。屢行之。詳前篇。

童子舉。○明朝雖不設童科。間有以神童薦者。召至上親試。或留中講讀。或遣歸就舉。今臚其人。使覽者見其穎異云。洪鍾。錢塘人。四歲。以善大書舉入翰林肄業。後舉進士官中書舍人。李東陽。長沙人。五歲。以奇童舉。景帝召試大書。屬對喜甚。詔入京府學。中天順甲申進士第一。官大學士。程敏政。休寧人。信之子。年八歲。隨父大參入蜀。撫臣以奇童薦。英宗召試聖節及瑞雪詩。并經義各一篇。援筆立就。上大喜。詔讀書翰林。官給廩饌。後舉進士第二。官侍郎。楊一清。雲南人。寓京口。十歲。有司以奇童舉。登弘治庚戌第。官大學士。董玘。會稽人。以奇童舉。試不中格。罷歸。十八歲登第。官侍郎。楊廷和。新都人。十二歲中舉。後官大學士。任道遜。舉奇童。侍東宮書。登成化戊戌進士官大學士。朱奎。以幼童薦。官大理卿。直內閣。林章。以幼童薦。直內閣。謝宇。以幼童薦。官侍郎。直內閣。

吏員。○明初令有司設司吏。尋各衙門有掾史。令史。書吏。司吏。典史。後又設提控。都吏。人吏。胥吏。獄典。攢典。名色。各以政事繁簡爲額。有以農民參辦者。有加納者。若參撥後有俸。在京一考。在外兩考。爲滿九年出身。一品衙門吏從七品出身。以下遞降。或滿日先題給冠帶。吏部考試定銜。先有辦事。有撥歷。有揀撥。則每年二季考。揀一等充繁劇。二等充簡靜。各衙門有降撥。因人多缺少。願告降者聽。逃者句取。老疾者革退。犯罪的決者贖罪者量輕重爲去留。不願出身求冠帶者聽。而軍吏有冒濫者則勒令補伍。惟戶兵二部書算。則行常州鎮江取殷實戶內揀充。復有承差。篆書。譯字。天文。地理。醫生。匠人。畫士。僧道。皆以資進。

明書卷六十五

志十

職官志一

史官論曰。建官之典。虞周大備。明太祖鑒前聖。酌上代。制百官。分理庶政。俾輻輳並進。用以翼天子。康海宇。奠蒼生。雖專領兼攝。於古微有不同。而規模品式。大抵相爲損益。故權殺於漢。而董正之綱維。自定員省於唐。而職任之貫理。亦周祿涼於宋。而蠲復之恩科。愈厚。卽有驕陵。旋麗陳臬。豈無冗贅。亦復汰除。文武夾維。內外交應。協恭互發。則指臂相隨。輒斷獨行。則齟齬不遂。防微曲算。亦可謂精詳矣。第九重尊。遼堂陞懸絕。尊卑過嚴。秦交未洽。而用人之柄。專於銓曹。況疆土延袤。萬里而遯。昔均四海。未有若斯。然古列侯各君其國。冢宰事簡。自分郡縣。置吏寢多。猶有長吏自辟士。今考明中宦籍。自土官而外。凡二萬四千九百三十四員。掾史無算。一切待命天曹。其統百官。不其艱哉。書有之。明王奉若天道。建邦設都。承以大夫師長。不惟逸豫。惟以亂民。噫。要哉言矣。厥後事益繁滋。官輕添設。夫官多則民擾。迨其季也。閭閻困瘵。而鼎籙淪移。書又有之。民非元后何戴。后非民罔與守邦。然君者羣也。後之覽者。盍思虞周聖王設官爲民之意。作職官志。

初立中書省。設左右相國正一品。尋改左右丞相各一人。左右丞各一人。參知政事二人。總領衆職。分錢糧禮儀刑名營造四部。其屬左右司郎中各一人。正五員外郎各一人。正六都事各一人。中書舍人。正七二十人。

是年設六部。統於中書。洪武十三年。胡惟庸誅。罷中書省。敕嗣君不許立丞相。而竣臣下奏請復立丞相之刑。先是六部尙書正三品。以下遞降。至是陞正二品。以下遞進。設官百有五人。分領中書之政。與都察院通政司大理寺爲九卿。不相壓事。皆朝廷總之。建文陞尙書正一。增侍中一人。位侍郎上。太宗復故。革侍中。永樂元年。以北平爲北京。置北京行部尙書二人。侍郎四人。其屬六曹。清吏司如六部。旣遷都。罷行部分置行在六部。十八年。除行在字。而在應天者加南京字。洪熙元年。復稱行在。正統六年。復除諸司亦如之。終明政分六部。而中書省不再復。止留中書舍人。遂別於六部自爲科。

初立三公府。設太師太傅太保曰三公。正一少師少傅少保曰三孤。從一無兼領者。太宗罷公孤官。革三公府。

仁宗復設。惟侍上左右備顧問。咨機務。無定員。無專授。爲勳戚文武大臣兼官。加官贈官。文臣則惟贈。乃得三公。不生授。嘉靖初。楊廷和一品。十二年。加太傅。辭不受。萬歷初。惟張居正領太師。

立宗人府宗人令。正一初爲大宗正院。以親王領其事。已而勳戚大臣攝府事。不備官。尋改宗人府令一人。

正一左右宗正各一人。正一左右宗人各一人。正一其屬經歷司經歷一人。從五宗人令掌皇九族六親之屬籍。時

修其玉牒譜系辨昭穆親疏之數。司宗室子女適庶名封生卒婚嫁諡葬。凡宗室奏請爲聞上。達材能錄罪過。而左右宗正宗人爲之貳。經歷典出納文移。

立吏部。部尙書一人。正主天下官吏選授勳封考課之政令。總司政本。公制置黜陟以贊於天子。侍郎爲

之貳。左右二人。正其屬清吏司四。曰文選。曰考功。曰驗封。曰稽勳。司各置郎中一人。正員外郎各一人。從

主事文選考功各一人。封勳各一人。正綜其事。司務二人。從省署抄目受發文移爲首領官。文選掌天下

文吏銓選作缺改調保舉推陞之事。計官京師一千四百七十六。南京五百五十八。外二萬二千九百。合前類凡入選。釐流品。平注擢。毋得相先後。凡陞必考滿。不及考滿曰推陞。各有員數。待上命。以署職試職。實授奠年資。以裁革并省兼攝添設註選量繁簡以薦舉起廢徵召達賢雋以帶俸添註寄恩宥以降調除名馭罪過。以官程課吏治。以寧假悉人情。制凡王官不外調。王嫺不外授。大臣之族不得任言官。僚屬有族人下避上。傳陞乞陞者許執奏。若納粟馬銀乞遠方。不得銓府佐州縣正官。考功掌考課黜陟之事。凡內外官給由。再考引請。三考奏請。六年考察京官。三年大察外吏。大臣不註考。四品得自陳。內外官有勲章品其良不肖擬去留聽上。大臣自陳下亦如之。而王官倉場庫官巡檢教官及流外宥皆有考。及九年陟無過一等。惟舉人署教則得引選試陞。陟無等。諸致仕有許否。凡請葬祭贈諡廕。按其滿考被劾與

否。傅公議以聞。以閑劇量殿最。以旌異廉政績。以貢舉搜遺逸。以保留達民情。以紀錄懲愆過。以譎戍糾罷閒官吏。驗封掌封爵。襲廢。褒贈。及吏算之事。凡公侯伯勳烈外戚恩澤。及闕里大宗。各徵其誥券。適孽功罪封號。以第其世流。除之等。以土流馭夷官。以誥敕別封贈。以進階。地封。加贈。追奪。勵愆良。以廢敘錄任子。以等級給散官。以考撥差吏胥。以須知訓入官。稽勳掌勳級名籍。喪制之事。凡文官五品以上。授勳百官黃類。登之內府。有故則除之。凡三年喪解職。糾奪喪。禁短喪。謫匿喪。分奔喪與否。勘終養者。復姓。吏名必登版。四司各帥其屬。奉其職。贊尙書之政令。而部尙書首六卿。擬天官家宰。特尊重焉。

立戶部。部尙書擬地官。主天下人民戶口田賦征役經費之政令。經鹽法邊儲金穀出納之制。以贊於天子。侍郎二人爲之貳。司務照磨。正八。檢校。正九。典磨勘計算。爲首領官。明初設清吏司四。曰民部。主天下省府

州縣之圖志。以周知其地里。古今沿革。山川險易。土田肥瘠。寬狹。戶口物產多寡。登耗之數。曰度支。主會計天下存留起運。若廩祿俸給之經費。曰金部。主天下魚鹽稅課。若贓罰之折收。曰倉部。主兩稅起運倉庾之委積。已上念地曹務繁。更定爲十五清吏司。後革北京及交趾爲十三司。各理一布政使。司戶口錢糧賦役課程之事。而司分四科如舊。四司名郎中員外主事。所添設繁簡。視所司劇易。無常員。而以兩直隸之貢賦分理之。外提督倉場尙書或侍郎一人。所屬衙門有寶鈔提舉司。提舉一人。正七。副提舉一人。從七。

抄紙局。廣積庫。承運庫。太倉銀庫。節慎庫。印鈔局。寶盈局。御馬倉。張灣批驗所。寶鈔廣直庫。贓罰庫。甲乙

丙丁戊字庫。外承運庫。行用庫。軍儲倉。各大使一人。正副使從九。或一人或二人。各司之職。以版籍稽賦役。

以墾荒業貧民。以占籍附流民。以畸零寄細民。以馴野馭羈縻之民。以圖帳抑兼井之民。以折劑米值。以平米均田稅。以布斂庸調。以桑棗課農官。以芻地給馬牧。以里老攝鄉社。以律誥嚴禁防。以給除差優復。以珍異儲上供。以鈔錠節恩賞。以限田裁異端。以賜田懷降虜。以封閉密砂鑛。以金穀累贓罰。以課程攔雜物。以關榷市船材。以引由嚴茶政。以權量和市易。以時估約均輸。凡獻產漏產。詭產。朋戶。析戶。逃戶。有禁。亂宗類。潘良賤。遊手。遊食。有禁。毀鈔。遏錢。有禁。諸王大臣毋得請常課。乞閑田。其諸大政詳專志。多戶曹事。而邊郎掌出納邊儲。五歲科道各一人。覈糾乾沒。凡鼓鑄。抽分。草場。糧餉。皆有專差。無定官。相應者。予敕遣。而諸提舉及倉庫。則各程其出納。簿錄其行績。隸焉。

立禮部。部尙書一人。擬春官。掌天下禮樂。貢舉。封建。朝貢。祭祀。宴饗。藝術。僧道之政令。敍辨諸秩。凡制令。敷奏。率其屬以贊於天子。侍郎二人。爲之貳。屬清吏司四。曰儀制。曰祠祭。曰主客。曰精膳。各郎中員外一人。主事二人。而主客提督四夷館者。主事一人。儀制掌禮文。宗封。學校。科貢之事。若天子卽位。立太子。冊皇后。妃嬪。上慈宮徽號。皆擬上其儀。報可。而令於諸司。凡朝賀。經筵。耕藉。視學。釋奠。皆舉儀制而上之。皇帝諭諸王外國百官。曰詔。制。敕。誥。書。凡五等。太皇太后。皇太后。曰詔。百官陳事於皇帝。曰表。奏。題。凡三等。太皇太后。皇太后。亦如之。於皇太子。曰箋。曰啓。皇后亦如之。皇帝批答。曰聖旨。皇太子曰令旨。太皇太后。

皇太后、皇后曰懿旨。親王亦曰令旨。天子太子諸王講讀朝賀。皆辨其等儀。而諸命婦朝賀亦如之。凡歲一封宗室王、郡王、將軍、中尉、妃、主、君。各以親疏爲等。凡監學條其規約。而歲貢、科舉、會試、殿試。皆條議上請。辨文移體式。上下曰照會。曰劄付。曰故牒。曰帖。下上曰咨呈。曰牒呈。曰呈。曰申。敵曰咨。曰關。曰牒。皆以印識。通上下。防奸僞。印文四等。曰玉箸。曰柳葉。曰九疊。曰八疊。及王章、夷王印。職宴饗。曰大。曰中。曰小。而郊宴最大。射禮二。曰大。曰宴。皆酌古禮而殺其儀節。凡冠婚辨其等類名數。官民服舍有定式。禁其踰僭。凡巡狩、親征、班師、策勳、行賞、第禮儀條上。凡祥瑞辨其物名類奏。大瑞特奏。無得請封禪。以蕩上心。以鄉飲酒禮讀律誥、訓禮讓。以養老尊高年。以卹貧宣仁政。以旌表彰勸勵。以建言議利病。以連坐譎戍。禁自宮。祠祭掌祭享、獻薦、天文、國卹、廟諱、術藝、異教之事。凡祭有三。曰天神、地祇、人鬼。辨其大祀、中祀、小祀。而敬供之。飭其壇廟陵寢。數省閱之。獨其牢醴、玉帛、黍蕡、水陸瘞療之品。第其配侑從食。功德上下。凡國王、司府以下神祇。稽諸令甲。播百司而謹之。督日官、麻象而詳其徵變。凌犯。若日月食。豫移諸司而救之。大災異卽聞。次類聞。並乞修省。凡國喪若品官、庶人喪。皆辨其同姓、九族、異姓、母族、妻族親疏之等。而爲三年期、大功、小功、緦之制。皆傳古禮損益頒行之。凡諡。皇帝十七字。皇后十三字。皇妃二字。或四字。太子及妃二字。親王一字。郡王二字。勳戚文武大臣請葬祭贈諡。移諸司覈傳。公論定議。以聞。葬祭有差諡二字。其侍從勤勞死事官品未應諡。若夷王夷使得特諡。凡帝后愍忌祀於陵。輟朝不廢務。凡天文、地理、醫藥、卜筮、師巫、音樂、籍其人。毋得以術越境行妖妄。毋藏讖緯元象。凡僧道三年一度。度必通經咒。以周知冊。

檢其僞冒而嚴其禁令。凡樂曰中和韶樂。曰堂下。曰丹陛。曰侑食。曰大樂。凡雅樂屬於祠祭。太常領之。俗樂領於伶人。設教坊司奉鑾一人。正左右韶舞各一人。左右司樂各一人。未入流設俳長、色長、歌工、樂工、舞

人各專其業而籍用之。宮中女樂以教坊官妻提調之。主客掌戎夷朝貢往來宴賜之事。凡番夷辨其五年、三年、比年、年至、年再至之貢。與其貢物、貢途、貢使、豐約、遙徑、多寡之數。王若使至、賓待之。差其迎送、宴勞、賞賚、室廬、帳幕、食料之等。嗣封者爲請使頒冊於其國。諸大酋有保塞功者授冊印封之。以信符徵勸合。以金敕諭差發。以通事譯夷情。以開市平交易。以折計收番貨。以刑典禁交通。凡賜均賞特賞各有差。凡域中歲徵其方物有常式。精膳掌宴饗牲牢酒膳之事。凡膳羞珍品酒醴光祿領之。會其數程其出納。凡馳宴辨職官品秩之等。凡番夷土官辨下程宴次食料多寡之等。凡廚役僉諸民。次僉諸王府典膳之。久次者凡歲藏冰出冰移所司謹潔之。諸皆贊尙書。首領曹屬如天官。而鑄印局大使副使隸焉。立兵部擬夏官尙書一人。掌武衛官軍選授簡練鎮戍廐牧傳郵輿阜之政令。經戎馬之治。凡制命數奏。率其屬奉其職業以贊於天子。侍郎二人爲之貳。京營戎政或尙書侍郎一人協理之。屬清吏司四。曰武選。曰車駕。曰職方。曰武庫。武選掌武官選陞襲替功賞之事。凡世武官九等。曰指揮使、同知、僉事、正副千戶、衛鎮撫、實授、試百戶。所鎮撫。凡流官都督三等。都指揮三等。不得世。卽有世出特恩。凡歲選六官二等。曰新。曰舊。官皆有世流。世曰襲。曰替。其幼也。曰優給。以厚武功。不得世者。曰減革。曰通革。非眞授者。曰試。

職。曰署。曰納。有以銜以清冒濫。凡首功四等。曰虜。曰夷。曰番蠻。曰反賊。凡戰功二等。曰奇。曰頭。凡賞二等。曰加。曰量。以辨武功。凡推陞勳臣。若武舉薦舉會舉。以二人請。凡將材。三歲以子午卯酉年武舉。比鄉試。辰戌丑未年武會試。亦廷試。其前列者。放榜傳臚。六歲會舉。歲薦舉。皆籍而用之。凡士官六等。曰宣慰。宣撫。招討。安撫。長官。千夫長。其子弟族屬。若妻壻女甥。皆得授。從其俗。凡夷官自都督及鎮撫。凡十四等。皆以誥敕辨冒僞。凡傳陞乞陞非軍功陞者。得執奏。以考選比試併鎗達材而程力。以効功課將領。以遞降練卒徒。以貼黃正圖狀。以初績徵誥敕。以褒卹勵死戰。以優養恩故絕。以引類登選簿。以殺降。失陷。避敵。激變。肅軍機。以典刑。敗倫。行劫。退陣。斷世祿。以寄祿。馭恩倖。以覆訊。糾捕緝車駕。掌輿輦。車乘。守衛。廢牧。郵傳之事。凡大朝賀大禮儀。陳鹵簿大駕。常朝設陞。辨其物數而序次之。凡侍衛殿陞全直。常朝番直。凡守衛親軍。衛畫前左右後四行。而日夜巡鑿之。皆有團伍。定其多寡。第其番之上下。慈宮中宮之鹵簿。東宮儀仗侍。皆屬焉。凡衛直有勳戚武官。勳衛將軍。力士。校尉。凡馬政受牧官籍帳。而程督其登耗。闌逸之數。以營牧節芻牧。以印俵防欺冒。以色齒覈抵謾。以糧馬征南夷。以茶馬通西番。以市馬靡胡虜。皆以足軍實。令京營邊鎮毋乏馬。凡傳郵曰水馬驛曰遞。運所在京曰會同館。皆以符驗關券行之。以黃馬快船致貢獻。練水軍。職方掌地圖。軍制。城隍。鎮戍。簡練。征討。關津之事。凡地圖諸邊腹疆界地里。遠近險易。三歲一報。官軍車騎之數亦如之。而辨其扼塞守禦之令。凡軍制內外相維。自五府司衛所以達夷官。各統其官軍及部落聽征調守衛朝貢保塞之職。都督府五。都指揮使司二十一。留守司二。衛四百九十一。守

禦屯田羣牧千戶所三百十一。儀衛司三十三。宣撫招討宣慰安撫長官司九十五。番夷都司衛所四百有七。皆隸焉。凡城隍以時濬築閱視之。凡鎮戍將校五等。曰鎮守。協守。分守。守備。備倭。其官稱曰總兵。副總兵。參將。遊佐。擊將軍。曰都指揮。曰行都指揮。凡六等。以時飭屯防扼險要。程將校之勤逸。稽其什伍存逸。械精頓之數。教以坐作進退疾徐疏數之節。金鼓麾旗之號。凡征討。請命將出師。移所司以懸賞罰。調兵食。紀功過。軍有功。聽御史紀覈。移武選陞賞。以保塞障邊徼。以烽堠傳消息。以清句驗補收塿。問發冒漏。除豁覈冊籍。以存恤優初役。以壯快簡鄉民。以關津詰奸盜。武庫掌戎器符勘尺籍。武學薪隸之事。凡戎器守衛邊鎮。若征行。准諸司移工部請給火器。請內府凡使人出邊關。先驗勘合。凡制敕調邊兵。必比勘合。勘合皆出內府。凡尺籍。衛所上缺伍圖冊。府縣上軍戶文冊。下諸省司按句。衛所卽去府縣。近不得輒相移。凡清軍。以跟捕紀錄。開伍結除。停句嚴稽其冒漏。而寬其恩復。凡武學教武職幼官及子弟未嗣官者。籍其功能。歲終檢奏。六年一會舉。應文武舉者聽。怠不率教者。罰黜有差。凡阜隸直衛柴薪二等。辨官品而多寡其數。並顧役。諸皆贊尙書。諸首領曹屬官如春官。而山海關設主事一人。京衛武學有教授一人。訓導一人。皆未入流。以進士爲教授。准其甲第。會同館。大勝關。皆有大使。正九副使。從九成隸焉。

立刑部。部尙書一人。準古秋官。掌天下刑名徒隸句覆關禁之政令。凡制命敷奏。率其屬奉其職業。欽恤明慎。以贊於天子。侍郎二人爲之貳。置十三清吏司。如戶曹主兩京十三省之奏。當司郎中員外各一人。

主事各三人。漕運理刑主事一人。司務二人。照磨所照磨一人。正。檢校一人。正。司獄司司獄一人。未入。而

照磨所照刷文卷。紀錄賊私。諸司如宗室、勳戚、官吏、軍民、蠻夷、麗於法者。詰其辭。察其情。僞傳律例。而比其罪之重輕。律例所不及者。上下附而以請。凡天下歲讞其死罪刑平之奏。凡詔獄。必附律例請上裁。凡應減者。下就輕。應加者。上就重。重不得至死。凡律例有殊旨。別敕、詔例、榜例。非經請議。著令者。不得引爲比。凡死刑卽決及秋決。並三覆奏。蒞戮於市。凡贖罪視罪重輕爲差。死罪雜犯。從未減者。聽收贖。凡簿錄俘囚。配沒給賜。官私奴婢。必籍知之。凡籍產。不得及其先墳塋。凡賊罰計估。易銀歲鈔。類入內府。凡獄成。移大理寺讞評焉。凡訴冤。外內皆自下而上。急者擊登聞鼓。凡重囚。京師歲霜降會。五府九卿科道共慮之以請。情真者決。矜疑者戍邊。有詞者調所司再問。比律者監候。五歲請赦。遣官出京府兩京十三省審錄。曰恤刑。減釋冤濫者。凡夏月錄囚。免笞刑。減徒流而下刑。辨重刑。凡提牢月更主事一人。葺圉圍。固械繫。而時其飲食。有病醫藥之。凡官有過紀錄之。兩京歲抄。請赦湔除紀過。凡大祭祀止行。凡四方有獄。受命而往成之。以名例攝律條。以准皆各其及。則若入者。括律詞義。以五服參情法。以墨涅識竊盜。宗人。不卽市。宮人不卽獄。悼耄癡殘。不卽訊。皆以贊尙書。

立工部。部尙書一人。準古冬官。掌天下工役農田山川澤藪河渠之政令。凡制命敷奏。率其屬奉其職。經制規畫。以贊於天子。侍郎二人。爲之貳。其屬清吏司四。曰營繕。曰虞衡。曰都水。曰屯田。營繕掌經營興造。

之事。凡大內、宮殿、陵寢、城壕、壇場、祠廟、廨署、倉庫、營房之役。鳩力會財。而以時督程之。王邸亦如之。郡王而下。與邸資有差。凡鹵簿、儀仗、樂器。移內府及所司。各以其職治之。而以時省其堅潔。董其竄濫。凡置獄具。必如律。凡工匠二等。曰輪班。曰住坐。凡工囚二等。曰正工。曰雜工。雜工三日當正工一日。凡省工。視役繁簡。而節其財力。凡會有無。移內府。虞衡。掌山澤。採捕。厲禁。陶冶之事。凡採捕禽獸及革骨羽毛。以供祭祀賓客。精膳羞。凡軍器軍裝。移內府及所司。歲造或三歲二造。必程其堅緻。以給邊。凡獵政。以時。冬春之交。置罟不施。山澤春夏之交。毒藥不施。原野苗盛。禁蹂躪。穀登。禁焚燎。若害田稼。獸聽爲陷。穿獲之。賞有差。凡禽獸水課。禽十八。獸十二。陸課獸十八。禽十二。凡諸陵山麓。不得入斧斤。開窆治。置墓墳。凡帝王聖賢。忠義名山。嶽鎮陵墓祠廟。有功德於民者。禁樵牧。凡山場園林之利。聽民取而薄征。凡陶冶盜鑿。籍其常造年造之數。計其入。慎藏之。無輒毀。以費民。凡鑄造。審其模範。計銅鐵而鎔之。金牌信符。鑄之內府。凡鑄錢。當十。當五。當三。折二。小錢。凡五等。鼓鑄於京師。及重鎮。凡顏料。徵土產。不強其所無。否徵其直。都水掌川瀆。陂池泉灤。洪淺道路。橋梁舟車。織造。券契。衡量之事。凡水利。曰轉漕。曰灌漑。歲儲其金石木竹。卷掃以時。修其閘壩。礎淺堰圩。隄防。謹蓄洩。以備旱潦。無使壞田廬墳隧。禾稼舟楫。磴碾。不得與灌田爭利。灌田者。不得與轉漕爭利。凡水役。以農隙急則驟理之。凡水要。會京朝官專領之。以督有司。凡鱗介。萑蒲之利。聽民取之。而薄征之。凡道路。塞其坑坎。上巡幸。若大喪大禮。治而新之。凡橋梁。曰舟梁。曰石梁。計工力而創修。其大津不能梁。官給舟人。量其大小。難易而食之。凡舟七等。曰黃船。曰馬快船。曰海連船。曰洋

船曰備倭船。曰戰船。曰糧船。糧船之用最急。費最大。皆會其財用。下諸司酌其多寡。久近勞逸而均劑之。凡車三等。曰大車。曰小車。曰戰車。亦如之。凡織造冕服。誥敕制帛。祭服淨衣。諸幣布。移內府南京諸省供之。周知其數而慎節之。凡公侯伯鐵券。差其廣高。凡祭器冊寶乘輿牌符雜器。會則於內府。凡衡量。謹其較勘而頒之。懸式於市。屯田掌屯農。墳塋。抽分薪炭。夫役之事。凡屯田。腹邊公田。閒田。沒田。給衛所耕。劑其地力。人力而徵其子粒。官軍省餽餉。凡在邊牛犂諸器。官給之。凡墳塋。宗室勳戚文武官各有差。堂牌。碣獸亦如之。凡抽分。征諸商。率三十分取十五。取六。取五。取四。取三。取二。取一。凡七等。凡薪炭。南取洲汀。北取山麓。徵諸民有本折色。酌其多寡而撙節之。凡夫役。伐柴。轉柴。皆僱役。周知其數而時蠲之。首領部曹官如夏官。諸皆以贊尙書。若營繕所所正一人。正七。副二人。正八。丞四人。正九。文思院。軍器局。皮作局。寶源局。鞍轡局。廣積。通積。通州。白河。抽分竹木局。織染所。雜造局。蘆溝橋。抽分竹木局。各大使一人。副使或一人。或二人三人。大通關提舉一人。正八。典史一人。未入流。隸焉。

立都察院。先是吳元年設御史臺。從一品。設左右御史大夫。御史中丞。又有侍御史。治書侍御史。殿中侍御史。經歷。都事。照磨。管旬。監察御史。譯事。引進使。洪武十三年。改正二品。設左右中丞。是年罷御史臺。至十五年。改曰都察院。正七品。設監察都御史八人。分設浙江等十二道監察御史。正九。鑄監察御史印文曰

繩愆糾繆。十六年。進正三品。設司務。十七年。陞正二品。定設都御史副都御史僉都御史。建文罷左右都御史。設都御史一人。副僉都御史各一人。改爲御史府。設御史大夫。正革十二道。置察院一。御史二十八

人。改諸御史爲拾遺補闕。太宗卽位復故。其北平貴州交趾雲南改置之。若巡撫則本於懿文太子巡撫陝西。取巡守撫軍之義。永樂中。遣文臣若尙書侍郎通政參議少卿寺丞。皆得奉敕行事。景泰始定用憲職。自後必以都御史卽尙書侍郎必兼之在京。於是設左右都御史二人。正準漢御史大夫。左右副都御

史二人。正左右僉都御史四人。正準古中丞。其屬司務二人。從經歷司經歷一人。正都事一人。正照磨所

照磨一人。正檢校一人。正司獄六人。未入在外則邊防山海之重。各設都御史。皆右。或都或副或僉。無定

銜。總督則陝西宣大薊遼各一人。總督漕運兼巡撫江北一人。總督糧儲兼巡撫江北一人。總督南京糧儲一人。提督軍務兼巡撫兩廣南贛保定山西各一人。總理河道一人。贊理軍務兼巡撫陝西一人。提督軍務兼巡撫浙江福建甘肅寧夏延綏大同宣府遼東湖廣四川雲南貴州各一人。整飭薊州邊備巡撫順天一人。撫治鄖陽一人。巡撫河南山東江西一人。至鹽法屯田督餉採木討賊禦虜總制經略巡視無常員。左右都御史主天子耳目風紀之司。率其屬肅紀守法。以贊於天子。副僉都御史爲之貳。凡大臣奸邪小人構黨作威福亂朝政者劾。凡百官猥茸貪冒壞官紀者劾。凡學術不正上書陳言變亂成憲希

進用者劾。而朝覲考察。都御史入天官臺。司賢否黜陟之。斷大獄重囚。會鞠於外朝。或奉旨同刑部大理寺讞平之。其奉敕內地拊循。外地防鎮。各以其敕行事。屬十三道監察御史一百三人。正有十人、八人、七

人、二人、凡四等。主察糾內外百司之官邪。或露章面劾。或封章奏劾。凡差在內京畿道刷卷。巡營軍提學。清恤軍。巡視光祿。巡倉庫城門。在外巡按清軍。刷卷。巡鹽茶河關屯田印馬。師行則監軍紀功。各以其事專監察。差三等。點差上二人。奏差上一人。劄差不請上。諸差惟巡按爲代天子狩。最雄要。轄所按藩服大臣。若府州縣官。諸考察舉劾尤專。興利去害。大事奏裁。小事立斷。而河南道掌印者。獨柄諸內外考察。凡朝會糾儀。祭祀監禮。凡政事得失。軍民利病。得直言無避。凡罪囚按巡審錄。有故出入。理辨之。凡大獄敕下臺。推奏當上聽裁。常獄擬罪移評大理寺。凡有大政。集闕廷預議焉。凡推陞亦集。知不可輒論止。蓋六部至尊重。然有專司。而都察院惟所見聞得糾劾。無職司。總憲綱。諸御史糾劾。務明著實迹。開寫年月。毋虛文泛詆。訐拾細瑣。抑戒令慎重焉。而御史差竣復命。都御史覆其稱職不稱職。以聞而釐降之。又御史犯罪加三等。有贓從重論。經歷都事典出入文移敍差。御史司務典參謁受事。照磨檢校典磨勘卷宗。立通政使司。明初設察言司。設司令。尋革。始置通政使司。如今官。建文中。改通政卿。少卿。寺丞。增置左右補缺。左右拾遺各一人。永樂初復故。設通政使一人。正三。左右通政各一人。正四。左右參議各一人。正五。膳黃右

通政一人。經歷司經歷一人。正七。知事一人。正八。

正八。通政使準古納言。掌出納帝命。通達下情。凡諸司出入移狀。

奏報。與四方臣民建言。陳悃之實。封及軍情聲息災異。皆審署參覆。而上下焉。左右通政及參議爲之貳。

凡日常朝引奏人。凡事月終類奏。歲終通奏。凡四方雨澤。歲杪面奏。凡錯誤籍而類請之。凡在京獄訟詞。

狀。判送法司推問。凡出入文移。以驗正之記。日照之記。記之。騰黃者。錄武官黃於內府。核其歸附。征充。陞。

轉。衛所世流。替襲之故。以徵選事。經歷知事典勘對題奏移狀。立大理寺。吳元年。初置設卿。少卿丞。評事。

尋革。復改設審刑司。又置磨勘司。洪武十七年。復大理寺。與刑部。都察院。審刑司。五軍斷事司。並爲貫城。

尋罷。審刑司等。獨與六部都通稱九卿。陞正三品。二十九年。革。建文中。復置。永樂因之。設卿一人。正三。準古。

廷尉。少卿二人。正四。丞二人。正五。寺分左政令。少卿丞爲之貳。贊天子事。正七。卿掌審讞。允反刑獄之右。置左右。

寺正。正六。寺副。正六。評祥刑。與刑部。都察院。並列爲三法司。凡刑部十三道推問刑名。按律例。慮而復問其狀。

款。服則決之。否則駁訊。必服乃決。每歲會九卿朝審重囚。凡錄囚徒。會刑部。都察院。司務典出納文移。左。

右寺分理京畿十三省刑名之事。凡刑部十三道有刑名。則據其由狀訊其人。合律例。若囚服准擬。否駁。

再擬改正。曰照駁。三擬不當。糾問官曰參駁。悟律冤甚者。移調問。曰番異。再異則請下九卿會問。曰圓番。

已平允。慮未當。移再問。曰追駁。不改者。徑請奏上裁。曰制決。凡各省三司直隸。死刑並讞。乃聽決。撫按按。

察惟死刑呈刑部轉讞。凡笞杖罪移審。徒流以上奏審。若律例無正條。上下比請。曰類奏。平反刑獄狀。南京有重囚平審而類奏亦如之。

殿閣大學士。明初倣宋制。始設以吏尙書邵質。檢討吳伯宗。爲華蓋武英殿大學士。翰林學士宋訥。典籍吳沈。爲文淵閣東閣大學士。皆侍左右備顧問。然不得平章軍國事。如異時。已召耆儒鮑恂。張長年。俞銓。至。命爲文華殿大學士。三人辭不就。而殿閣大學士始於此。太宗入踐極。念機務殷重。欲廣聰明。措天下於理也。開內閣於東角門。簡翰林待詔解縉爲侍讀。擢中書舍人黃淮。王府審理楊士奇爲編修。進修撰。胡廣爲侍講。編修楊榮爲修撰。召戶科給事中金幼孜。桐城知縣胡儼爲檢討。皆以翰林院銜入直文淵閣。爲耳目腹心。日百官奏事退。內閣臣造展前密勿謾畫。率漏下數十刻始退。諸六部大政。咸共平章。秩五品而恩禮賜賚與尙書埒。蓋內閣豫機務自此始。是時閣中有文淵閣印章。獨與諸司異。凡封進詔草。若登答章奏用之。不得下諸司。卽下諸司。以翰林院印行諸司。上內閣亦獨稱翰林院。而翰林院爲內閣官。已上命吏部言。內閣臣侍朕久。繼自今考滿直內閣者勿補外。益尊重。然其後縉爲交趾參議。准傳下詔獄早卒。士奇榮幼孜事。上二十三年。官五品不遷。蓋嚴慎如此。而制三公三孤不以授。仁宗渙焉淵衷。復命公孤官。謂侍臣曰。此皇祖制也。皇考明聖。可無須此。朕沖人歷天下事日淺。豈自謂能。無保傅何望。已又設謹身殿大學士。旣又建宏文閣。諭大臣曰。卿等各有職務。朕欲得學行端謹老儒數人。日侍燕閑。備顧問。可咨訪以聞。士奇等以翰林侍講王進。蘇州儒士陳繼對。命學士傳旨。繼授五經博士。掌閣事。進

佐之尙書義舉學錄楊敬訓導何澄敦實卽授敬編修澄給事中皆直宏文閣於是華蓋謹身武英三殿及文淵閣東閣俱有大學士而東閣文淵閣大學士不得旨入內閣亦不得預機務也正統初英宗以幼沖在位閣學士溥士奇榮協力翊輔適當盛葉而天下又康然初政本在殿閣後閣振得柄大社幾搖蓋自是中書大權與中禁大璫內外相低昂時爲輕重矣景泰時都御史文實以孤卿入內閣而內閣大學士始領吏尙書兼保傅銜職機務如故而益隆重然猶修撰贊善通參少卿少詹皆得入內閣預機務乃後部尙書若卿必夙處禁林列吏禮者乃得入餘臺省不與矣嘉靖中天子自聖神於殿閣臣以獨斷專拔擢而博疇咨於會推時有負違旋就屏逮已改名奉天殿爲皇極殿華蓋爲中極謹身爲建極而大學士因名官如初文華武英文淵閣東閣俱設大學士凡始進必以東閣著爲令乃隆慶初大學士拱以青宮恩領少師入內閣出筦吏部則奧樞內秉大鈞顯兼至萬歷初大學士居正亦以青宮恩在內閣身都師相代天言工天下震焉蓋職業崇於中書體統尊於三公省府之名雖廢而閣權甚隆儼然周宰漢相上矣天啓中權璫內閣煽虐內閣多所私置大約類首聽鼻息及崇禎以意用人殿閣雜進無相業可紀國觀以直見棄延儒以貪見棄蔣陳棄主於臨危藻德駢首於賊黨而內閣之爲內閣可知已制大學士

五. 正 預機務者主出納帝命奉規陳誨獻納謨猷六部百司諸題奏入擬議批答以平庶政不得專制九卿九卿奏事亦不得相關白凡上所下曰詔曰誥曰制曰敕曰冊曰諭曰書曰符曰令曰檄皆審署申覆而

調劑焉。平允乃行。凡下所上曰題。曰奏。曰啓。曰表。曰箋。曰講章。曰書狀。曰文冊。曰揭帖。曰制對。曰露布。曰譯。皆審署申覆而裁畫焉。平允乃下。經筵則知其事。東宮出閣講讀則領其事。修實錄。史志諸書則充總裁官。實錄成呈訖。焚其草。禁中凡宗室請名請封。及諸臣請諡。並擬上。凡圖書繕寫校讐。皆課而察之。凡郊祀巡狩。扈上行。凡累朝御文實錄寶訓玉牒之副。若古今書籍。皆籍而藏之。凡會敕。稽其由狀敘述。上請。凡會試。廷試。國子生課。歲貢生試。譯子生試。皆總領之。選庶吉士及課試。皆主其事。品第高下爲去留。凡制敕詔旨。誥命冊表寶文玉牒講章碑額題奏揭帖。凡應機密文書。及王府敕符底簿。下制敕房書辦。凡文官誥敕番譯敕書并彙書揭帖紀功勘合。皆稽按典故。起草進畫。下誥敕房。兩房設典籍各一人。從

中書舍人無定員。有試職。有實職。司書辦事。若漏洩稽緩。遺失妄誤。皆有罰。

乃重翰林院。吳元年。置翰林國史院。正三。設學士承旨。學士。侍講學士。侍讀學士。直學士。典籍。待制。修撰。應

奉。編修。典籍。檢閱。尋改翰林院。尋更正五品。革承旨。直學士。待制。應奏。檢閱。典籍。設孔目。五經博士。侍書。待詔。檢討。乃命諸翰林官。考駁諸司章奏。後止。設學士等。如今官。又有祕書監。宏文館。及起居注等官。未幾皆革。以本院各官兼之。建文中。增學士承旨一人。文學博士二人。省侍講。侍讀學士。置文翰。文史二館。文翰館設侍書。文史館設修撰。編修。檢討。太宗復故。乃選庶吉士。初稱中書六科庶吉士。又有承敕監。庶吉士。尋獨於新進士選擇而教養之。無定員。試而留者。二甲爲編修。三甲爲檢討。不得留者。爲給事中。御

史主事。或出爲州縣官。乃定爲翰林院官。定設學士一人。五品侍讀學士二人。侍講學士二人。皆從五品爲正官。

侍讀侍講各二人。皆正六

五經博士五人。正八

侍書二人。正九

待詔一人。從九

爲屬官。修撰。從六

編修。正七

檢討。從七爲史

官。而孔目一人。

未入流

爲首領官。自明初陶安以翰林學士謀猷文章。潤色鴻業。尋開文華堂。選天下舉人

年少質美可進學者張唯等。擢翰林編修。入肄業其中。詔宋濂桂彥良爲之師。上政暇輒幸堂考業。而光祿日給饌。皇太子諸王日迭主。賜冬夏衣及白金鞍馬。已又選成均之秀者入武英堂。俾習聞政事。尋擢給事中。其後旣罷中書省。監察御史許士廉請復三公府。不聽。而命翰林春坊入看詳。諸司奏啓平駁之。平允則列名封進。署曰翰林院兼平駁。諸司文章某官某進。蓋隱然古中書之職。已定品級。而學士掌詞翰禮文章詔敕。詳正圖籍。考議制度。以文章備顧問。出入侍從參謀議。凡經筵日講修書。皆承受而統領焉。先是學士於翰林院獨坐。及大學士進殿閣領公孤。而翰林院中惟大學士座三。稱中堂。學士位西東面。掌院篆於諸司。獨尊重。講讀職專講讀經史。五經博士業專經。佐講讀事。待詔主應對。侍書以四體侍上書。於唐爲供奉官。典籍守古今書籍。史官掌修國史。摛制誥敕命。代天言。凡天文地理宗潢禮樂兵刑諸大政。上所下語。皆籍而記之。以備實錄。爲上心簡注者。得入內閣預機務。兩直及大省會鄉會試。充主考及同考官。每經筵日講召對。皆從閣臣後。記注起居及密勿謨議。分曹纂諸司章奏題覆。月封送內閣。

藏與諸大臣皆無所統。得抗禮九卿。詹事坊局皆兼翰林銜。

建詹事府。設詹事一人。正三。少詹事二人。正四。府丞二人。正六。屬官則有主簿。從七。錄事。從九。通事舍人。未入流。

立左右春坊。以文華殿東西廡爲署。設左春坊大學士。正五。庶子。正五。諭德。從五。中允。正六。贊善司直。從六。清紀郎。從七。

司諫。從八。右春坊亦如之。

立司經局於東宮之左。設洗馬。從五。其屬則有校書。正九。正字。從九。

以上四衙門皆宮僚。不相統攝。詹事左右春坊司經局各有印。一切文移。不相關會。明初太祖建大本堂於東宮。近華蓋殿。取古今圖籍充其中。召四方名儒教皇太子諸王。皇太子居文華堂。諸儒專經面授。分番進直。迭班侍從。上時時賜宴賦詩。商榷今古。評論文學。當是時有同知詹事院事。副詹事。左右詹事。詹事丞。左右率更。率府使。副使。洗馬。庶子。皆勳舊大臣兼之。不別設府僚。已又改贊善爲贊善大夫。增贊讀。又置通事司。設司令。司丞。左右司直郎。左右清紀郎。最後始置詹事府。列署於外。設左右春坊於內。司經局於東宮。成化中始以春坊在清密地。一切行各衙門揭投領不便。寄署並詹事府。先是洪武中。制令春坊翰林院日二人進講諸書。纂述始終大義爲講章。呈上覽。已赴文華殿爲皇太子陳說。太子三師三少詹事府。鴻臚寺官各一人侍。召則同入。有留身獨進者。給事中司直清紀郎劾之。而上日所處分府部軍

國諸大務。及撫諭四夷恩禮。左右春坊官日陳說於東宮。已又選秀才張宗濬等隨宮僚分直文華殿侍讀。畢進說民間利害。田里稼穡。古今孝弟忠信文學材賢諸故事。尋命廷臣舉口義篤行之士充東宮官。建文中。增少卿臣各一人。賓客一人。又置資德院。設資德一人。資善二人。其屬贊書贊讀著作郎各二人。掌籍典簿各一人。永樂初復故。左右春坊大學士典東宮奏請啓箋講讀之事審慎。而與殿閣大學士相頡頏。監省之庶子諭德中允贊善各以其職爲之貳。凡東宮監國撫軍出狩。及朝會出入。覆啓靈諾審署。皆移文詹事會行。凡祥眚啓告。若伶僕改變新聲。導逢非禮者。陳古義申典制糾正之。請責遠其人。凡內外庶政可爲規諷者。隨事贊諭。司直主彈劾宮僚。糾舉職事。清紀郎佐之。司諫掌拾遺補過。以鑒誠爲箴。誨。司經局洗馬掌經史子集制典圖書之事。而校書正字掌繕寫裝潢。詮其訛謬。調其管切焉。除屬官外。府坊局官皆以翰林官兼爲之。或以尊兼卑。以卑兼尊。皆以尊銜列焉。

明書卷六十六

志十

職官志二

太子太師。太子太傅。太子太保。

俱從一品。

太子少師。太子少傅。太子少保。

正二品。

太子賓客。

正三品。

皆東宮大臣。而舊

蒞詹事府。明初以勳舊兼領之。建文立爲皇太孫。以公輔大臣兼宮師保爲尊重。後不蒞詹事府。三太以道德輔教太子而謹護翼。三少奉太子以觀三公之道德。而教諭賓客侍太子規誨。贊相禮儀而先後之。其後無專授。獨爲勳戚大臣兼官加官贈官。

重國子監。監有祭酒一人。

正四。

掌國學。舉人貢生。官生。恩生。功生。例生。彙生。幼勳臣。教訓之事。司業一人。

正六。

爲之貳。修古樂正成均之政令。造以明體適用之學。以孝弟禮義忠信廉恥爲之本。以六經諸史爲之業。教以隆師親友讀書寫字。有不率者扑之。不悛徙誦之。以升堂積分及格敍用之法。而勵益之。以廩饌贍師生。以力用給廚膳。以賜予市恩賚。以寧假悉人情。以撥歷練吏事。以考選汰冗濫。歲中春秋上丁日記。

先師則總其禮儀。上謁先師。幸太學。祭酒司業執經進講。有講章。其屬有監丞一人。正八坐繩愆廳。參領監

事。諸師生怠不率教。及廩膳不潔。並糾懲。書識之。而堅明其約束。博士。從八坐博士廳。分經訓授。助教。從八學

政。正九學錄。從九坐正義崇志廣業修道誠心率性六堂。專教訓。嚴程課。講說經義道約之規矩。典簿一人。從八

典出納文移。受支金錢。為師生饌。季報諸生課業。做書。以聽於翰林。歲杪奏上。典籍。正九掌經史子集及制

書。掌饌一人。未入流掌飲食師生。於是禮部尚書侍郎翰林詹事春坊司經局。若國子祭酒司業官。聯相流

通而遷補。因之獨稱華重焉。祭酒司業例不坐彝倫堂南面。以帝會幸學。設御座。惟東面西面。而其署亦

遂稱曰東廂西廂云。

太常寺專祭祀禮樂之事。卿一人。正三少卿二人。正四提督四夷館少卿一人。寺丞二人。正五典簿二人。正七博士

二人。正七凡天地神祇之祀饗。總其官屬。籍其政令。以聽於禮部。贊天子致虔。先歲孟冬。進來年祭日。上御

正朝受之頌諸司。凡上躬祭。贊相禮儀。大臣攝亦如之。若祭先朝諸省牲大祀。上先省。大臣繼省之。進版

銅人上殿奏齋戒。凡薦新品物。移光祿寺共。凡國有冊封冠婚營繕出師。歲時有旱澇。國有大災。請告於

郊廟社稷。凡親王之國。若朝還告謁辭於廟。凡祭滌器。爨理香燭。玉帛帳幄。必恭潔。玉三等。制帛五等。牲四等。樂四等。舞二。辨其名類而奏共之。凡樂器不徒。而陵園之祭無樂。凡祭掌祭。掌燎。看燎。讀祝。奏禮。對引。司香。進俎。舉麾。陳設。收支。導引。設位。典儀。通贊。奉帛。執爵。司尊。司彝。洗。卿貳屬各共其事。凡宴會。率其屬奏樂。提督四夷館。八卿掌譯書之事。以聽於翰林院。凡八館。曰韃靼。女直。西番。西天。回回。百夷。高昌。緬甸。以國子生充釋字兼。官民子弟。時教其業。裁倖進焉。典簿。典句。校金穀。查視禮數。省署文移。博士講習禮文。請上填祝版名。大禮導贊其儀。所屬有神樂觀提點一人。正六。知觀一人。從八。領樂生舞生而時教肄之。

進退其考。贊禮郎九人。正九。設君臣之位。以奉祭祀之禮。拜跪之節。皆贊導焉。而承傳之。協律郎二人。正八。司

樂二十人。未入流。考協雅樂。凡舞人音聲人。籍覈其名數而審肄之。凡淫哇凶慢之聲及舞失節者。皆禁糾

之。凡上至祀所。夜警晨嚴。凡祭先期演樂於太和殿。其天壇設司祭署奉祀一人。從七。祀丞二人。從八。典守壇

場殿宇廚庫林木。時灑掃之以供其祀事。地壇朝日夕月。祈穀殿亦如之。凡祖陵。皇陵。孝陵。及長陵以下諸陵。顯陵。俱設祠祭署。各奉祀一人。祀丞二人。而本寺復有犧牲所。設吏目一人。從九。凡三祀牲牢咸有數。

養而滌之。籍田收穀。納於神倉。供五齋三醴之用。穰藿飼牲。

光祿寺。明初置宣徽院尙食尙禮二局。設院使同知。院判典簿。統二局。尋改光祿寺。正四品。移太常司供需庫隸之。移置法酒庫內酒房。又改寺爲司。陞從三品。置大官珍羞良醢掌醢署。設令及丞監事。又設孳牧所。革局庫。又復爲寺。改令曰正。又設司牲局。改孳牲所曰司牧局。定設卿一人。從三。少卿二人。正五。寺丞二

人。從六。其屬典簿一人。從七。錄事一人。從八。分大官珍羞良醢掌醢四署。各署正一人。從六。署丞一人。從七。監事四人。

從八。司牲司牧局各大使一人。從九。寺卿掌祭饗宴勞酒醴膳羞之事。辨其名數。會其出入。量其豐約。以聽於

禮部。少卿寺丞爲之貳。凡祭祀。諸親牲進飲福酒胙。凡薦新供品物。凡喪葬供祭物。凡牲果嘉蔬。移上林苑。共不給。市諸民。視時估十加一。凡市直季支。凡貢獻果鮮廚料。省受之。凡器皿。移工部。若募工兼作之。歲省其成敗。凡宴待番夷貢使。差其等供之。凡傳奉宣索籍記而覆奏之。監以科道官各一人。大官供祭祀。宮膳。節筵。給夷。濟貧之事。珍羞供宮膳茶飯。良醢供殿獻宮膳。均給內外官人夷匠之事。掌醢供祭祀。齋禱茶飯之事。司牲司牧職養牲。眎其肥瘠而蠲滌之。凡廚役久得爲王典膳。移吏部。

太僕。古官也。明初寺設於滁州。及定都。設於京師。而滁山西陝遼東並爲行太僕寺。若苑馬寺治焉。設卿

一人。從三。少卿三人。正四。寺丞八人。正六。後省五人。其屬主簿一人。從七。常盈庫大使一人。正九。卿掌牧馬之政。令以

聽於兵部。少卿則分督京營馬。若畿馬。及京衛山東河南大郡孳寄牧馬。寺丞佐之。三年更。凡牧人皆視

其丁產而授馬焉。蠲其賦役。乏則更凡馬肥瘠。登耗籍。其毛齒而時省之。三歲借御史往印烙。而差擇之。選其良。凡草場歲徵其租金。國災祲。出以佐市馬。凡租金。恩蠲或災蠲。不得兼。卽蠲必轉移相抵。不得虧軍賦。主簿。句省文移。庫則貯馬金。

鴻臚寺。明初爲侍儀司。尋改爲殿廷禮儀司。後定爲鴻臚寺。設卿一人。正左右少卿二人。從丞二人。從其

屬主簿一人。從司賓司儀二署。各署丞一人。正鳴贊八人。從序班五十四人。卿掌朝會賓客吉凶禮儀之

事。少卿寺丞爲之貳。凡日朝。朔望朝。大朝會宴享。經筵。進歷。進春冊。對祭祀。傳制。奏捷。百官四夷見謝辭。率其屬而供事焉。主簿典出納文移。司賓典四夷朝貢。曾渠領從。辨其等而教其拜跪之節。司儀典陳設。引奏禮儀。皆丞領之。鳴贊贊禮。有內贊。通贊。對贊。接贊。傳贊。凡五等。序班侍班。齊班。引人。舉班。糾儀。而外夷通事皆隸焉。

尙寶寺。明初爲符璽郎。周典瑞職也。設卿一人。正少卿一人。從丞三人。正卿職在禁廷。守寶璽符牌印章

而辦其所用。有事請於內。旣事。奉而藏之。少卿司丞爲之貳。凡寶十四。曰奉天之寶。以鎮萬國。祀天地。曰皇帝之寶。以册封賜勞。曰皇帝信寶。以徵軍旅。曰天子之寶。以祭享鬼神。曰天子行寶。以封賜夷蠻。曰天子信寶。以調發蕃兵。曰制誥之寶。救命之寶。用如其文。曰廣運之寶。以識黃選勘籍。曰御前之寶。以進御

座從車駕。曰皇帝尊親之寶。以答賜宗人。曰敬天勤民之寶。以調迪有司。凡用寶。捧寶。從寶。洗寶。與印綬。監俱。凡護守侍衛令牌之號六。曰申木火土金水。以警夜巡。金牌之號五。曰仁義禮智信。以嚴守衛。凡半字銅符之號四。曰承東西北。巡者左半。守者右半。合契而從事焉。凡銅牌之號一。曰勇。以稽巡卒。凡牙牌之號五。曰勳。曰親。曰文。曰武。曰樂。以察朝參。凡祭牌之號三。曰陪。曰供。曰執。以謹祀事。凡雙魚銅牌之號二。曰嚴。以肅直衛。曰善。以潔祀壇。凡符驗之號五。曰馬。曰水。曰達。曰通。曰信。以給傳郵。通制命。後官多恩。蔭寄祿。無常員。

乃重六科之選。明設給事中。後隸承敕監。尋改隸通政司。洪武十三年。置諫院。設左右司諫各一人。左右正言各二人。十五年。增諫議大夫。尋更給事中。又改元士。共八十一人。又稱源士。謂政事本原也。二十四年。始置六科。設給事中。從八以給事本古門下省掌封駁之官。乃特重之。列署於掖門內。稱最親近。已又遷

掖門之兩翼。後定分六科。如六部名。科各都給事中一人。正七左右給事中各一人。從七給事中吏四人。戶八

人。禮六人。兵十人。刑八人。工四人。從七後減科。視事繁簡爲定員。爲天子親吏。掌侍從規諫。補缺拾遺。分察

六部百司之事。而糾其弊誤。凡制敕宣行。大事覆奏。小事署而頒之。有失封還執奏。凡臣民所上章。下讀而署之。駁正其違誤。而主德闕達。朝政得失。百官賢佞。小許專達。大許聯署奏聞。凡朝。六科輪一人立殿

左右珥筆記旨。凡大事廷議。大臣廷推。大獄廷鞫。六掌科皆與。凡諸司題奏。日附科籍。不可行者鈔參之。五日一銷。註覈稽緩。朝參門籍。六科流掌焉。內官傳旨下。覆奏得旨而施行。朝覲考察拾遺。然秩僅七品。而地親切。專糾駁。防專恣之漸。稱清要職。

中書科中書舍人。

從七

先是本中書省官。後改直省舍人。罷中書省。隸承敕監。監革。復中書舍人。建文中。改

侍書。入文翰館。永樂初復故。存中書舍人二十員。而恩廕寄祿及文華殿東房內閣兩房。亦俱中書舍人。無常員。而進士銓除者恥並列。中書科無正貳。資深者握篆。掌書誥敕冊符鐵券。凡草請翰林院寶。請諸內府。左券寶籍歸諸古今通集庫。凡誥敕勘合。以急就章爲號。凡誥敕之號四。曰仁義禮智。曰十二支。曰文行忠信。曰千文字。滿則復周。權輕甚而爲清銜。科道多出其中。

行人司。明初設行人。左右行人。尋改行人爲司正。

正七

左右行人爲司副。

從七

更增行人三百四十五人。後定

行人正八三十六員。職專奉使之事。凡頒行詔敕。冊封宗藩。撫諭蕃夷。徵聘賢才。及賞賜。慰問。賑濟。軍旅。祭

祀。護大臣。皆序差焉。而司正司副多爲遷謫官。不出差。凡法司譴戍囚徒送五府者。眞精微。繳內府司。獨甲科得入。無雜流。稱清職。科道十常八九焉。

太醫院。明初爲醫學提舉司。改太醫監。尋爲院。設使一人。正五。判二人。正六。吏目一人。正九。御醫十八人。正八。其屬

有惠民藥局。生藥庫。各設大使一人。正九。副使一人。從九。院使總醫療之法。判貳之。凡診脈攻療調養。詳其所

宜而審慎之。凡醫術十三科。曰大方脈。小方脈。婦人。瘡瘍。鍼灸。眼目。口齒。接骨。傷寒。咽喉。金鏃。按摩。祝由。凡科有醫官。醫士。醫生。世傳科。習其業。按摩以消息。導引之法。除人病。祝由以咒禁。祓除已厲魅。後無傳矣。在內有御藥房。改聖濟殿。番直。擇術業精通者供事。凡調御藥。同內官。監視。合二服。爲一候。熟均二器。堂屬官。遞嘗之內官。又嘗之。其一進御。凡醫家子弟。擇而教之。三年試。五年試。再試三試。而黜陟之。凡藥材。辯其土宜。擇其良者而用進焉。

欽天監。初名太史監。設太史令。通判。僉判。校事郎。五官正。尋改爲院。設院使。同知。院判。五官正。典簿。雨暘司。時序郎。紀候郎。又改司天監。又置回回司天監。設監令。少監。監丞。餘如故。後改監令爲正議大夫。少監爲分朔大夫。五官正爲司元大夫。再定爲監正一人。正五。監副二人。正六。其屬主簿一人。正八。春夏中秋冬爲五

官各一人。五官正。正六。五官靈臺郎四人。從七。五官保章正二人。正八。五官挈壺正一人。從八。五官監候二人。正九。

官司廡二人。正九。五官司晨二人。從九。刻漏博士二人。從九。監正掌廡數天文星紀之事。監副爲之貳。凡日月星

辰風雲氣色之變異。率其屬而占候焉。密奏上。凡廡象圖書。非其職不得預。凡習業者分四科。曰天文。曰漏刻。曰回回廡。曰廡。自五官正下。至天文。生陰陽人。皆專科肄焉。凡觀象發臺。臺四面。面四人。凡歲進廡。

詳麻法志。凡營建、師旅、冠婚、陵寢、選地擇日。凡立春先期候氣於東郊。凡大朝賀，設定時鼓於文昭閣。報時鷄鳴，擊鼓。凡日月交食，先期算其時刻分秒，復起方位上聞，下禮部移內外諸司救之。按占書條奏，食不及一分，奏而不救。凡四季天象，占驗御覽天象錄，以時奏上。凡疇人世業，立師而教之。乏人，移禮部訪取，試而用之。五官正專理麻法造麻，司麻監候佐之。靈臺郎辨日月星辰之躔次分野，以占候天文之變。凡瑞星、妖星、瑞氣、妖氣，諸雜占，保章正佐之。挈壺正知漏刻，孔壺爲漏，浮箭爲刻。考中星，旦夜昏明之候，而漏刻博士佐之。主簿典文移。

上林苑監主苑園池畜牧種樹之事。先是洪武中，議開上林苑，比圖上，上覽之曰：「妨民業不可。」及永樂五年，始置苑，東至白河，西至西山，南至武清，北至居庸關，西南至渾河，並禁圍獵。設監正一人，正左右副

二人，正左右監丞二人，正其屬典簿一人，正良牧蕃育嘉蔬林衡四署各署正一人，正丞一人，正錄事二

人，正監正掌其事，副丞爲之貳。凡禽獸草木蔬果，率其屬督其養戶，栽戶以其經理其養地，栽地而畜牧

之以供祭祀賓客宮府之膳羞。良牧牧牛羊及豕，蕃育育鵝鴨鷄鶩，皆籍其牝牡之數而課孳卵焉。林衡典果實花木，嘉蔬典蒔藝瓜菜，皆計其畦町樹植之數，而以時苞進焉。

兵馬指揮司分五城，東西南北曰某城，惟中不曰城。設指揮各一人，正副指揮各四人，正其屬吏目各一

人。^正九。指揮掌巡捕盜賊、街道、溝渠、囚犯、火禁之事。副指揮各分一坊。理其地方事而聽之。正指揮以達於

巡城御史。吏目亦分一坊。司受事發展。皆文職。

武學教授一人。^正九。訓導六人。^{未入流}。洪武中。禮部請立武學。開武科。上曰。是岐文武爲二道也。建文中始置

京衛武學。分啓忠等十齋。永樂革。正統中復設。掌教京衛幼官及應襲舍人。以待科文舉及武舉。會舉而聽於兵部。

南京百官。太宗初。改北平爲北京。往來巡守。仁宗時爲皇太子。監國南京。洪熙初。命襄城伯隆偕駙馬都尉沐昕鎮守南京。又以內臣守備南京。是年南京三月地九震。特遣皇太子如南京祭告。而實有監國之命。未幾歸北京卽帝位。遂改鎮守爲守備。革內臣。後皆以勳舊繼爲之。正統中。命少保南戶尙書黃福參贊機務。後稱總督。或時用吏部用都御史。已專用南兵尙書。定稱參贊。而南京之官。守備參贊機務爲要重。治所在中府。掌皇城畿甸留守之事。以時行視陵廟。凡大小教場。練將士。新江口。肄水軍。神機營。習火器。皆時督察之。官軍騎籍歲一報。地圖文冊三歲一報。諸江關浦口。歲督行視之。軍器歲製貢舟。均差遣而嚴輯之。武學課業。旗役併槍監視焉。盜賊歲更官行輯。屯田請專官巡視。凡便宜事。會九卿五府議上請。操江御史一人。巡江御史二人。專江防。尋操江用南僉都。六部諸司具設官而稍省其員。宗人府經歷司經歷一人。吏部尙書一人。侍郎一人。郎中主事各四人。司務一人。戶部尙書。侍郎各一人。

郎中十三人。員外郎十人。主事十七人。司務一人。照磨一人。禮部尙書、侍郎各一人。郎中四人。主事二人。司務一人。兵部尙書、侍郎各一人。郎中四人。員外郎二人。主事五人。司務一人。刑部尙書、侍郎各一人。郎中十三人。員外郎五人。主事十四人。司務一人。照磨一人。司獄二人。工部尙書、侍郎各一人。郎中四人。員外郎二人。主事八人。司務一人。都察院右都御史、右副都、右僉都御史各一人。監察御史三十二人。經歷一人。都事一人。司務一人。照磨一人。司獄二人。通政司右通政、右參議各一人。經歷一人。大理寺卿、及右寺丞、左右寺正各一人。左右評事各三人。司務一人。翰林院學士、或侍講、侍讀一人。孔目一人。詹事府主簿一人。國子監、祭酒、司業、監丞、典簿各一人。博士三人。助教六人。學正五人。學錄二人。典簿一人。掌饌一人。太常寺卿、少卿、典簿、博士各一人。協律郎二人。贊禮郎七人。司樂二人。奉祀三人。寺丞三人。光祿寺卿一人。少卿、典簿各一人。署正、署丞各四人。太僕寺卿一人。少卿二人。寺丞二人。主簿一人。治滌州。鴻臚寺卿、主簿各一人。署丞、鳴贊各二人。序班九人。尙寶寺卿一人。六科給事中六人。管冊戶科給事中一人。太醫院院判、吏目各一人。欽天監監正、主簿各一人。行人司司副一人。五城兵馬司指揮五人。副指揮八人。吏目五人。

京府明初定鼎金陵。以集慶路爲應天府。做古京兆尹。置尹視九卿。正三後定都北京。改北平曰順天府。置尹。皆有丞。正四治中。正五通判。正六推官。從六而順天劇要。設通判六人。其屬有經歷司經歷一人。從七知事一人。從八

照磨所照磨一人。檢校一人。九。從庫大使一人。九。從所屬衙門除各州縣。則有宛平大興二縣。各知縣一人。六。正

縣丞二人。七。正主簿二人。八。正典史各一人。未入流府學教授一人。九。從訓導六人。未入流陰陽學正術一人。九。從醫學

正科一人。九。從司獄司司獄一人。九。從都稅司大使。九。正副使各一人。九。從宣課司四。各大使一人。九。正副使各一人。

九。從稅課司二。分司二。各大使一人。九。從副使一人。未入流巡檢司四。各巡檢一人。九。正織染局。大興遞運所。批驗

茶引所。鐵冶所。各大使一人。九。從開官三人。九。從倉草場。大副使五十人。九。從府尹掌京兆之政令。宣化和人。勸

農問俗。均貢賦。節征徭。謹祭祀。閱實戶口。糾治豪猾。振恤窮困。清錄罪囚。務察知百姓之所疾苦。而時撫摩之。歲攢實徵。十歲造黃冊。凡賦役皆按冊丁產而均適之。歲貢府學一人。三歲合試畿府生而貢士焉。月朔奏老人坊。廂聽宣諭。歲立春。迎春。進春。耕藉田。奉青箱播種。以從。覈勳戚家人。季終造引帳上。國有市易。平其賈。召商而時給之。凡學校。軍匠。積貯。牧馬。柴炭。河渠。隄涂。僧道。醫藥之事。率其屬而分理焉。丞治中。通判。推官。爲之貳。經歷。典入文移。知事。佐之。照磨。主磨。勘卷。宗。檢校。佐之。

外官則十三省承宣布政司。司初爲行中書省。先是分中書省爲六部。尙書往往出爲參知政事。而參政多入爲尙書。建文中。每布政司止設布政使一人。永樂中復舊。而北平改京。增貴州。宣德三年。罷交趾布

政司定爲十三省。每省司設左右布政使各一人。

從二。

左右參政各一人。

從三。

左右參議各一人。

從四。

布政使擬

古方伯。掌一省之政令。朝廷有德澤禁令。承流宣播以下於有司。凡僚屬文武官。歲廉其稱職不稱職者。上下其考報撫按。以達於吏部兵部都察院。三年則率所屬府州縣正官及首領官朝覲於京師。詳第其稱職不稱職者於部院。聽廢置。十年會戶版以登民數。三歲大比。貢合省之士而提調之。歲貢學生。府州縣衛有差。宗室官吏師生軍伍。以時班其祿俸廩糧。祀典神祇。恪謹其時享。水旱疾疫災傷。請免民田租。賑貧乏。民有孝弟行義貞烈表著者。疏請表揚。鰥寡孤獨廢疾者。收給養毋失所。凡供邦國之用。曰貢。曰賦。貢有二。曰常貢。曰暫貢。賦有二。曰本色。曰折色。凡役有二。曰力役。曰雇役。視府州縣土地肥瘠。人民多寡。均其數而下之。民均乃已。凡出納錢穀必平。凡制用必節省。有大政。經畫定而請於撫按。若總督。其國慶國哀。遣僚貳朝賀弔祭於京師。天子卽位。則左布政使來見。而清軍督糧分守。邊備撫民屯田水利。驛傳之事。因事置。無定員亦無定銜。首領官經歷一人。

從六。

典文移都事一人。

從七。

佐之。照磨一人。

從八。

理卷宗。檢

校一人。

從九。

佐之。理問。

從六。

典刑名辯疑請允。副理問。

從七。

及提控案牘。佐之。庫大使副使主庫藏局大使副使

主營繕。而陝西獨有茶馬大使副使各隸焉。

提刑按察司。明初曰各道按察司。洪武十三年。罷置各道按察分司。以儒士王存忠等五百三十一人爲

試僉事人按二縣諭之曰治吏之弊莫甚於貪墨而庸鄙次之今天下府州縣官於斯二者往往有之是以弊政日滋民受其害故命爾等按治其地凡官吏賢否軍民利病皆得廉問糾舉二十年改分司為四十一道後定為提刑按察司建文中改肅政按察司永樂中復故設按察使一人正副使正僉事正使掌

一省刑名按覈之事諸官吏姦邪貪酷罷輒得糾察擒治平讞刑獄雪冤枉詰官私豪猾之干治者以振揚風紀副使僉事為之貳其歲察臧否畫議大政朝覲慶弔如布政而分道巡察提學兵備撫民巡海清軍監軍治河驛傳各事因置無定員或使副使僉事無定銜官不備則兼領之首領官經歷司有經歷二人正知事一人正照磨所有照磨一人從檢校一人從司獄司司獄一人從隸焉

都轉運鹽使司明初置於兩淮繼置於兩浙後於河東陝西河間長蘆福建並置而四川納谿白渡置鹽馬司而河東獨有儒學知府制設都轉運使一人從同知從副使從判官從其屬經歷司經歷從知事從

庫大使從副使未入所屬衙門則有鹽課司批驗所鹽倉各大使副司運使掌鹺事以聽於戶部同知副

使判官為之貳凡常股存積之鹽以時征而貯之以待商人中支以供邊儲京帑之用凡分司鹽課司鹽倉批驗所各以僚屬分任其事而運使總領之糾禁私煎私造私窩諸奸弊謹受巡鹽御史之政令而申勵焉經歷典出納文移知事佐之

鹽課提舉司。設提舉一人。從六。同提舉一人。從七。副提舉無定員。其屬吏目一人。從八。庫司所倉如都轉運司。而

政令亦如之。

行太僕寺。明初設於北平。山西陝西遼東。後北平改太僕寺。餘如故。設卿一人。從三。少卿一人。正四。寺丞。正六。無

定員。其屬主簿一人。從七。卿掌馬牧之事。而聽於兵部。少卿寺丞爲之貳。凡邊衛營堡府州縣軍民壯騎操

馬印烙課校孳牧。以時督察之。凡馬種牡十二。牝十八。馬金地畝十七。椿朋十三。凡馬瘠耗罰俸。罰馬降級。出革懲董之。藩臬不得預馬事。考馬官。苑馬寺亦如之。主簿典守籍牒。

苑馬寺。永樂中。置於陝西甘肅。後遼東亦置焉。設卿一人。從三。少卿一人。正四。寺丞。正六。無定員。其屬主簿一人。

從七。各監牧監正一人。正九。監副一人。從九。錄事一人。正九。圍長。從九。卿掌馬牧之事。而聽於兵部。少卿寺丞爲之貳。

凡馬種。上苑萬匹。中苑七千。下苑四千。不及則銀市茶易焉。凡牧地曰草場。曰荒地。曰熟地。嚴其禁令。而封表之。凡牧人曰恩軍。曰隊軍。曰改編之軍。曰充發之軍。曰召募之軍。曰抽選之軍。皆籍而食之。凡馬駒。二年一科。十八年而免。定駒頭駒重駒籍。而報之。有常期。虧駒有罰。主簿如行太僕寺。監正領苑監之事。監副佐之。錄事守籍牒。圍長率羣長而修牧事。

各府設知府一人。正掌一府之政令。教養其所治民。同知。正通判。正推官。正同知通判無定員。因事設。推

官有至二員者。共爲之佐。凡賓興科貢。均平賦役。崇慎祀典。禁姦頑。表良善。訊刑獄。審冤滯。存困窮。糾察

所屬吏治。而上下其考。以告於撫按藩臬。以達於吏部。務周知百姓之所疾苦。若籍帳。軍匠。傳驛。馬牧。倉

庫。盜賊。河渠。溝防。道路之事。雖有專官。皆總領而綜督焉。若朝覲慶賀。弔祭。直隸府得直達。省府達布政

司。凡詔赦例令。勘劄下。謹受之。下於屬使行。所屬之政。皆受約於府。府劑量重輕而令之。大者白於撫按

及藩臬。議允乃行。同知清軍匠。或兼巡捕。通判管糧。捕盜治農。修河牧馬。推官理刑名。分職任。後專官吏

賢否。首領官如按察司。經歷一人。正知事一人。正照磨一人。從檢校一人。未入司獄一人。未入

諸州設知州一人。無論直隸或屬府。皆。從掌一州之政令。教養其所治民。同知。從判官。從因事添設。專設

無定員。爲之佐。以吏目一人。從爲首領官。州務上親府。下親縣。以月計上府。以歲計上省。以三歲之計上

吏部。同知判官如府同知通判事。分職任事。而領於知州。吏目出納文移。或分領州事。

縣設知縣一人。正掌一縣之政令。教養其所治民。縣丞。正主簿。正凡諸縣務如州。而於民稱最親。歲貢學

生聽試於學憲。三歲貢士。聽試於鄉試。歲造實徵。十歲造黃冊。民之賦役。視丁產爲差。歲以時徵其賦役。

生聽試於學憲。三歲貢士。聽試於鄉試。歲造實徵。十歲造黃冊。民之賦役。視丁產爲差。歲以時徵其賦役。

有粟賦金賦布帛及諸貨物之賦有力役雇役借倩不時之役皆視其天時豐凶地產盈耗與人力貧富調劑而均節之若歲大歉中歉請於府於藩臬撫按視歲而時蠲減焉無幸富強苦貧約凡詞訟必詢其情理考諸律例而決之有不服聽陳於上雪理焉凡養老祀神表善賑饑恤窮通貨之事時省而敦行之凡山海澤藪之產資國用者按其籍而貢焉凡常賦責糧頭里長追攝若雜徵責里長教讀教鄉塾老人句勘民間細事總甲巡察市里弓兵民壯聽追胥縣丞主簿清軍管馬管糧管河分職任事視繁簡添設或裁簡無定員典史職司巡捕盜賊察鹽

儒學司府州縣衛俱設司府設教授

正訓導未入流

州設學正及訓導衛如之縣設教諭及訓導無常員視

生徒凡生徒司府廩膳增廣各四十人州衛各三十人縣二十人附學無恆數視其地之大小凡學政遵臥碑提學憲臣申飭之考其學行而提調於府州縣必謹受之凡學官視鄉舉人多寡爲殿最凡禮儀事學官司之

府州縣屬各有陰陽學府正術州典術縣訓術各一人有醫學府正科州典科縣訓科各一人有僧道司府僧綱司有都綱副都綱各一人道紀司有都紀副都紀各一人州僧正司僧正道正司道正縣僧會司僧會道會司道會各一人府有倉有稅課司分司雜造織染局各有大使副使有巡檢司巡檢有水馬驛驛丞有遞運所大使有河泊所有草場各大使有壩閘有牧場設提領稅課司典移凡商賈僧屠雜市皆

有常征。以時權而輸。其直於所司。凡民間買田宅。操契券。出直百之三。請印而藏之。凡州縣歲輸及雜賦。若諸贖金。悉登而藏之。倉大使典凡民賦軍屯之入。及諸贖穀。若俸祿糧米。咸收支焉。織染局典織造。凡歲幣有常數。絲與練絲之費。並給於上司。會其數而稽之。幣成。覆於上司。而納於帑。若宣索非局所織造者。市之以供。巡檢控山川要害。譏察非常。姦宄竊發。則應時捕拏。以聽於巡捕三房。計所獲偽印強竊盜逃軍亡囚。以爲上下考。批驗所典茶鹽引。由稽其奸冒而慎防之。驛遞典傳郵迎送之事。凡舟夫馬廩糧庖饌。棚帳皆取給丁田。受於所司。而籍其出入之數。河泊所典魚課。草場收牧馬芻粟。陰陽學司刻漏。籍雨暘。報上爲水旱備。日月食供救護。醫學司方藥。訓諸醫生。療人民疾病。僧道官領僧若道士。以清規訓齊之。凡救日月食。請雨。請霽。祀厲壇。則謹率其徒。而司其教事。凡春秋奏樂於先師。以道童充樂舞生。

市舶提舉司。設於廣東福建浙江。提舉一人。

從五。

副提舉二人。

從六。

其屬吏目一人。

從九。

驛丞一人。提舉掌海夷

朝貢市易之事。副提舉爲之貳。辨其使人表文。勘合之真僞。禁通番征私貨。閑其出入。而慎館穀之。吏目典文移。驛丞寓夷客。使僕豐其食。餼帳幕。而上下其等周防之。

襲封衍聖公孔氏。

正二品。

印誥視一品。其屬管句一人。典籍一人。司案一人。四氏學教授一人。學錄一人。學

司一人。餘詳聖賢後裔表。

公侯伯詳年表。

駙馬都尉位次於侯。凡尙公主、長公主、大長公主，並稱駙馬都尉。尙郡主、縣主、郡君、縣君、鄉君，並稱儀賓。食祿有差，皆不得預政事。明初，駙馬多典兵，惟李堅封灤城侯，後多署宗人府事。嘉靖初，崔元以迎駕封京山侯。

武官惟五軍都督府最尊重。位六部上。行六部文移曰照會。明初立統軍大元帥府樞密院，尋革樞密。總管萬戶定爲指揮，千百戶總小旗。又革都護統軍元帥萬戶府，立大都督府。正一品。以朱文正爲大都督。節制中外諸軍事。又設左右都督、都督同知、都督僉事，及斷事官。已罷中書省，分六部。因遂分大都督府爲中左右前後五軍都督府。革大都督，定設左右都督各一人。正都督同知二人。從都督僉事二人。正而

恩功寄祿成列銜，無常員，不任事。其屬經歷、司經歷一人。正都事一人。正事如六官，以分領軍衛使。事不

留滯，權不專擅。都督掌軍旅，各領其都司衛。所以會於兵部，而以公侯伯三等胙武功。都督員缺，於列爵中遴其人以充。居曰軍政掌印而貳者。武官陞極品時亦得充。凡公侯伯及三等都督眞者署，並得充總兵官副總兵官。其名掛印將軍稱鎮守者。雲南征南將軍，兩廣征蠻將軍，湖廣平蠻將軍，遼東征虜前將軍，宣府鎮朔將軍，大同征西前將軍，延綏鎮西將軍，寧夏征西將軍，甘肅平羌將軍，薊州淮安鎮守及漕運總兵，以畿內故，不得掛印稱將軍。遇大征討，則掛平賊將軍，平胡將軍，平虜將軍，征夷將軍，征虜將軍，討賊將軍，或大將軍，前將軍，副將軍。事已納印，設錦衣等上十二衛以衛宮禁。曰錦衣，旗手，金吾前，金吾

後羽林左、羽林右、府軍、府軍左、府軍右、府軍前、府軍後、虎賁左、設留守等四十八衛以衛都城。上十二衛爲親軍指揮使司。番上宿衛無隸屬。而他諸衛分五軍都督府轄焉。曰留守左、藩陽左、藩陽右、驍騎右、鎮南、龍虎、六衛隸左府。留守右、虎賁右、武德、三衛隸右府。留守中、神策、和陽、應天、牧馬、千戶所隸中府。留守前、龍驤、豹韜、三衛隸前府。留守後、武城中、神策後、忠義左、忠義右、大甯中、忠義後、義勇前、義勇右、大甯前、大甯中、蔚州左、會州、富峪、寬河、興武、鷹揚、神武左、十八衛隸後府。永樂中設五府各衛於北京。而改前北平三衛爲金吾左、金吾右、羽林前、改北平都司曰燕山左、燕山右、燕前、大興左、濟州、通州、七衛是爲上下十衛。與騰驤左、騰驤右、武驤左、武驤右、四衛亦得名親軍。太宗私其所自起也。惟武功中、武功左、武功右、以匠故隸工部。仍有永清左、永清右、彭城、三衛及諸陵皆設衛衛陵廟。不隸五府。亦不稱親軍。五府掌軍官軍伍之政令。凡武職流官世官土官襲替優給優養。所衛都司上之府。引奏送兵部請選。既選移府下都司衛所。凡首領官聽吏部選授。給由亦如之。親軍衛得直達兵部。凡武職誥敕旗役併槍水陸步騎操練俸糧屯糧器械舟車賞賜聲息軍情清句替補邊腹畫圖貼說薪炭荆葦之事分移所司而綜理之。經歷典出納文移都事佐之。

錦衣衛。明初爲儀鑾司。先是設拱衛司領校尉。隸都督府。尋改拱衛指揮使司。又改都尉司。後爲親軍都尉府。統中左右前後五衛軍士。而儀鑾司隸焉。洪武十五年罷府。置錦衣衛親軍指揮使司。鎮撫司理衛中刑名。如列衛兼管軍匠。所謂南鎮撫司也。二十年命焚衛刑具。盡出其繫囚送刑部。二十六年又申鞠

刑之禁。永樂中紀綱幸用事。任遇漸異。賚綠復司刑名。成化中添立北鎮撫司。專理詔獄。始給印得直達。而錦衣衛遂成冤窟矣。凡十八所。曰錦衣中左右前後五所。領軍士五所。各分鑾輿、擊蓋、扇手、旌節、旛、旛、班劍、斧鉞、戈戟、弓矢、馴馬、十司。分領將軍校尉。而上中、上左、上右、上前、上後、中後、親軍、分領將軍力士軍匠、馴象所、領象奴、養象、衛掌侍衛之事。恩功寄祿無常員。多雜濫無賴託其中。恆以三等都督或都指揮使。正都指揮同知。從都指揮僉事。正領之。凡將軍力士校尉分番護駕直宿巡察。凡大朝常朝駕出入設鹵簿儀仗。凡皇城四門日夜番直巡警之。凡賊盜姦宄街塗溝渠密緝而時省之。凡奉旨鞠獄錄囚勘事。與三法司從事。凡比試併槍監視焉。有指揮使。正指揮同知。從指揮僉事。正鎮撫司掌衛刑名兼理軍匠。分南北而北別印專理詔獄。獄成直達上下法司覆議。有正千戶。正副千戶。從百戶。正鎮撫。從其屬有經歷司經歷。正係文職典出納文移多遷譎闖茸有志者恥爲之。

京衛皆有三等指揮鎮撫所統千戶所正千戶副千戶實授百戶試百戶所鎮撫。正五年一廢置之。曰考選軍政衛三人所二人百戶不能皆賢一人兼數印。凡總領庶務曰掌印僉書分理屯田驗軍存恤營操守衛皆曰見任管事。選使同知僉事正副千戶任之。充營官者亦如之。不足任事入隊曰帶俸差操。凡官

有定員。功陞日衆。視原額增。不啻十九。凡世流襲替優給優養。隸都督府者。上府移兵部。親軍衛直達兵部。凡入營者聽京營文武大臣督理。衛有經歷一人。從七知事一人。正八牧馬千戶所。蕃牧千戶所。奠靖千戶所。各有吏目一人。從九經歷吏目係文職。典出納文移。或有收糧經歷一人。倉大使副使各一人。於京通倉收支漕粟。

南京五軍都督府。用公侯伯都督同知僉事。或流官府三人。經歷都事各一人。孝陵錦衣等衛隸府。留守中等衛。各有三等指揮鎮撫。正副千戶。所鎮撫實試百戶。無定員。衛經歷各一人。所吏目一人。外武官。各省都指揮使司。明初爲翼元帥府。又改爲行都督府。省城或稱都衛。都鎮撫司。洪武二十年。置大甯都指揮使司。尋改爲北平行都指揮使司。永樂中。復名大甯。移之保定。而棄其地界。朵顏諸戎先置交趾。都指揮使司。宣德中。棄與安南。後定都指揮使司十六。曰浙江。江西。福建。廣東。廣西。湖廣。河南。山東。山西。陝西。四川。貴州。雲南。大甯。萬全。遼東。行都指揮使司五。曰四川。陝西。湖廣。福建。山西。若外衛及護衛。計三百七十五。守禦屯田羣牧千戶所三百七十。儀衛司三十二。都使司行都使司各都指揮使二人。都指揮同知二人。都指揮僉事四人。其屬經歷司經歷一人。正六都事一人。正七斷事一人。正六副斷事。正七吏目一

人。正九司獄司司獄一人。都使司掌各省官軍之政令。各率其衛所以隸於五府而聽於兵部。與布按二司

並曰三司。凡都司皆流官。歲撫按察其賢否。五歲考選軍政而廢置之。一人統司事曰軍政掌印。一人練兵。一人屯田。曰軍政僉書。巡捕軍器漕運京操備禦諸雜務。並選充之。曰見任管事。否曰帶俸。凡備倭守備行都指揮事者。不得升衙公座。凡朝廷吉凶之禮視布政司。其屬各司其事以聽。

留守司。一在中都。一在興都。中都領皇陵衛。興都領顯陵衛。設正留守一人。正副留守二人。正指揮同知

二人。正留守掌守護防禦之事。副留守指揮同知爲之貳。凡諸政務如都使司。而其屬亦如之。三

外衛指揮使司指揮使一人。指揮同知二人。指揮僉事四人。衛鎮撫二人。陞授改調增置無定員。掌軍旅防禦之事。使同知僉事考選掌管衛事。凡世流襲替優給優養。報都指揮使司達所隸都督府移兵部。每歲藩臬撫按察其賢否。五歲一考選軍政廢置之。一人統衛事曰軍政掌印。一人練兵。一人屯田。曰軍政僉書。京操巡捕出哨備禦軍器漕運諸雜務。曰見任管事。編諸行伍。曰帶俸差操。凡撥軍補軍替軍募軍。並統於掌印。凡城池時葺浚之。度其財力。軍十三。民十七。其屬經歷知事視府。凡獨居一城。有衛學者。教授一人。訓導視繁簡無定員。有驛遞運所。陰陽醫學。僧綱道紀司。皆視府。軍民指揮使司亦如之。千戶所正千戶一人。副千戶二人。所鎮撫二人。百戶十人。陞授改調增置無定員。正副千戶選一人掌印。一人僉書。曰管軍千戶。至百戶不能皆賢。一人常攝數印。並選充如衛。凡治軍之政。必聽於衛。衛下千戶所。千戶督百戶下總旗小旗。率其伍卒以聽。所鎮撫無獄事。管軍百戶缺則代之。守禦千戶所及軍民千

戶所並如之。其屬吏目一人銓於吏部。

兩京僧道官置僧錄司。明初爲善世院。尋革。又復改爲僧錄司。置道錄司。初爲元教院。後改道錄司。禮部言往代度僧道給牒鬻錢資國用。民免丁錢。太祖曰罷。著爲令。後下敕清禁之曰。佛本異教。漢時至西域。當時士民崇敬。後有去鬚髮舍兒童出家者。其修行去色相。絕嗜慾。潔身爲善。道教始於老子。至漢張道陵以異術役召鬼神。禦災捍患。二教立世久。不磨滅者。以此。今學佛老者皆不循其本俗。妨教敗行。爲害甚大。自今天下僧道。凡各府州縣寺觀雖多。惟存一寬大所併居之。毋淆處民間。願還俗者聽。佛經番譯已定。毋得增減。道士設齋醮。毋拜奏青詞。爲孝子慈孫演誦經典報祖父母父母者。各遵頒降科儀。毋妄立條章索民財。民有做瑜珈教稱善友。假張真人私造符籙者。並重治。僧錄司設左右善世。正六左右闡

教。正七左右講經。正八左右覺義。正九道錄司設左右正一。左右演教。左右至靈。左右玄義。品如僧錄司。凡官各

一人。分領僧道事。凡僧三等。曰禪。曰講。曰教。道二等。曰全真。曰正一。凡朝朔望班。西墀慶賀。頌詔班。東墀。凡祭祀不得預。三茅山崇真宮有靈官。正八副靈官。從八龍虎山有真人。先是洪武初。張道陵四十二代孫正

常。以正一主教。天師來朝。上曰。妄甚。天豈有師乎。改號真人。正二予龍山正一玄壇之印。許世襲。其屬有法

官。凡方士道士以術幸者。賜號高士或真人。無品從。

內官初置內使監。尋諭吏部定內侍諸司官曰：朕觀周禮所記未及百人。後世至踰數千。率爲大患。今雖未能復古。亦當爲防微之計。古時此輩止治酒漿醴醢。司服守祝事。今朕亦不過以備使令。非別有委任。可勘其宜。毋令過多。又顧侍臣曰：此輩自古以來。求其善良。千百中不一二見。若用爲耳目。卽耳目蔽。用爲心腹。卽心腹病。馭之道。但常戒敕之。畏法不可使之有功。有功則驕恣。畏法則檢束。檢束則不敢爲非。又鑄鐵牌樹之宮門。曰：內臣不許干預政事。預者斬。乃定置奉御六十人。分司寶冠衣珮諸事。太廟酒醋諸局。御馬內庫內倉。東宮官門官不過百餘人。上因謂侍臣曰：古之宦豎在宮禁。不過司晨昏供役使而已。自漢鄧太后以女主稱制。不接公卿。乃以閹人爲常侍。小黃門通命。自此以來。權傾人主。及其爲患。如城狐社鼠。不可去。朕謂此輩但當服事宮禁。豈可假以權勢。縱其狂亂。吾所以防之極嚴。但犯法者必斥去。不令在左右。戒履霜堅冰之意也。又詔定宦官禁令。復令禮部議考糾內官之法。置內正司司正。七。正

司副。七。從二人。專糾內官之不法者。尋改典禮司。又更典禮紀察司。至二十八年。頒皇明祖訓。遂有定制云。

凡監十有一。監設太監一人。四。正左右少監各一人。四。從左右監丞各一人。五。正典簿一人。五。從長隨奉御。六。正曰神

宮監。掌灑掃。曰尙寶監。掌御寶敕符將軍印信。曰各陵神宮監。掌灑掃。并栽種一應果木蔬菜等。曰尙膳監。掌供養及御膳。及宮中食用。催光祿寺造辦宮內筵宴茶飯。曰尙衣監。掌御用冠冕袍服履舄靴襪等。

事曰司設監。掌車輦、牀被、帳褥、帷幔。曰內官監。掌造成婚禮妝奩、冠烏、傘扇、鋪設、儀仗。并內官內使貼黃一切造作。并宮內器用、首飾、食米、上庫、架閣、文書、鹽倉、冰窖。曰司禮監。掌冠婚喪祭一應禮儀制帛。及御前勘合、賞賜筆墨書畫。管長隨內使人等出門馬牌、催光祿寺造辦。曰御馬監。掌御馬。及進貢各典牧所馬騾等項。曰印綬監。掌誥券、貼黃、印信、選簿、勘合、符驗、文冊、題本、誥敕、號簿、印信、圖本。曰直殿監。掌掃灑殿廷、樓閣、廊廡。凡皇極門、午門、端門、承天門、各設門正一人。正四。門副一人。從四。掌晨昏啓閉關防出入之事。

置司二。曰鐘鼓。掌奉先殿祭樂。及御樂。宮中宴樂。更漏、朝鼓。曰惜薪司。掌宮中薪炭。司各有正。正五。副。從五。凡

局六。曰兵仗局。掌御用兵器刀甲。及宮中所用梳篦、刷牙、鍼、翦之物。曰內織染局。掌織染上用段匹。曰鍼工局。掌造成衣服鋪陳諸物。曰巾帽局。掌造內官紗帽靴襪巾帽。曰司苑局。掌種蒔宮內菜蔬。曰酒醋麵局。掌內府酒醋調和糖錫之類。局各有大使。正五。左右副使。從五。凡庫三。曰內承運庫。掌段匹金銀珠玉牙鈔

等物。曰司鑰庫。掌各門鎖鑰及錢鈔等。曰內府供應庫。掌上用香米油燭。及內人飯食果蔬。設官如各局。後又設都知監銀作局。而東宮置六局。曰典璽。典樂。典膳。典服。典兵。典乘。局各設局郎。正五。丞。從五。其後親幸

者曰近侍。或懸牌子。曰牌子太監。季年益濫。多加犀玉。不復舊品從矣。

內女官詳宮闈紀。

王府官。凡親王府。初設左右相。左右傅。分文武。皆以勳舊大臣兼充之。設典籤司。諮議官。護軍府。又置參軍錄事諸官。後定制置長史司。左右長史各一人。五。正典簿一人。九。正審理所。審理正。六。正副。七。正各一人。典膳所。

典膳正。八。正副。八。從各一人。奉祀所。奉祀正。八。正副。八。從各一人。又有典樂一人。九。正典寶所。典寶正。八。正副。八。從各一人。

紀善所。紀善二人。八。正良醫所。良醫正。八。正副。八。從各一人。典儀所。典儀正。九。正副。九。從各一人。引禮舍人三人。工正。

所。工正。八。正副。八。從各一人。是爲八所官。又設伴讀四人。九。從教授一人。七。從庫設大使副使各一人。而相傅餘官。

并罷。建文中增賓輔三件。賓友進對侍坐。稱名不稱臣。永樂初革。設各官如故。長史掌王府之政令。輔相規諷以匡王失。王府請名。請封。請婚。及請乞恩澤。若陳謝。進獻。表。啓。書。疏。皆主焉。奏上。下禮部議請。王有過。詰長史。凡府僚皆統於長史。紀綱其職。審理掌推按刑獄。典膳掌祭祀賓客。及王若妃之膳羞。奉祀掌祭祀。典寶掌寶符。紀善掌諷導禮法。開諭古誼。及國家恩誼大節。以詔王善。良。良醫掌療治疾病。典儀掌儀式文物。工正主繕造修葺工役。伴讀掌侍從勸講。教授掌訓迪德義。校讐典籍。引禮掌接對賓客。而贊相威儀。倉掌祿俸糧廩。庫掌收藏金帛錢貨。郡王有教授。典膳。將軍有教授。如王官職。其武官有護衛指揮使司。使同知。僉事。衛鎮撫。所正副千戶。所鎮撫。百戶。掌儀從王邸。防禦非常。凡有征行。必聽命於朝廷。

又置儀衛司。儀衛正正一人。副從二人。典仗六人。掌侍衛儀仗之事。略倣京朝文武官。官五年一考察。與

京朝官同。其內官則有承奉司。掌管王府一應雜事。有事呈長史司。并護衛指揮司發落。與內官衙門無

相統攝。設承奉正正六人。副從六人。典寶所典寶正正六人。副從六人。典膳所典膳正正六人。副從六人。典服所典服正正六人。副從六人。各門官

門正正六人。副從六人。內使則有司冠。司衣。司珮。司履。司樂。司弓矢。

公主府。設中使司。有司正司副。

夷土官。初隸吏部驗封司。尋以凡掌土兵者。改隸兵部。其襲替關武選。大抵與驗封不異。若土官無子弟。

其婿與妻皆得襲。先是襲替文出十年者不准。後亦許。然皆萬里赴闕。或獻馬方物。請命最謹。至天順八年。上兩宮徽號。詔許土官繳呈勘奏。即與冠裳。於是介使未將。威福自恣。雖託羈縻之名。竟開驕悍之漸。

至成化中。又有納穀備賑之令。則經制日卑。規取愈陋。孝宗發憤釐革。至正德旋復墮廢。嘉靖九年。始曲為條約。稍復祖宗之舊。若府州縣正貳幕屬巡檢。驛傳隸驗封。宣慰等衙門。隸驗封者。皆領於布政司。隸

武選者。皆領於都司。其居近徼為守者。世官曰土官。凡六等。曰宣慰使司。設宣慰使從三。同知正四。副使從五。僉

事正六。經歷司。經歷從七。都事正八。各一人。曰宣撫司。設宣撫使從四。同知正五。副使從五。僉事正六。其經歷正八。知事正九。照

磨從七各一人曰安撫司設安撫使從五副使正六僉事正七吏目正九各一人曰招討司設招討使從五副招討正六吏

目正九各一人曰長官司設長官正六副長官從六吏目各一人曰蠻夷長官司設長官正七副長官從七及府州縣

正貳等官世者皆謂土官主附輯諸蠻謹守疆土修其職貢其供調發有敢攜貳乃相讐殺者疏上聽朝

命有流官者銓於吏兵部司有儒學者制如府初又有蠻夷官苗民官千夫長副千夫長百夫長軍民萬

戶府及首領官並停銓雲南土官一百一十五知府十人武定麗江景東沅江順甯知州十七人寶山南甸蘭州

大侯雲龍濱蕩鄧州安甯威遠霑益羅雄鎮康陸涼知縣六人臨西嶧峨雲南同知二人廣南知事一人鶴慶經歷一人千州同八人巨津師宗濱羅

姚州北勝南判官三人安鎮南縣丞六人主簿六人吏目一人鹽井副使一人驛丞十二人巡檢四十五人貴州一

十五同知一人鎮遠通判一人鎮遠推官一人鎮遠州同一人安判官一人普安縣丞一人巡檢六人司獄一人廣

西一百九十七知府四人思恩田州知州三十三人思明結安下石西利州都結奉議思城上思龍英鎮遠江州結倫思同

上隆萬承果化都康州同一人左知縣六人羅白憑祥上林縣丞一人主簿一人典史二人巡檢十三人又巡檢

者盈又萬承全者陀陵羅陽忻城

一百二人。又增設巡檢二十八人。湖廣五。知州三人。南渭施溶上溪巡檢二人。廣東巡檢一人。以上隸吏部。雲南

布政司領宣慰司七。宣撫司三。長官司二十。都司領安撫司三。長官司三。湖廣都司領宣慰司二。宣撫司四。安撫司九。長官司二十。蠻夷長官司五。貴州布政司領宣慰司一。安撫司一。長官司五十二。蠻夷長官司二十。都司領長官司十一。四川布政司領宣慰司一。宣撫司二。安撫司三。長官司十二。都司領宣撫司二。招討司一。安撫司四。長官司二十二。行都司領長官司五。廣西布政司領長官司三。以上隸兵部。其地詳方域志。

營伍武官皆因事而命。無定制。凡五等。曰鎮守。曰協守。曰分守。曰守備。曰備倭。其官銜凡六等。曰總兵。曰副總兵。曰參將。曰遊擊。皆稱將軍。曰都司。曰守備。曰提調。曰千總。曰把總。曰百總。皆營官。又有曰都指揮。曰以都指揮體統行事。皆以務置。無常員。

大都明之制官也。有爵三等。酬武功。曰公。曰侯。曰伯。○有官九品。熙庶績。自一至九。皆分正從。詳見前。○有號。凡開國武功。曰開國輔運推誠宣力功臣。文曰開國輔運推誠守正文臣。太宗爲皇帝。號其武功曰奉天靖難推誠宣力功臣。文曰奉天靖難推誠守正文臣。宣德後。征討功。曰奉天翊運推誠宣力功臣。文曰奉天翊運推誠守正文臣。○有階。文官正一品。初授特進榮祿大夫。陞授特進光祿大夫。從一品。初授榮祿大夫。陞授光祿大夫。正二品。初授資善大夫。陞授資政大夫。加授資德大夫。從二品。初授中奉大夫。

陸授通奉大夫。加授正奉大夫。正三。初嘉議大夫。陸通議大夫。加正議大夫。從三。初亞中大夫。陸中大夫。加太中大夫。正四。初中順大夫。陸中憲大夫。加中議大夫。從四。初朝列大夫。陸朝議大夫。加朝請大夫。正五。初奉議大夫。陸奉政大夫。從五。初奉訓大夫。陸奉直大夫。正六。初承直郎。陸承德郎。從六。初承務郎。陸儒林郎。吏宣德郎。正七。初承事郎。陸文林郎。吏宣義郎。從七。初從仕郎。陸徵仕郎。正八。初迪功郎。陸修職郎。從八。初迪功佐郎。陸修職佐郎。正九。初將仕郎。陸登仕郎。從九。初將仕佐郎。陸登仕佐郎。其有官無階。曰未入流。武官正一品。從一品。階同文。正二。初驃騎將軍。陸金吾將軍。加龍虎將軍。從二。初鎮國將軍。陸定國將軍。加奉國將軍。正三。初昭勇將軍。陸昭毅將軍。加昭武將軍。從三。初懷遠將軍。陸定遠將軍。加安遠將軍。正四。初明威將軍。陸宣威將軍。加廣威將軍。從四。初宣武將軍。陸顯武將軍。加信武將軍。正五。初武德將軍。陸武節將軍。從五。初武略將軍。加武毅將軍。正六。初昭信校尉。陸承信校尉。階止此。初改官不授階。初考曰初授。再考曰陸授。三考曰加授。○有勳文武正一。左柱國。右柱國。從一。皆柱國。文正二。正治上卿。從二。正治卿。正三。資治尹。從三。資治少尹。五四。贊治尹。從四。贊治少尹。正五。修正庶尹。從五。協正庶尹。下無文官。再考乃授勳。武正二。上護軍。從二。護軍。正三。上輕車尉。從三。輕車尉。正四。上騎都尉。從四。騎都尉。正五。驍騎尉。從五。飛騎尉。正六。雲騎尉。下無○有祿俸武功公侯伯。歲支祿米多者五千石。少至七百石。文武正一品。月支米八十七石。從一月支米七十四石。正二月支六十一石。從二月支四十八石。正三月支三十五石。從三月三十一石。正四月二十四石。從四月二十石。正五月一十六石。從五月十五石。

正六月十石。從六月八石。正七月七石五斗。從七月七石。正八月六石六斗。從八月六石。正九月五石五斗。從九月五石。未入流。月三石。○階勳止空名。惟給俸視品。乃職司。若所蒞屬。獨視官爲權重。卽品無論矣。俸自正一品歲千石。遞而降。至從九歲五十石而止。品高者給豐。後定制。在京一品至五品。實支十之三。六品至九品。實支十之四。餘給鈔錠約者。支稍從實以權之。後鈔折閱不行。而留都官折鈔十之八。入愈薄。難供矣。外官實支。視各省府爲豐儉。額無常。亦間有職田。然甚少。頗不足給。從古予臣子養廉資。莫非於明云。